

Pordalanan ni halak silului
hangoluan sian inganan hamatean tu
inganan salelenglelengna.

pinadomu ni

Johann Bunyan.

Pandita di tano Ingoris

hinatabatakkon ni

Pandita W. Volkmann.

Rongkoman RHEIN. MISSION PRESS di Si Antar.

1BK
Bas
240

38
854


II 5. Batak 27.

IBK Bal 240

From Pastor Landgrebe

Aug. 1912.

**Pordalanan ni halak silului
hangoluan sian inganan hamatean tu
inganan salelenglelengna.**



pinadomu ni

Johann Bunyan.

Pandita di tano Ingoris

hinatabatakkon ni

Pandita W. Volkmann.

Rongkoman RHEIN. MISSION PRESS di Si Antar.

**Pordalanan mangalului
hangoluan sian inganan hamatean, tu
hangoluan na so ra suda.**
**1. Biar ni pordalan i, hapoporusna
dohot Sitududalan.**

Ninna halak nampuna djamita on: «Udju mordalan ahu mangaliati tano on, na songon tombak longolongo i, gabe sahat ma ahu tu sada inganan (i ma hurungan) liang batu. Dungi re-berebe ma ahu disi djala pulos modom. Andorang modom ahu, mornipi ma ahu. Ida ma! Adong sada huida, na morabit na buruk djala na rotak, (Jes. 64, 6) na djongdjong di sada inganan, di pudi ni djabuna; dungi adong ma di tanganna sada buku, djala di tanggurungna adong sada sibonanon na dokdok situtu.» Luk. 14, 33. Ps. 38, 5. Dungi diungkap ibana ma buku i djala didjaha. Andorang mandjaha ibana, tangis ma huhut angka dotdot; angkup ni, djala dung so tarbahensa lelung songon i mandjou ma ibana gogogogo: «Ingkon aha do ulahononku!» (Ul. Apost. 2, 37; 16, 30. Hab. 1, 2. 3.)

Asa songon i ma ibana mulak tu djabuna, naeng bunihononna nian arsak ni rohana i, unang diboto djolmana dohot anakonna, alai ndang tarbunihonsa be arsak ni rohana, na lam ganda i. Djadi ala ni i dipapatar ma rohana tu nasida, ninna ma: Ale na huoli haholongan ni rohangku dohot hamu angka anaha, na huhaholongi! naung mago do ahu on ala ni siporsanon, na dokdok on, na di abaranku; (i ma dosa na balga i) djala hubege muse barita, taringot tu ingananta on, (i ma hasiangan on) ingkon gor muse bahenon ni api, na ro sian gindjang. Dibagasan hama-goan na balga na hudok i, sandok ingkon mago so morsamari do hita, ahu, ho, ale na huoli dohot hamu angka anakhasian, molo so adong be djumpang dalan haluaon. Alai i ma na so adong huboto, (mandok: Ndang diboto dope dalan hangoluan.)

Djadi dung dibege angka pangisi ni bagas i barita i, tarsonggot be ma; alai ndada ala na porsea nasida di hata na sintong i, ala dirimpu rohanasida naung rintik do; adong bongot begu tu bagasan rohana. Djala ala naung borngin, didokkon djolmana i ma ibana modom, asa malum muse, hape ndang tarpodom ibana songon

arian i; sai susa do rohana, huhut morlongoslongos hosana, mandok: «O iale!» djala moriluilu do matana. Manogotna i ro ma pangisi ni bagasna i sadasada, mornida dohot manungkun manang na mahua ibana, gabe dialusi ma: «Sai lam ti gandana do hasusaanku;» djala didok muse do songon hatana nantuari, huhut manglehehelek pangisi ni bagasna i, asa dipauba be rohana, mangalului dalan, asa malua sian rimas ni Debata na naeng ro i; alai djogal be do rohanasida. Asa bali nian ritoritona i, ninna rohanasida, dirimasi nasida ma ibana dohot hata na posi; djala tongkin diparengkeli nasida ibana, tongkinnari didok: «Na lalaen do ho!» huhut ditadingkon nasida ibana muse.

Alai masuk ma ibana tu bilutna asa sonang mortangiang, mangido angka na morguna tu djolmana dohot angka anakonna; ala ni holong ni rohana di nasida, djala naeng pasonangkon rohana huhut. Sipata mordalandalan ibana tu harangan, mandjaha buku, huhut mangido, asa disuru Debata Tondina mangula di bagasan rohana; tu roha ni anakonna pe nang tu roha ni djolmana, asa diboto nasida pangalahona be. Sai songon i ma dibahen ibana manang piga ari, mordalandalan di harangan, huhut mandjahadjaha bukuna i, ala ni sosak ni pingkiranna, huhut morhosa godang djala tangis. Diulahi ma mandok: «Aha ma bahenonku asa mangolu ahu?» (Ul. Apost. 16, 30. 31.)

Satongkinnari, di na mornipi i ahu, huida ma pangalaho ni halak i; sai mamerengi tu siamun dohot tu hambirang, songon pangalaho ni halak, na naeng maporus, alai ndang diboto manang tudia haporusanna; gabe laos djongdjong ma ibana di inganan i djala ganggu.

Ndang pola sadia lelengnari, huida ma adong sada halak na asing, na morgoar: *Si Porbaritanauli*, na ro tu lambungna, huhut manungkun: «Aha alana umbahen tangis ho?» Dungi dialusi ma: «Ale tuan! hudjaha hata na tarsurat di buku, na hutiop on, djadi hudjaha ma di buku i: «Na mate satongkin na ma ahu, djala dung i muse: Ro ma ari poruhuman na balga.» (Heber 9, 27.) Alai ndang lomo rohangku mate, djala ndang lomo rohangku djongdjong di djolo ni poruhuman i (Joh. 16, 21. Hez. 22, 14.)

Didok *Si Porbaritanauli*: «Boasa so lomo roham mate, ai gok hadjahaton do tano on dohot haporsuhon?»

Alusna: «Umbahen na mabiar ahu, ala ni siporsanon na dokdok, na di abarangkon do; aek dilonongkon ahu tu tano dohot tu banua toru.

(Jes. 30, 33.) Dibahen i ale tuan, molo pola mabiar ahu bongot tu hurungan, tung beha ma pambahenku djongdjong muse di ari parpudi, umbege hata on: «Laho ma ho sian lambungkon tu hamagoan! molo huingot i, gabe tangis ma ahu.»

Didok *Si Porbaritanauli*: «Molo songon i do hape pangalahom,

boasa sai so ho djongdjong dison?» Dialusi halak i ma: «Ala so huboto manang tudia ahu laho!» (astuanna: Na holom do roha hian ndang diboto manang sian dia dalan tu hangoluan.) Djadi dilehon *Si Porbaritanauli i* ma tu ibana sambalun surat, na tarsurat di harotas i; on do: «Maporus ma ho, asa malua dirim sian rimas na balga, na naeng ro i!» (Matth. 3, 7.)

Dung didjaha surat i, dibereng ma tu *Si Porbarita i*, huhut marsak; ninna ma: «Tudia ma ahu maporus?» Dung i didok *Si Porbarita i* ma huhut dipatuduhon dohot djarijdjarina dompak tombak na bidang i: «Diida ho do pintu na sompit i?» (Matth. 7 13.) Dung i dialusi ma: «Ndang! ndang huida!» (astuanna: *Jesus Kristus* dohot pordalananna, ndang tarida, molo so morhite barita na uli. Ndang diboto djolma hian paserephon dohot paubahon rohana huhut mansoadahon dirina.)

Dungi disungkun *Si Pordjamita i* muse: «Beha, diida ho do sinondang an?» (Ps. 119, 105. II Petr. 1, 19.) Dungi dialusi halak i ma: «Olo, nunga mamungka huida!»

Didok *Si Pordjamita i* muse: «Panotnoti ma tongtong dompak na tiur i, unang melengeleng ma'am; mordalan ma ho manu-dju dompak pintu i, djala dung sahat ho, tuktuhi ma, dungi paboan ni *Sidjaga* pintu i ma tu ho manang aha na tama siulahononmu» (*Barita na uli i, i do na tiur i*, na tau manogunogu hita tu pintu na sompit i.)

Didok nampuna djamita on: Huida muse di bagasan nipingku, pintor morlodjong ma halak i; djala ndang pola sadia dao dope ibana sian pintu ni bagasna i, ro ma djolmana dohot ianakkonna rumanggiok tangis mandjoughon: «Mulak! mulak!» Alai disongsong halak i ma pinggolna dohot djarijdjarina, huhut mandjoughon hata on: «Hangoluan! hangoluan! ahu naeng mandjalahi hangoluan, na salelenglelngna i!» (Luc. 14, 26.) Ndang dibereng dompak pudu, (Gen. 19, 17) sai dalan i do ditulus, sahat ro ditongatonga ni harangan i.

Angka donganna sahuta i pe ruar do tu balian huta, mornida halak, na maporus i. Adong deba na mangelesi ibana, adong deba mangasupi, na debanari djoudjou, mangelehelek ibana mulak. (Bangkona do i, sai dieleselesi halak porroha tano on do halak na mangalului hangoluan sogot.) Adong do dua baea sian halak na torop i, na mangelehelek ibana, asa mulak, i ma: *Si Djogal* dohot *Si Panangiangitongkin*.

Djadi ala dung dao, na maporus i, sian huta i, morlodjong ma nasida na dua dohot nasa gogona, djadi ndang pola piga dan be, djumpang nasida ma ibana. Dungi didok na maporus i ma: «Boasa ro hamu tuson ale dongan?» Alusnasida: «Naeng boanonnammi do ho mulak tu djolman dohot tu ianakkonmu!» Djadi didok ma: «Ndang tarbahen songon i, unang dok ingkon mulak

ahu tu huta na hutadingkon tu inganan hamagoan i; disi do tutu ahu tubu udju i, alai nunga huida, molo mate hita disi, tu inganan na umbagas sian tanoman dope hita bongot, i ma api bare-rang na morsigorgor (Math. 25, 41.) Dibahen i ale alealengku, unang mulak hamu tu huta pordjeaan i, dumenggan do, molo rap hamu laho dohot ahu.» Dungi didok *Si Djogal* ma: «Pel tung ihuthononami ma ho maporus di roham, manadingkon angka do-ngan dohot ugasannami? Na lalaen do ho!» *Si Kristen*: (i ma goar ni halak, na mandjalahi hangoluan i) «Olo! las do rohangku molo dohot hamu maporus, ai saluhut ugasan na tinadingkonmuna i, ndang sadia morarga i mortimbangkon arta na hulului (II Cor. 4, 18.) Molo olo hamu mangihuthon ahu, dapotan bagian do hamu songon na di ahu; ai singkop do ugasan na arga di luat na naeng toptonki, dohot hasonangan dipambagihon (Luk. 15, 17.) Beta ma asa ida sintong ni na hudok i!» *Si Djogal* manungkun: «Angka arta aha ma, na niluluan ni roham, umbahen pola las roham manadingkon luat on (tanoon)?»

Si Kristen: «Ianggo na hulului i, i ma siteanon na so olo mago, na so olo malos djala na so olo mubauba, na pineop di angka banuagindjang (I Petr. 1, 4. 5.) Na nilehonna di tingkina tu angka na mangalului tongtong sian roha na ringgas. Djaha ma djolo di buku on, molo so porsea ho» (Hebr 11, 16.)

Si Djogal: «Pel ndang porduli ahu di bukum i, ambolongkon i!» dok ma: «Olo do ho mulak rap dohot hami manang ndang?»

Si Kristen: «Ndang! ndang! ai nunga huampehon tanganhu tu ninggala, djala ndang olo ahu mamerengi dompak pudi» (Luk. 9, 62.)

Dung i didok *Si Djogal* ma tu *Si Pananginangitongkin*: «Beta hita mulak, ndang pola pordulihononhon djolma na songon habahaba i; molo dung djumpangsa na piningkiran ni rohana, hira ummalo do ibana huroa sian pitu halak na bisuk situtu.»

Si Pananginangitongkin: «Unang alo ibana ale *Djogal*, atik na sintong do hata ni *Si Kristen* i. Tutu do, mormuliaan do na niluluanna i, sian na italului. Olo ma ho ale rohangku! laho rap dohot *Si Kristen*!»

Si Djogal: «Aha! naung dohot do ho mangihuthon na lalaen i? Tangihon ma ahu, mulak ma hita; ise ma umboto manang tudia ho togihonon ni na lalaen i. Mulak! mulak ma hita, unang ihuthon na lalaen i!»

Si Kristen: «Ndangkon anggo ho, *Si Pananginangitongkin* ma denggan donganku, ai angka hata na huhatahon i, taringot tu ugasan na arga i, djumpang do i, ndang na morgabus ahu (*Si Kristen* dohot *Si Djogal* moralo, pagulutgulut roha ni *Si Pananginangitongkin*.) Molo so porsea ho djaha ma di bagasan buku on, ai angka hata na sintong do i; nunga diurasi i morhitehite mudar ni na mangalehonsa (Heber 9, 17—27.)»

Dungi didok *Si Pananginangitongkin* ma tu *Si Djogal*: «Ale dongan! nunga putus pingkiranku, dohot sangkap ni rohangku, ai naeng dapotan tua ahu rap dohot na tigor on.» *Djala* didok *Si Pananginangitongkin* ma tu *Si Kristen*: «Ale pedan na denggan, ai nunga diboto ho inganan hangoluan, na naeng toptonmi?» *Si Kristen*: «Nunga dipatuduhon sada halak na morgoar *Si Porbaritanauli* inganan i tu ahu, djala didokkon ahu, hatop situtu mordalan, manudju pintu na sompit i, na di djolonta on; djumpang hita dope disi poda taringot tu na itapareahi on.»

Si Pananginangitongkin: «Denggan ma i, beta ma hita rap laho ale pedan.» Dungi mordalan ma nasida na dua.

Si Djogal: «Laho ma ahu mulak tu bagashu, ndang ringkot rohangku mordonganhon halak na songon habahaba djala na mordjea on.»

Dungi didok nampuna djamita on: «Huida dibagasan nipingku, dung mulak *Si Djogal*, rap mordalan ma *Si Kristen* dohot *Si Pananginangitongkin* di harangan i.

Si Kristen: «Beha do roham ale pedan *Pananginangitongkin!* Mansai las rohangku nuaeng, dung rap ho dohot ahu. Ida ma *Si Djogal!* aut naung dihilala, songon na huhilala di rohangku taringot tu hagagoon dohot habiaran, na naeng ro i, ra ndang be mulak ibana tu huta il!»

Si Pananginangitongkin: «Nuaeng, nunga holan hita rap, asa gumodang ma paboa taringot tu hita, manang beha sonangta djala manang tudia hita naeng laho?» *Si Kristen*: «Sude pangalaho ni na huboto i, ndang tarpadjodjor dilangku tu ho, (ai ndang hadodoan roha pangalaho ni surgo i) molo naeng botoonmu i, sian buku on ma hudjaha.»

Si Pananginangitongkin: «Ai tutu do i, nunga dihaporseai ho sude na tarsurat di bukumi, taringot tu sintongna?»

Si Kristen: «Huhaporseai ma tutu, ai ndang morgabus na mambahen buku on.» (Tit. 1, 2. Pang. 3, 14.)

Si Pananginangitongkin: «Denggan! dia ma pandokna?» *Si Kristen*: «Adong ma sada haradjaon, na so morudjung salelenglelengna; djala tarbahen hita do laho bongot tusi. (II. Petr. 1, 11. Jes. 45, 17. Joh. 10, 27—29.)»

Si Pananginangitongkin: «Lehet situtul Aha dope?»

Si Kristen: «Adong do disi tumpal hamuliaon, (II. Tim. 4, 8.) na sinimpan tu hita dohot badjubadju na ias djala na saksak (Pang. 3, 4—5,) djala angka na disi morsinondang songon mata ni ari.» (Math. 13, 43.)

Si Pananginangitongkin: «O, sonangna il mortua ma tutu angka na djumpang i.» Angkup ni aha dope?

Si Kristen: «Ndang adong be hamatean disi, ndang adong na rapar, ndang adong na tangis manang na marsak roha, ai Tuhan, nampuna luat, mangapusi ilu ni matanta, djala morholong ro-

ha do Ibana di nasida. (Jes. 25, 8. Pang. 7, 16; 21, 4.>)

Si *Pananginangitongkin*: «Ise do donganta muse disi?»

Si *Kristen*: «Rap morpungu ma hita disi dohot surusuran Cherubim dohot Seraphim, angka na morsinondang songon bualan na tiur, (Jes. 6, 2; I Thes. 4, 16. 17.) pola so tartaon mantanta mamereng ibana. Padjumpang ma hita disi dohot torop na morriburibu angka naung djumolo laho sian hita tu inganan i; ndang adoŋg be diŋi na morbadaŋ, holan na masihaholongan nama di bagasan habadiaonna, djala mordalani nasida di djolo ni Debata, djonok di lambungna i salelenglelengna. Sadanari: disi ma idaonta angka sintua, mamangke tumpal mas (Pang. 4, 4.) dohot angka na morbadju, morhasapi mas na morsampulu tali (Pang. 5, 8--14; 1--5.) Djala idaonta ma angka na mate Martir, angka na manaon haporsuhon di tano on na djolo, ai ditallihi, diponggoli, djala ditutung halak portibion do nasida tu api na morsi-gorgor, dilehon deba panganon ni binatang, manang didabu tu laut, ala so dihaolongi nasida portibion; ai Tuhan nampuna luat i do dihaolongi (Joh. 12, 25.) Saluhutna halak na disi hündul morsonangsonang djala morpahean, na so olo sego ro di salelenglelengna.» (II Kor. 5, 2. 3. 5.)

Si *Pananginangitongkin*: «Saluhutna na hubege i sian ho, mansai dengen; las rohangku dibahen. Alai tutu do dopot i, djala tarbahen hita mandjalo bagian sian i?»

Si *Kristen*: «Tuhan na mangaradjai luat i, naung mandok di bagasan bukuna (Jes. 55, 1. 2; Joh. 6, 37.) hahomion i, songon on: Molo sian nasa roha mangalului djala mangkaholongi, sai lehononna do i sude, sian asi ni rohana.»

Si *Pananginangitongkin*: «Tole ma ale pedan! mansai las rohangku umbege barita i; humatop ma hita mordalan.»

Si *Kristen*: «Di rohangku pe naeng do hatop hita mordalan nian, alai ala ni siporsanon na di abarangkon, gabe ngernger.»

Didok nampuna djamita on: Dung sun nasida mangkatai, djonok nama nasida tu sada inganan na gamboon na morgoar: «*Si Ganggu ni roha ala hasusaan.*» Madabu ma nasida tusi, mullop-lonong, morgambogambo manang sadia leleŋg. Djala ala dokdok ni siporsanon ni *Si Kristen*, naengnaeng lonong ma ibana tu gambo i ro di toru.

Si *Pananginangitongkin* mandjou: «Ale pedan! didia do hita nuaeng?»

Si *Kristen*: «Ndang huboto be manang didia hita nuaeng ale pedan!»

Si *Pananginangitongkin*: Dung dibege hata ni *Si Kristen*, marsak ma rohana, djala muruk mandok tu ibana: «Songon on do pangalaho ni hasonangan na pinaboami andorang na mordalan i hita?» Molo songon on susa mordalan di bonana, lam beha ma

tu udjungna, nda lam tu susana ma? Molo tarbahren ahu malua sian on djala mangolu mortua do ahu.»

Dung sur didok *Si Pananginangitongkin* hatana i, dipagogo ma dagingna dua hali lompit, paluahon ibana sian gambo i tu darat manudju dalan, mulak dompak bagasna i. Djadi mulak ma ibana tutu, ndang be diida *Si Kristen* ibana.

Dungi tinggal ma sasada *Si Kristen*, mullop lonong di gambo i; dungi dipangke ma gogona laho tu na sambaribanari, lam holang sian djabuna i, lam djonok tu pintu na sompit i (di bagasan porniahapan pe *Si Kristen*, dipaholang do ibana sian bagasna i.) Alai diundjuni pe paluahon dirina, hape ndang tarbahensa malua, ala ni siporsanonna, na dokdok, na di abarana i.

Didok nampuna djamita on: huida ma di bagasan nippingku, ro ma sada halak djonok tu lambungna, na morgoar *Si Pangurupi* (i ma bagabaga ni Debata,) dungi disungkun ma ibana: «Morhua ho disi?»

Si Kristen mangalusi: «Na disuru sada *Si Porbaritauauli* do ahu, ale tuan, laho tu pintu na sompit an, asa hatop malua ahu sian uhum na naeng ro i, djadi laho ma ahu, gabe lonong ma ahu di gambo on.»

Si Pangurupi: «Boasa so dibereng ho tangkas manang dia sidegchonon ni totmu (i ma bagabaga ni Debata!)

Si Kristen: «Ala ni biarhu maporus, mangalului dalan na djumonok, hape gabe madabu ahu tuson.»

Si Pangurupi: «Lehon ma tanganmu!» djadi ditait ma *Si Kristen* sian i, dipahundul ma ibana tu darat djala didokkon ma ibana mandatdati mordalan (Ps. 40, 3).

Didok nampuna djamita on: Dung huida songon i, laho ma ahu mandapothon na mangurupi *Si Kristen*, dungi hudok ma: «Molo songon on dalan sidalanan sian huta hamagoan i, laho tu pintu na sompit i, boasa so dipauli gambo lisop on, asa tarbahren angka na mordalan sahat tusi sian sonangna?»

Dung i didok *Si Pangurupi* ma tu ahu: «Taringot tu inganan na gamboon on, ndang tarbahren sahali papirhon, ai ambar on panduduran ni na rotak do, (dosa i do mandjadihon i) na mabaor sian saluhut halak na mananda dosana; ala ni digoari inganan on gambo (ganggu) ni roha, (porhaporseaon na so hot dope madabu tusi) ai disi do ditanda halak hahoholangna sian Debata, gabe tarsunggul ma biar ni rohana, roha na ganggu dohot gale ni haporseaon. Pangkilalaan sisongon i ma, na morpungu di inganan on, ala ni salangka dalan on gabe rotak. Alai ndang nian sian lomo ni roha ni Radja i dalan sisongon on roa (Jes. 35, 3. 4. 8); nunga 1800 taon lelengna diula angka naposona, padengganhon dalan i anggiat tung tarbahren denggan. Huboto do, nang diusehon tano 20 loksa hureta na gok tuson, djala nunga mor-

riburibu pangadjaran, angka na denggan, angka na binoan sian ganup luat ni tano on manggohi nian, (djala nunga didok angka na tuatua na mangantusi: «Ingkon ulaula na sumurung i do pangkeon padengganhon i) alai anggo gambo i laos tong do songon i, (roha na hurang) djala nunga godang susa na paulihon i, alai laos tong do songon i nuaeng.»

Adong do nian hata sian Tuhan i mandokkon paulihon sidegedegean ni pat di tongatonga ni gambo i (bagabaga ni Debat), alai di na ro taon udan gabe malala ma gambo i; dihungkupi ma angka sidegedegean i, djala molo so tangkas dibereng halak sidegedegean i, gabe singgip didegehon, gabe tinggang djala madabu tu bagasan gambo i ala moror diida. (1. Sam. 12, 21) Alai molo tung masuk tu pintu na sompit i, denggan do tano i bolusonna.»

Didok nampuna djamita on: huida di bagasan nippingku. Dung sahat *Si Pananginangitongkin* ro di bagasna i, ro ma angka dongan sahutana i, mornida ibana, huhut mandok: «I ma, nda na bisuk ma ho, ai olo ho mulak!» Alai na deba mandok: «Pe! ho na oto, dipaihutihut ho do hasusaan ni *Si Kristen*.» Na debanari mandok: «Pe! Ho porbiar! anggo hami, tung sura hupungka hami mangula inanang aha, ndang olo hami sumurut ala ni hasusaan satotik. Djadi gabe maila ma *Si Pananginangitongkin* rap hundul dohot angka nasida. Dung pe lam lelung, asa so maila saor; djala di udjungna rap manginsahi ma nasida tu *Si Kristen*. Songon i ma pangalaho ni *Si Pananginangitongkin*.

2. Maliluon, solsol ni roha dohot hamumulak ni Si Kristen.

Dung i mordalan ma *Si Kristen* sasadasa di adaran i, djadi diida ma, adong sada halak na ro sian na dao mamolus ibana di tongandalan i. *Si Bisuk--morroha--tano--on* do i, sada halak na sangap, na ro sian huta: «Angkal morroha sibuk,» i ma sada huta na balga, na di lambung ni huta ni *Si Kristen*. Ai ala naung sange tarbortik pordalanan ni *Si Kristen*, humaliang huta i, gabe dohot ma *Si Bisukmorrohatanooon* umbotosa. Djadi dung diida *Si Kristen* mordalan morhoihei djala morhosagodang huhut susa, dilului ma bisuk, asa tarbahensa mangkatai dohot *Si Kristen*.

Nirna *Si Bisukmorrohatanooon* ma: «Laho tú dia do ho ale pedan, mamorsan siporsanon na dokdok i?»

Si Kristen: «Olo! mansai dokdok na huporsan on, ndang adong dope djolma mamorsan songon dokdok ni on. Alai ala disungkun hamu, ale tuan, manang laho tu dia ahu, djadi hupaboa

ma tu hamu: «Na mordalan tu pintu na sompit i do ahu, ai adong do *Sada*, na mandok tu ahu: Disi do begeonku barita, na paboahon dalan laho mambolongkon siporsanon on.»

Si Bisukmorrohatanoon: «Adong do djolmam dohot anak-konmu?»

Si Kristen: «Adong do: alai, ala ni siporsanon on, gabe so tarbahren ahu be rap morlas ni roha rap dohot nasida songon na sai laon, gabe songon na so mordjolma djala na so morianakkon nama ahu di rohangku.» (1 Kor. 7, 29).

Si Bisukmorrohatanoon: «Molo ditangihon ho ahu, hudok ma tu ho sada sipodaon na dumenggan.»

Si Kristen: «Molo denggan di rohangku, olo do ahu, ai na mangalului adjar na denggan do ahu.»

Si Bisukmorrohatanoon: «Anggo di rohangku, dumenggan hatop bolongkon sibaoanomu na dokdok i, ai i do na mangodot-hon ho, gabe ndang tongtong roham, djala ndang tarbahren ho mambuat las ni roha sian angka na denggan dohot pasupasu na nilehon ni Debata tu hita.»

Si Kristen! «I ma tutu; sai hulului do dalan mambolongkon, alai ndang tarbahren ianggo marhitehite ahu sambing, djala angka donganku sahuta pe, ndang tarbahren nasida mambolongkon i sian abarangkong. Ala ni do umbahren na ro ahu tu dalan na gogot on, songon naung hupaboa i tu ho, asa malua ahu sian siporsanonkon.»

Si Bisukmorrohatanoon: «Ise na mandokkon ho ro tuson, asa malua ho sian sibaoanonmi,» ninna?

Si Kristen: «Ro do sahalak mandapothon ahu, halak na mormulia, djala molo so lupa ahu, *Si Porbaritanauli* do goarna.»

Si Bisukmorrohatanoon: «Pe! na roa ma halak sisongon i. (Direhei bisuk ni roha tano on do adjar ni *Si Porbaritanauli*.) Nandang adong dalan di tano on, na sumusa dohot na umporsuk, sian na pinatuduhonna i tu ho, sai na ahaponmu do i molo diihuthon ho na nidokna i. Nunga huida tandana di ho, ai nunga bongot ho tu hasusaan i; ai sap gambo ganggu ni roha ho huida, djala i do hasusaan pordjolo ni angka pordalan tusi. Tangihon ma na hudok, ai tumua do ahu sian ho, hupaboa ma angka na djumpang ho disi: Porsahiton, halodjaon, haraparon, djea, porsaema-raon, singa, naga, na holom, angkup ni udjungna hamatean; djala ise ma umboto dope manang aha mangonai tu ho disi. Sude na hupaboai tutu do i, ai lan do panindangi taringot tu sintong ni i.»

Si Kristen: «E! ale tuan, sumusa do siporsanon on sian su-de na pinaboam i, (i ma tanda ni roha na mangkilala dosana.) Su-de na pinaboami ndang pola huhabiari molo dung malua ahu sian siporsanonku.»

Si Bisukmorrohatanoon: «Beha pormulaanna, umbahren dibo-

to djala dihilala ho siporsanonmon?»

Si Kristen: «Dung hudjaha buku na di tanganhon!»

Si Bisukmorrohatanoon: «Tutu, i ma songon na nidok ni rohangku dung huida ho; masa di ho songon naung masa tu halak na oto na asing, angka naung mandjaha hata na simo djala na dokdok, na so diantusi rohana; dung i mamintor gabe guga rohanā i. Nda guga ni roha sisongon i na mangagohon bangko ni djolma hian (songon ho huida)? Alai nang pe songon i, disurukkon do uluna tu bagasan hasusaan i mangalului na so binotona.» (*Si Bisukmorrohatanoon* ndang mangalcas sonang halak mandjaha hata ni Debata.)

Si Kristen: «Huboto situtu do manang aha na hulului, on do: Haluaon sian siboanon na dokdok on do.»

Si Bisukmorrohatanoon: «Boasa ma dilului ho hasonangan sian dalan na porsuk? Nunga torop halak morhasusaan disi, dohot ho muse susa. Pangerger ma i djolo; tangihon ma na hudok, asa hupatuduhon tu ho dalan tu na niluluanmu, dalan na so morhasusaan; djonok do pangurupina, singkat ni haporsuhan naung tinaonmu, hasonangan do mamintor dapot ho, aleale pe djumpang ho, nang las ni roha.»

Si Kristen: «Olo ale tuan! urupi ahu, papatar ma angka na buni tu ahu.»

Si Bisukmorrohatanoon: «Denggan! disan, di bagasan huta na morgoar: *Pambahenan na denggan*, moringan sada halak na sangap, na morgoar *Si Patik*; i ma sada halak na denggan situtu, na malo mangurupi djolma, paluahon sian siporsanon na dokdok i songon na di ho on. Nunga torop halak, naung niurupanna, huboto; ai diboto do pamalum angka sitok ulu, ala siboanonna. Tu ibana ma ho tama hatop laho, asa diurupi ho. Djonok do djabuna i sian on, sada paal do daonna. Molo tung so disi ibana, adong do disi anakna na denggan morroha, na morgoar: «*Sibotoadat*.» Malo do ibana mangurupi, songon amana. Disi ma djumpang ho haluaonmu sian siporsanonmu. Molo so lomo roham tu ingananmu hian (di rohangku unang,) disi ma ho. Suru ma mandjou djolmam dohot anakkonmu, ai godang do disi angka bagas na rumar; i ma seo sada. Taringot tu sipanganon, godang do disi djala mura; tarbahren ho do mangolu disi djala sonang; djumpang ho ma huhut disi angka aleale na denggan na umboto adat.» (*Si Kristen* hona hail ni *Si Bisukmorrohatanoon*.)

Didok nampuna djamita on: Djongdjong ma *Si Kristen* satingkin morpingkir: Molo tutu do na nidok ni halak on tu ahu, tama do huihuthon na nidokna. Dung i dipahusor ma bohina dompak tuan i, manungkun: «Ale tuan, dia do dalan manopot tuan na denggan morroha i?»

Si Bisukmorrohatanoon: «Diida ho do dolok na timbo an?» (*Dolok Sinai*.)

Si Kristen: «Olo ale tuan!»

Si *Bisukmorrohatanoon*: «Ihuthon ma dalan, na dompak dolok i; bagas na pordjelo djumpang ho, i ma bagasna!»

Dipaboa nampuna djamita on: Mulak ma Si *Kristen*, mameol dompak djabu ni tuan *Patik*, asa diurupi ibana; alai dung djonok ibana tu dolok i, dibereng ma, mansai timbo djala djomba dompak uluna di lambung dalan i, djadi mabiar ma Si *Kristen*, atik tung beha ditipa maon uluna i. Ala ni moradian ma ibana, mago ma huhut pingkiranna; gabe lam tamba ma dokdok ni sibonanonna i. Ruar ma huhut hilap dohot api sian dolok i, gabe lam mabiar ma Si *Kristen*, atik beha gor ibana (Ex. 19, 16. 18). Dungi angka dotdot ma Si *Kristen*, hir ma hodokna (Heber 12, 21). Nuaeng pe asa disolsoli rohana, ala dioloi adjar ni Si *Bisukmorrohatanoon*. Di na djongdjong i Si *Kristen*, diida ma muse Si *Porbaritanauli* i ro, mandapothon ibana, gabe maila ma Si *Kristen*; muruk ma huhut Si *Porbaritanauli* i manungkun, gogo ma suarana mandok: «Aha do binahenmu tuson ale *Kristen*?» Alai ndang diboto Si *Kristen* be mangalusi, tarhatotong sambing nama ibana. Dungi disungkun Si *Porbaritanauli* ma ibana muse, ninna ma: «Ndada ho na hudapot tangistangis di balian ni huta hama-goan i?»

Si *Kristen*: «Olo tuan, au do!»

Si *Porbaritanauli*: «Nda nunga hupaboa tu ho dalan laho tu pintu na sompit?»

Si *Kristen*: «I ma tutu, ale tuan.»

Si *Porbaritanauli*: «Antong, songon dia do umbahen songon i hatop ho mulak tuson?» Ai nuaeng nunga di dalan na asing ho.

Si *Kristen*: «Dung malua ahu sian Gambo ganggu ni roha i, padjumpang ma ahu dohot sada tuan; ibana do manglekelekek ahu, mandekkon ahu laho tu huta, na di djolonta on, asa malua ahu, ninna, sian sibonanonkon.»

Si *Porbaritanauli*: «Ise do halak i?»

Si *Kristen*: «Songon na ture do nian rupana idaon, godang do hatana tu ahu; ala ni ma umbahen ro ahu tuson. Alai, molo hubereng dolok i, naeng djomba tu dalan, djadi hatop ma ahu moradian, asa unang ditinggang ulungku.»

Si *Porbaritanauli*: «Aha dope didok tuan i tu ho?»

Si *Kristen*: «Disungkun do ahu, manang na laho tu dia ahu; gabe hupaboa tu ibana.»

Si *Porbaritanauli*: «Aha dope didok tuan i?»

Si *Kristen*: «Disungkun do manang adong djolmangku dohot anakkonku, dungi hupaboa tu ibana. Alai hudok: ala ni sipor-sanonkon, na di abarangkon, ndang lomo rohangku be morlas ni roha dohot nasida songon na sailaon.»

Si *Porbaritanauli*: «Dung sun i, aha dope?»

Si *Kristen*: «Diadjari do ahu, asa hatop ahu malua sian siporsanonkon. Dungi hualusi ma: I do na hulului, umbahen hudadatati dompak pintu na sompit i, mangalului pangurupion; djadi didok do: patuduhononna tu ahu sada dalan na dumenggan djala na sumonang, ndang pola songon hasusaan ni dalan tu pintu na sompit i, ninna. I ma umbahen laho ahu tuson. Ai dison do djumpnng ahu, ninna, na malo paluahon ahu sian siporsauonku. Djadi huhaporseai ma hatana i, gabe tuson ma ahu, tu haliluon on, mangalului pangurupion. Asa dung sahat ahu tu inganan on, naeng mornida sude pangalaho, na masa dison, hape hamagoan do. Dungi so ma ahu, asa unang ahu mago; mago ma dohot pingkiranku; ndang huboto be manang aha sibahenonku.»

Si *Porbaritanauli*: «Djongdjong ma ho hatop, asa hupaboa tu ho hata ni Debata.» Dungi djongdjong ma Si *Kristen* huhut angkadotdot.

Ninna Si *Porbaritanauli* i ma: «Ingot ma hamu, unang lupa hamu di Debata na mandok: «Molo so malua angka na djolo, na mandjua di na mangkatahon hata ni Debata udju di tano on; lam hita ma tung malua molo itatundalhon na sian banuagindjang i?» (Heber 12, 25.) Angkup ni muse: «Mangolu do sogot na tigor sian haporseaon; alai anggo dipasurut do ibana, ndang lomo rohanku di ibana» (Heber. 10. 38). Saluhut hata on dilinsingkong tu Si *Kristen*: «Ho halak na morlodjong tu hamagoan! ho do na morbalik sian Tuhan, na sangap i; dohot patmu, nunga manimbil sian dalan hangoluan, naeng mandege tu dalan hamagoan.»

Dungi tinggang ma Si *Kristen* tu djolo ni patna, huhut morhoi mandok: «Nunga mordosa ahu, ala mago pangkirimon ni rohangku.» Alai pintor asi do roha ni Si *Porbaritanauli* i di ibana, ditogu ma Si *Kristen* pahehehon; dungi didok ma: «Saluhut ragam ni dosa dohot haotoon, nunga disesahon tu djolma i!» (Math. 12, 31). «Unang ho ganggu sai porsea ma» (Joh. 20, 27). Dungi sumonang ma otik roha ni Si *Kristen*; alai laos tong dope angkadotdot di djolo ni Si *Porbaritanauli* i.

Ninna Si *Porbaritanauli* i dope: «Tangihon ma nuaeng sian ringkot ni roham, djala pabongot tu roham angka hata, na naeng paboaonku tu ho. Hudok ma nuaeng tu ho: Ise do tuan i na patootohon ho? Djala tu ise ho didokkon laho? Halak na padjumpang i dohot ho, i ma: Si *Bisukmorrohatanon*; tama do i antong goarna, ai poda habisuhon ni tano on sambing dihalomohon (Joh. 4, 51). Molo ro tu garedja, tu garedja ni *Sibotoadat* do laho, djala adjarra i dihamalohon, ai sumonang do ibana, ninna, morhitehite hatigoran handiri asa morhithite hatigoran na asing (Gal. 6, 12); ala ni sai dilului do palipehon dalanku na tigor i. Ala na tolu mansam on, umbahen tama hasogohononmu halak i:

1. Ala naung dililuhon ho sian dalanmu.

2. Dililuhon ho, asa morlea di roham silang ni Kristus.

3. Djala dililuhon patmu tu dalan na mamboan ho tu tohonan hamatean. (II. Kor. 3, 7. 9.) Dibahen i pordjolo: Ringgas ma ho mambolongkon adjar ni Si *Bisukmorrohatanoon*, djala hasogohon sambing rohana i; unang ihuthon adjarna i, ai manadingkon Debata do sisongon i. Dipapeol Si *Bisukmorrohatanoon* do poda ni Debata, ai Tuhanta i mandok: «Bongoti hamu ma pintu na sompit il» (Luk. 13, 24). (i ma pintu na hudokkon topotonmu,) ai pintu na sompit i do hamasuhan tu hangoluan saleleng lelelengna, djala otik do halak na djumpangang i (Math. 7, 13. 14). Sian pintu na sompit i dohot dalan na gogot, na hudok i, ho dililuhon halahi; na-eng madabu ne ma ho tu bagasan dalan hamagoan; dibahen i hasogohon ma ibana, djala solsol roham, ala dioloi ho hatana il»

Paduahon: Sai hosom ma roham di pambahenan ni Si *Bisuk* i, ala pinabongotna tu roham poda, na paleahon silang ni Kristus; dibahen i porhamaol ma silang i, ummaol sian hamoraon ni Misir; (Heber 11, 25. 26) ai Tuhan, na sangap i pe, nunga didok, nang tu ho: «Manang ise na morhamaolhon hosana, na mangagohonsa do, manang ise na humolong roha di amana, inana, hahaanggina, ibotona, ndang tarbahen i gabe siseanku» (Mark. 8, 35; Joh. 12, 25; Math. 10, 39; Luk. 14, 26). Dibahen i hudok tu ho: Manang ise na manglelekelek ho, mandok: Dalan na pinorsilang i, dalan hamagoan do i; hasogohon ma poda sisongon il»

Patoluhon: «Tama ma ho maila, ala diodjakkon ho patmu tu dalan hamagoan i. Ai timbang ma di roham, tu ise ho disuru? djala ndang tarbahen i paluahon ho sian siporsanonmu.»

«Halak, na di dolok, mandokkon: ho laho tusi, mangalului hasonangan, i ma Si *Patik*, anak ni sada boruboru na di porhatobanan, gabe hatoban sude angka anakkonna; (Gal. 4, 21—27) i do tudosan ni dolok *Sinai* na hinabiaranmu, manipa ulum; alai molo di porhatobanan do boruboru i, boasa dipangido roham ho gabe halak mortobus binahen ni?» Dibahen i: «Si *Patik* i ndang tarbahen paluahon ho sian siporsanonmu; nang pe nahinan, ndang adong na pinalua ni nanggo sahalak sian siporsanonna, ai ndang tarbahensa, (Rom. 3, 20—28) ai ndang adong diboto Si *Bisukmorrohatanoon* i. Djala tuan *Patik* pe, halak porgabus do i; anakna *Sibotoadat* i pe paotootohon do; rupana nian songon na lehet, alai morroha busuk do djala pangansi. Sasudena i, ndang tarbahensa mangurupi ho; alai mangaliluhon ho sian dalan hangoluan tu tohonan hamatean, sian dalan na hupatuduhon tu ho udju i, i do ringkot ni rohanasida.»

Dung sun i didok Si *Porbaritanauli*, gogo ma didjouhon dompak gindjang mangidohon, asa diporgogoi Tuhan i hatana i. Tongkin i ruar ma sada soara dohot api sian dolok i dompak inganan

ni Si *Kristen*; dung i manindang ma imbuluna, ala ni biar ni rohana. Songon on do didok soara i: «Manang piga, na mangihuthon uhum ni patik, hona bura do! ai nunga tarsurat: Hona bura do nasa na so mangihuthon na nidok ni patik.» (Gal. 3, 10.)

Didok nampuna djamita on, songon na mate sambing ma pangkilalan ni Si *Kristen*; dipunga ma tangis huhut mangandung sosombopon, huhut manolsoli rohana; diburai ma dirina, ala padjumpang ibana dohot Si *Bisukmorrohata noon*, diulahulahi ma mandok, maoto ibana ala diihuthon adjarna i. Maila do ibana, molo diingot adjar ni Si *Bisuk* i, na tubu sian roha sibuk sambing djala dibuat rohana, pola manundal ibana sian dalan na tigor i. Dungi didok ma tu Si *Porbaritanauli* i sude angka hata na tarsurat di toru ni on:

Si *Kristen*: «Beha di roham, ale tuan, adong dope sihirimonku? Tarbahen ahu dope mulak tu dalan na sompit i? Nandang tagamon tulahonna manang leleanna ahu? Gabe maila, ala huihuthon dalan ni Si *Bisuk* i? Sesaonna do dosangu?»

Si *Porbarita* na uli: «Mansai balga do dosam; dua hadjahaton salam: Nunga ditadingkon ho dalan na denggan, djala laho ho tu dalan na nioraan; alai nang pe songon i, djalo on ni halak na di pintu i do ho, ai denggan do rohana tu sude djolma. (Diapuli Si *Porbaritanauli* i roha ni Si *Kristen*). Alai ingkon ingot situtu ma ho, unang mulak tu dalan na djahat i, asa unangmago ho di sidalanamu.» (Ps. 2, 12.)

Dung sun i, morhobas ma Si *Kristen* naeng mulak; djolo diumma Si *Porbaritanauli* i do ibana sian holong ni rohana huhut didok: «Hipas ma ho di dalan sidalanamu.» Dung i mordalan ma Si *Kristen* mansai hatop, ndang olo ibana mangkatai dohot manang ise di dalan i; nang pe dipangkulingi halak ibana, ndang dialusi; dung i mordalan ma ibana songon pangalangka ni halak na mabiar, laho maporus sian tano na nioraan ni halak idaon. Ninna rohana: Nandang djumpangan hasonangan iba, molo so djolo sahat tu dalan naung tinadingkonna i, ala mangkatai ibana dohot Si *Bisukmorrohata noon*.

3. Masasahat ni Si Kristen tu pintu na sompit dohot hamamasuk- na tusi.

Nandang sadia leleng sahat ma Si *Kristen* tu pintu i, alai di djolo ni pintu i, tarsurat do hata on: «Tuktuhi hamu ma, asa diungkap di hamu» (Math 7, 7). Dung i dituktuhi ma manang piga hali huhut mandok: «Tarbahen ahu do masuk, adong dope sihirimon?»

Nang pe halak pordosa ahu, ungkaponna ma?
Molo unkap di ahu na mordosa on
Pudjionku ma Tuhan na morasiroha.»

Di udjungna, ro ma sada halak na tuatua tu pintu i, na morgoar Si *Ringkotmangurupi* (roha na ra) huhut manungkun: «Ise do di balian? Sian dia do ho? aha naeng di ho?»

Si *Kristen*: «Ahu do on, na mangusung saporasan dosa na dokdok, ahu na ro sian huta hamagoan djala na naeng laho tu dolok Zion. Nuaeng pe, molo adong asi ni roham ale tuan, pabongot ma ahu.»

Si *Ringkotmangurupi*: «Morasi ni roha do ahu sian nasa rohangku.» Dungi hatop ma diungkap pintu i (Jes. 66, 2; Ps. 10, 17; 34, 7; 66, 18—20).

Asa di na naeng bongot Si *Kristen* tu bagasan, ditiop Si *Ringkotmangurupi* ma ibana. Dungi didok Si *Kristen* ma: «Dia do astuan ni?» Dungi dialusi Si *Ringkotmangurupi* ma: «Ndang pola sadia dao sian on, djongdjong sada benteng na togu. Disi do Si Beelsebul, sintua ni angka sibolis i, mangaradjai, sian i do ibana rap dohot naposona maniorhon sumbia (Eph. 6, 16). tu angka na ro tu pintu on, naeng mamunu, andorang so masuk tu pintu i.» (Naeng bunuon ni Sibolis i roha na ra, ai ndang lomo rohana bongot halak tu pintu na sompit i).

Ninna Si *Kristen* ma: «Las do rohangku,» huhut angkadot-dot. Asa dung bongot Si *Kristen* tu bagasan, disungkun Si *Ringkotmangurupi* ma ibana: «Ise patuduhon tu ho dalan ro tuson?»

Ninna Si *Kristen* ma: «Si *Porbaritanauli* paboahonsa umbahen ro ahu tuson manuktuhi pintu i, songon na hubahen nangkin, ai songon i do didok tu ahu; asa ho do, ale tuan, paboahon tu ahu manang aha na tama sibahenonku.»

Ninna Si *Ringkotmangurupi* ma: «Nunga mungkap pintu i di ho, djala ndang tarbahen manang ise mangkinsu i» (Pang. 3, 18).

Si *Kristen*: «Mamangka las rohangku nuaeng ala ni saluhut hasusaan dohot halodjaon angka naung hutahan.»

Si *Ringkotmangurupi*: «Dia do alana, umbahen sasada. ho ro tuson?»

Si *Kristen*: «Ala so adong sian angka donganku sahuta, na mangkilala djecana songon na huhilala on.»

Si *Ringkotmangurupi*: «Adong do sian halak i, na umboto harorom tuson?»

Si *Kristen*: «Olo! djolmanku dohot anakkonku pordjolo mornida ahu mordalan; djala didjou nasida do ahu mandokkon mulak. Angka dongan pe adong do, na mandjoudjou sian pudingku, laos mandokkon mulak nian; alai husongsong do pinggolhu dohot djaridjaringku, dungi mordalan ma ahu mangihuthon dalan on.»

Si Ringkotmangurupi: «Ndang adong na mangihuthon ho manogihon ho mulak?»

Si Kristen: «Olo, adong do *Si Djogal* dohot *Si Pananginangitongkin*. Alai dung diida nasida ndang olo ahu margihuthon, mulak ma *Si Djogal* djala dielesi ahu; *Si Pananginangitongkin* do mangihuthon ahu satongkin.

Si Ringkotmangurupi: «Boasa so tolhas ho diihuthon?»

Si Kristen: «Rap mordalan do hami ro di inganan gambo (ganggu ni roha), gabe madabu ma hami tu bagasan i, djadi mudjat ma roha ni *Si Pananginangitongkin*, ndang barani be duma; alai manggundjal ma ibana muse sian gambo i, laho mulak dompak dalan tu djabuna, huhut mandok: «Lului ma luat hasonangan i morhite sian gomosmu, mulak ma anggo ahu,» dungi laho ma ibana tu dalanna i, mangihuthon dalan ni *Si Djogal*. Ahu pe mordalan ma ro di pintu on.» (Torop do djumpang dongan mordalan di dalan na tu banuagindjang, alai holan sadasada do na tolhas tusi di udjungna).

Si Ringkotmangurupi: «Magoponai bawa i, tung tama ma pingkiranna, metmet manang otik, hamuliaon godang na di banuagindjang i? Nandang olo ibana djolo manaon hasusaan asa dapotan upa muse.»

Si Kristen: «Tutul tutu do, ale tuan, alai beha ma pandjamitahonku taringot tu *Si Pananginangitongkin*, ai ndang barani ahu mandok godang hata taringot tu ibana, ala so tarpatongtong ahu mandalani dalan na tigor i (*Si Kristen* manopoti dosana tu halak na di pintu na sompit i). Tutu nunga mulak *Si Pananginangitongkin* tu djabuna, alai ahu pe nunga sumurut djala mordalan tu dalan hamagoan, mangoloi elekelek ni i *Bisukmorrohatanoon*.»

Si Ringkotmangurupi: «E! nunga padjumpang ho hape dohot *Si Bisukmorrohatanoon*? Atehe, nda morhite haunduhon di *Si Patik* do ringkot ni rohana, mangalului hasonangan? I ma sidua halak sintua ni porgabus i! nunga diihuthon ho hape adjarna i?

Si Kristen: «Olo! nunga huihuthon sian nasa gogongku, pola laho ahu manopot tuan *Patik*; alai dung donok ahu di dalan mandapothon bagasna i, naeng marumpak do dolok i, naeng manipa ulungku; djadi mabiar ma ahu djala mansohot.»

Si Ringkotmangurupi: «Moruntung dope ho, ala malua ho sian panggopui ni dolok i, ai nunga torop naposo ni Debata dia-gohon i (Gal. 3, 10; 5, 4).»

Si Kristen: «Tutu do, ndang huboto manang aha na ro tu ahu, unang padjumpang ahu muse dohot *Si Porbaritanauli* i; dungi mabiar djala tarsonggot rohanku; alai sudena i, holan sian pangurupi ni Debata do, ia padjumpang pe ahu muse dohot ibana, ai aut unang i ndang tarbahren ahu sahat tuson.»

Si Ringkotmangurupi: «Ndang pola mahua i, ai ndang siida

bohi ni djolma Dabata, nang pe diulahon dosa na godang ndang sipabalion ibana, asal ma ro tuson» (Joh. 6, 37).

«Ala ni, ale *Kristen* na denggan, ro ma ho sângkidopnari, asa huadjarhon tu ho dalan sidalananmu: Tailihon ma dompak djolo, diida ho do dalan na gogot i? i ma sidalananmu, ai nunga diri i dibahen angka ompunta dohot angka panurirang dohot Tuhan Jesus Kristus ro di angka siseanna; i ma dalan na tigor i, songon na nirambuhon, i ma dalan i, tama sidalananmu.»

Si *Kristen*: «Ale tuan! ndang morlegotlegot dalan i manang morsirpang? Angka na so somal disi, ra lilu do, gabe laho tu duru? (Si *Kristen* mabiar lilu).»

Si *Ringkotmangurupi*: «Olo, godang do dalan na mordomu tu dalan on, alai lambas do i djala bengkuk. Asa diboto ho imbarna manang na sintong manang na lipe, on ma tandana: Dalan na sintong tigor do i djala gogot (Math. 7, 14).»

Ninna nampuna djamita on, huida ma: Sai dipangido Si *Kristen* i do asa malua ibana sian siporsanonna i, ai ndang tarbolongkon sasadasa i, molo so adong sahalak na mangurupi. (Nunga lodja Si *Kristen* mamorsan siboanonna i).

Si *Ringkotmangurupi*: «Taringot tu siboanonmi, pasabam ma roham, mamorsan djolo, paima sahat ro di inganan hadabuanna; madedekdek saming ma anggo disi sian abaram.» (Ndang tarbahen djolma mangurupi donganna paluahon sian dosana na dokdok i; nda holan morhitehite pasupasu ni mudar ni Kristus i) Ps. 49, 8. 9.

Dungi morhobas ma Si *Kristen*; dialithon ma hohosna laho borhat tu sidalananna i. Dungi didok Si *Ringkotmangurupi* ma tu ibana: «Molo dung holang otik ho sian pintu on, djumpang ho ma djabu ni tuan Si *Patoranghahomion*; dung sahat ho, tuktuk ma pintu ni bagasna i.» Dungi didok Si *Kristen* ma: «Selamat tinggal» tu alealena i djadi borhat ma ibana.

4. Si *Kristen* di sikola ni Si *Patoranghahomion*.

Dungi mordalan ma Si *Kristen* ro di djabu ni tuan Si *Patoranghahomion*, djadi dituktuhi ma djotdjot pintu i; dungi ro ma sahalak manungkun: «Ise do di balian i?»

Si *Kristen*: «Ahu do on, ale tuan, sipordalan na nidokkon ni sada tuan, naung tinanda ni tuan nampuna bagas on do, umbahen ro ahu tuson, asa mangkatai do taringot tu ahu; ala ni ma las rohangku padjumpang dohot tuan nampuna bagas on; antong laho ma mandjou tuan i. «Satongkiimari, ro ma nampuna bagas i mandapothon Si *Kristen* huhut manungkun: «Aha lomo

ni roham?» Didok Si *Kristen*: «Ale tuan! Na ro sian huta hamagoan do ahu naeng laho tu dolok Zion. Didok sada tuan, na mian di pintu pordjolo di dalan on tu ahu songon on: Molo sahat ho tusan, patuduhonon ni tuan bagas i do tu ho, angka poda na arga, na hasea tu ho di pordalananmon.»

Si *Patoranghahomion*: «Denggan bongot ma ho, asa hupatuduhon tu ho poda na hasea.» Djadi didokkon ma sada halak manggalahi *lilin*, (*nunga taruli na tiur* Si *Kristen*) djala didokkon ma ibana mangihuthon; djadi ditogihon ma ibana tu sada bilut. Asa dung diungkap pintu ni bilut i, diida Si *Kristen* ma sada gambaran ni sada halak na hundul morhusari; gambaran i gantung do di tiang. Songon on do pangalaho ni halak na di gambaran i: Matana manaili tu gindjang, di tanganna sada buku na denggan situtu, hata na sintong do tarsurat di bibirna, portibion do ditundali; pangalahona i huida songon halak na mangadjari djala mangelekelek do ibana (1 Kor. 5, 20), adong do sada tumpal mas gantung di atas uluna.

Si *Kristen* manungkun: «Sumansuman ni ise do on?»

Si *Patoranghahomion*: «Sumansuman ni pangadjari do i, djala sian saribu, sada do songon i (Hiob. 33, 23; Heber 12, 22) na tarbahensa mandok, songon na nidok ni Apostel: «Ai nang sampuluribu di hamu pangadjari morhitehite Kristus ndang piga anggo Ama, ai di bagasan Kristus Jesus do hamu hutubuhon morhitehite barita na uli (1 Kor. 4, 15). Hamu angka anakku angka na huae muse paima morrupa Kristus di bagasan hamu» (Gal 4, 19). Dung i muse, songon na niidam, matana i manaili dompok gindjang dohot buku na denggan i na di tanganna i dohot hata na sintong i na tarsurat di bibirna i, astuan ni i: Diboto do patangkashon angka hata hasimoon, na buni dope, tu angka halak pordosa; songon na niidam pangalahona djongdjong mamodai, djala mangelekelek djolma; djala portibion, na bidang i, di pudina, dohot sada tumpal mas na gantung di atas uluna i, i ma na patuduhonsa tu ho: Nandang diringkoti rohana hasiangan on; sai naeng moruli ibana sada tumpal mas sogot di banuagindjang (Pang. 22, 12; Rom. 5, 2). Hupatuduhon gambaran on djumolo tu ho, gambaran ni naposo ni Tuhan nampuna luat na naeng toptonmi do i; i ma na manogunogu ho di ragam ni hasusaan di pordalananmu, paima sahat ho tu inganan i. Ala ni, ingot ma saluhut poda na hudok i tu ho, djala pabongot tu roham sian angka na niidam, asa unang dioloi ho adjar ni na paotootohon ho di pordalananmu, angka na mandok: Togihononna ho tu dalan hatigoran, atik pe tu hamagoan angka dalannasida.»

Dung sun i, ditogu ma tanganna, manogihon ibana tu sada bilut na bidang djala na gok orbuk; ai ndang dung disapu halak

bilut i. Asa dung diranapi Si *Kristen* bilut i, didjou Si *Patoranghahomion* ma sada halak mandokkon, manapu bilut i, djadi disapu ma, gabe mortimburak ma sude orbuk i, pola so tartahan Si *Kristen* be, ai morbongotan do orbuk i tu aruaruna. Djadi didjou muse sada boruboru na morbadju mandokkon, mamboan aek mamispis bilut i; djadi dung dipispis, mura ma disapu djala ias titutu.

Si *Kristen* mandok: «Dia ma astuan ni?»

Si *Patoranghahomion* mangalusi: «Ia bilut on, tudosan ni roha ni djolma do i, angka na so dung dope pinaias ni holong ni roha ni Debata, na patar di barita na uli i. Dung i tudosan ni orbuk i, i ma dosa na tincan, hadjahaton di bagasan roha ni djolma, na pahodarhon sude djolma. Halak na manapu pordjolo i, mortudosan tu patik, djala boruboru na morbadju i, na mamboan aek pamispis i, mortudosan tu Si *Baritanauli* do i. Beha do diida ho di mulana manapu? Nda mortimbur do orbuk i, pola so tarbahen paiashon bilut i, ala ni angka orbuk i? I ma na patangkashon tu ho: Ianggo patik, ndang tarbahensa paiashon roha dohot manesa dosa, pagandahon do i balik dibagasan roha ni djolma, djala lami morgogo dosa i dibahen (Rom. 7, 9; 5, 20; 1. Kor. 15, 56). Tutu patik i do patandahon dosa djala mangorai unang mordosa, alai tung na so tarbahensa do mangalehon gogo manaluhon dosa i.»

«Djala songon na niidam muse, boruboru na mamispishon aek di bilut i, asa mura disapu, djala ias, tudosan ni: Molo ro barita na uli, na dame djala na denggan, djala na morgogo dibagasan roha ni djolma, songon na niidam: I do pagaburhon asa ambolong orbuk i sian bilut i, morhite sian aek na pinispishon ni boruboru i. Songon i do dosa i dohot galena, mura do ambolong, gabe ias ma tondi, djala rade tu inganan ni *Raja* na mulia i merhitehite barita nauli» (Joh. 15, 3; Eph. 5, 26; Rom. 16, 25. 26; Ul. Apost. 15, 9).

Didok nampuna djamita on, huida dope dibagasan nippingku: Ditogihon tuan Si *Patoranghahomion* i dope Si *Kristen* tu bilut na asing, na ummetmet, inganan ni dua dakdanak, na hundul be di karosi. Goar ni dakdanak na umbalga i: Si *Sangkaprohaportibion*, na umposo i: Si *Bengetroha*. Alai anggo Si *Sangkaprohaportibion*, ndang morlas ni roha, songon na muruk do. Si *Bengetroha*, homom idaon, djala sonang. Dung i disungkun Si *Kristen* ma: «Ala ni aha umbahen songon i muruk Si *Sangkaprohaportibion*?» Dung i dialusi Si *Patoranghahomion* ma: «Didok tuanna manang guruna: Paimaonna djolo satongkinnari; di taon na ro pe, lehononna tu ibana ugasan na denggan djala na hasea; alai pangidoan ni rohana: Naeng saonari nian sude. Olo do paimahon anggo Si *Bengetroha*.»

Dung sun i, huida, ro ma sada halak mamboan panuhuan,

na gok ugasan angka na denggan; diusehon ma i sude tu lambung pat ni Si *Sangkaprohaportibion* (*Sangkap ni roha portibion*, djumpangan lomo ni rohana, alai sude do dipansuasaeon). Dungi morlas ni roha ma Si *Sangkaprohaportibion* mambuat; diporengkeli ma huhut Si *Bengetroha*, ala so mandjalo ibana. Alai ndang sadia lelelg-nari, dibusbushon Si *Sangkaprohaportibion* ma sude barangna i, ndang adong tading di ibana nanggo saotik, nd? holan abit na buruk.

Didok Si *Kristen* ma tu tuan Si *Patoranghahomion*: «Patorang ma tu ahu taringot tu lapatan ni?»

Si *Patoranghahomion*: «Pangalaho ni dakdanak na dua i, tudosan do i: Tudos tu porrohaportibion na sada; tudos tu porroha banuagindjang do na sadanari. Si *Sangkaprohaportibion*, suman tu porroha tano on; Si *Bengetroha*, suman ni porroha banuagindjang do. Songon na niidam nangkin, morlas ni roha Si *Sangkaprohaportibion*, ala didjalo nuaeng di tano on: Songon i do porrohaon ni sude halak, na morroha tano on; angka na djumpangan arta na arga di tano on, ala so olo nasida paimahon di taon na ro di banuagindjang; ai disi do nian djaloonna bagianna na denggan situ-tu. Dison djumpang ma umpama ni angka na tuatua: «Agonan do sada pidong naung tiniop, asa sampulu pidong na habang dope.» Na nidok ni umpama i, i ma: Na rumingkot di rohana. Angkup ni, songon na niidam Si *Sangkaprohaportibion* mansuasaeon sude ugasanna; gabe holan ribakribak nama tading di ibana. Songon i do masa, di sude angka na morroha tano on.»

Si *Kristen*: «Nuaeng pe asa tangkas huboto: Dumenggan do tutu Si *Bengetroha*, di angka pangalahona, alana: Pordjolo: Olo ibana paimahon angka na denggan; paduahon: Olo ibana paimahon di tingkina, mandjalo hasangapon sian Tuhanna. Alai anggo Si *Sangkaprohaportibion*, ndang mandjalo be, nda holan angka burukburuk.»

Si *Patoranghahomion*: «Tutu do nidokmi, alai tama tambaanmu dope; i ma: hasangapon na di banuagindjang i, sidjaloon ni Si *Bengetroha* muse. Nandang morudjung be i, alai anggo hasangapon di tano on, tibu do mago.» (Angka na ummura djumpang, tumibu do mago, alai na ummaol djala na porpudi dapot, i do na hasea djala na tumongtong). Asa ndang tama porengkelan ni Si *Sangkaprohaportibion*, Si *Bengetroha* i, ala umpudi mandjalo angka ugasan na denggan. Suhar ni do muse masa; porengkelan ni Si *Bengetroha* i ma Si *Sangkaprohaportibion*, ai na mansohot do na pordjolo i, dung i pe mamangka ma na porpudi, djala ianggo i ndang olo be mansohot. Asa manang ise na mandjalo djumolo bagianna, adong dope tingkina pasudahon i; alai na umpudi mandjalo bagianna, i ma na tumongtong ro di salelelelelgna. Ala ni tarsurat do di *barita na uli*, taringot tu halak na mora i: «Ingot ma ale amang, na denggan, naung djinalom andorang di

ngolum, alai anggo Si *Lazarus* na bernit do didjalo, djadi tu hasonangan ibana nuaeng, sitaon na bernit nama anggo ho» (Luk. 16, 25).

Si *Kristen*: «Nuaeng pe asa huantusi: Hurang denggan do, molo holan angka na saonari talului, sipabengeton ma hape roha, maimaimahon na ro muse.»

Si *Patoranghahomion*: «I ma tutu, ai morudjung do angka na taida nuaeng, alai salelenglelengna do angka na so tarida i (II Cor. 4, 18). Tutu do i, hombar tu roha ni dagingta, angka na masa nuaeng, djala na hatop saor tu roha daging; alai anggo na naeng ro i, ndang djonok, djala ndang saor tu roha daging, ai dao do i di banuagindjang» (Rom 7, 15. ff Gal. 5, 16).

Didok nampuna djamita on, huida dope dibagasan nipingku: Ditiop Si *Patoranghahomion* ma muse tangan ni Si *Kristen* manogihon ibana tu sada inganan; inganan ni api na morsigorgor, na donok di lambung dorpi; djala adong do sada halak di lambung api i djongdjong, na mangusehon aek tongtong tusi, hape lam gorgor do api i, djala lam mohop, ndada olo mintop, atik pe dipantuaphon aek tusi.

Dung i didok Si *Kristen* ma: «Dia ma lapatan ni?» Si *Patoranghahomion* mangalusi: «Tudosan ni api on, i ma: Ulaon asi ni roha ni Debata, di bagasan roha ni djolma; haporseaon na sintong, i do mian disi manungguli. Angkup ni: Halak na mangusehon aek tu gindjang ni api i, na mangintopi nian, tudos tu Sibolis i do i. Hupatuduhon pe tu ho, manang ala ni aha, umbahen lam gorgor api i, nang pe diusehon tongtong aek tusi.» Djadi ditogihon ma Si *Kristen* tu balik ni dorpi i, djadi diida ma: Adong do sada halak, na maniop inganan, na morisi miak, huhut diusehon miak i tongtong tu api i.

Si *Kristen*: «Dia ma astuan ni i?»

Dung i dialusi Si *Patoranghahomion* ma: «I ma tudosan tu Kristus, na pahothon tongtong ulaon, pinungkana di bagasan roha ni djolma, morhitehite miak asi ni rohana; djala manang dia pe dibahen Sibolis i, anggo ulaon hagagoon ni Tuhan i, lam hot do di bagasan roha ni djolma» (2. Kor. 12, 9).

Diida ho do, halak na djongdjong di balik ni dorpi i, na mangusehon miak tongtong tusi, alai buni do dibahen; i ma na patandahon tu ho: Mansai susa halak, na hona pangundjunan ni Sibolis i, maol do tandaonna, balga ni asi ni roha ni Debata, na patogu haporseaon di bagasan rohana.»

Dung i didok nampuna djamita on: Huida, ditiop Si *Patoranghahomion* dope tangan ni Si *Kristen*, manogihon ibana tu sada inganan na denggan, hadjongdjongan ni sada bagas bolon, na uli situtu; djadi mansai lomo ma roha ni Si *Kristen* mamerengi. Angkup ni, diida ma torop, djolma djongdjong, mordalandalan di gindjang bagas i, angka na morpahean na djagar situtu, ai mas do i.

Dungi didok Si *Kristen* ma: «Djadi do masuk tusi?» Dungi ditogihon Si *Patoranghahomion* ma Si *Kristen* tu pintu ni bagas i. Ida ma! djongdjong halak torop, di lambung pintu ni bagas i, naeng masuk nian, alai ndang barani nasida bongot. Nandang sadia dao sian lambung pintu i, hundul ma sada halak di lambung medja, na manurathon goar ni angka na naeng bongot tu bagas i; tu sada buku disurathon. Djala diida Si *Kristen* ma: Adong lan halak, angka na djongdjong morsindjata, mandjaga di lambung pintu i, djala barani do nasida, maniham dohot manallih halak angka na naeng bongot. Djadi longang ma roha ni Si *Kristen* mornida i, ai sumurut be do angka na naeng bongot i sian biar ni rohanasida. Alai adong ma sada halak na barani, ro sian tongatonganasida, mandok tu *Djuaratulis* i: «Surathon goar-hul!» (i ma sada halak na morugama na togu situtu). Asa dung sun disurathon, morhobas ma djolma na gomos i, ditiop ma podangna, ditahulukkon ma ondingonding ni uluna, dungi ditahopi ma angka pordjaga i. Muruk ma angka pordjaga i, naeng ma tihamonna ibana, alai ndang mabiar bawa i; sai disaramahon ma podangna i, djala dipantallikkon tu siamun tu hambirang. Djadi mabugang ma angka pordjaga i, djala ditaluhon. Dungi bongot ma ibana tu bagasan bagas i (Math. 10, 38; Ul. Apost. 14, 22). Asa dung bongot ibana, tarbege ma soara ni porende, angka na mangendehon hata on:

«Masuk ma, masuk ma! sian nasa rohana,

Hasangapon di surgo i, i ma teanonna» (omoonna).

Songon i ma pangalaho ni hamamasukna; djadi morpahean ma ibana, songon pahean ni angka na nidapotna i. Dungi mengel ma Si *Kristen* mornida, huhut mandok: «Molo hurimpu, botoonku astuan ni i. Loas ma ahu nuaeng hatop laho.»

Si *Patoranghahomion*: «Paima djolo, hupatuduhon ma tu ho saotiknari, dung pe sun i asa laho ho mandalani dalan, sidalananmu.»

Asa dung i, ditogu ma Si *Kristen* manogihon ibana tu sada bilut, na holom situtu; inganan ni sada halak na tarhurung, di bagasan hurungan bosi. (hurungan bosi, i ma tudosan ni na so morpangkirimon). Manunggul roha asi, sian bagasan roha ni Si *Kristen* mornida halak na manungkap tu tano, djala na mamuhung tanganna, sian arsak ni rohana.

Si *Kristen*: «Dia ma astuan ni i?» Dung i didok Si *Patoranghahomion* ma: «Undjuni ma manungkun ibana.»

Dung i ninna Si *Kristen* ma tu halak i: «Ise do ho?» Dung i dialusi halak i ma: «Ndang songon na niidam nuaeng, pangalahongku na djolo.»

Si *Kristen*: «Beha pangolahom, ia na djolo?»

Na tarhurung: «Di pornidaanku diida halak na asing na djolo ture do, ai burdju do ahu mangihuthon ugama hakristenon

(Luk. 8, 13). Diporbaga rohangku, tarbahren ahu do masuk tu surgo, djala morlas ni roha, mandjalo bagian disi.»

Si *Kristen*: «Denggan, dia pangalahom ia nuaeng?»

Natarhurung: «Nunga tos pangkirimonku, anggo nuaeng, i do umbahen dihurungkon ahu, tu hurungan bosi on; ndang be tarbahren ahu malua.»

Si *Kristen*: Beha do pangalahona, umbahen bongot ho tu son?»

Natarhurung: «Ala so hura moti rohangku, djala lupa ahu mortangiang; lomolomo ni rohangku do huhut huihuthon; gabe mago ma porbinotoanku, na dapot ahu sian haťa asi ni roha ni Debata. Nunga huarsahi Tondi Porbadia; ala ni maporus Ibana sian ahu. Huelekelek Sibolis i, gabe ro tu ahu. Hurimasi Debata, ala ni ditinggalhon ahu; hupadjogal rohangku, umbahen so tarpauba ahu be.»

Dung i disungkun Si *Kristen* ma tu tuan Si *Patoranghahomion*: «Ndang adong be pangkirimon di halak na songon on?» Dung i didok Si *Patoranghahomion* ma: «Tu ibana sambing ma sungkun!»

Si *Kristen*: «Ndang adong be pangkirimon di ho? Djala laos tinggal di hurungan bosi on nama ho salelenglelengna, djala nunga tos pangkirimonmu?»

Natarhurung: «Olo, ndang be tarbahren ahu haruar.»

Si *Kristen*: «Boasa, ndang diboto ho: Anak ni Debata, si pudjion i, porasi djala porholong roha do Ibana?»

Natarhurung: «Nunga huporsilangkon muse Anak ni Debata di bagasan rohangku (Heber 6, 6). Nunga huhagigihon Ibana (Luk. 19, 14), djala huhasogohon podana, dohot hatigoranna (Rom. 10, 3), djala huparamun mudar porpadanan i; huleai djala hudegei Ibana. Nunga huleai Tondi ni porasirohaon i (Hebr. 10, 28. 29). Ala na hutulak i padan ni Tuhan i, gabe bongot ahu tu bagasan rimas, tu piri piribolon on. Na tama do ahu mandjalo uhuman, bongot tu bagasan gorgor ni api, na mangarotongkon sude na mangalo i» (Hebr. 10, 27).

Si *Kristen*: «Boasa dibahen ho, pangalahom sisongon i?»

Natarhurung: «Huihuthon do lomolomo ni rohangku: Las ni roha; tua ni portibion; ala ni djogal ma rohangku udju sonang ahu; hape i do na patubuhon arsak ni rohangku, ai i do na songon ulok na manurbing di bagasan rohangku nuaeng.»

Si *Kristen*: «Beha, ndang tarbahren ho nuaeng, manolsoli roham sian pangalahomi?»

Natarhurung: «Nunga dipabali Debata ahu sian hamubaon ni roha, djala ndang be barani rohangku, mangkaporseai hatana i. Nunga dihurungkon Ibana ahu tu bagasan hurungan bosi on, ndang adong manang ise di tano on, na tuk paluahon ahu. O ale surgo! surgo! Beha ma panahanku di uhum hamagoan, sidjaloonku di

api na roko, na gor ro di salelenglelengna!»

Si *Patoranghahomion* mandok tu Si *Kristen*: «Pasombu ma halak na mago i, alai gabe porningotan tu ho ma i; i ma, na mambibiari ho, asa unang ditundalhon ho dalan tu hangoluan i.»

Si *Kristen*: «Tutu do, i ma sada biar bolon. Anggiat ma diporgogoi Debata ahu, asa dungo ahu huhut mortangiang, asa dao sian ahu pangalaho na songon on. Nandang lomo be rohangku nu-aeng moradian, molo diloas ho ale tuan, hutulus ma sidalananku.»

Si *Patoranghahomion*: «So djolo saotiknari, hupatuduhon tu ho saragamnari, borhat pe ho dung sun i.»

Didok nampuna djamita on: Ditogihon muse dope Si *Kristen* tu bilut na asing. Adong ma huida disi sada halak nambura ngot, djala di na mamake abitna dope ibana, angkadotdot situ-tu ma ibana.

Ninna Si *Kristen* ma: «Boasa angkadotdot halak on?»

Dungi didokkon Si *Patoranghahomion* ma paboaon ni halak i taringot tu pangalahona, djadi dipungka ma mangkatai, ninna ma: «Na mornipi do ahu di bagasan borngin i; huida do: Songon na holom djala birong langit i, djala guntur situtu; siksak ma dohot hilap, ndang mansohot, pola mansai mabiar situtu ahu. Hutailihon ma dompak gindjang, huida ma gunsang ombun i, ndang be songon somalna. Tongkinnari, hubege ma suara ni sarunc, na gogo situtu, djala huida adong Sada halak, na hundul di atas ni ombun i (1 Kor. 15, 51-58; 1 Tess. 4. 16; Juda 14), niundurhon ni surusuruan morriburibu. Sude nasida morsinondang na tiur situtu. Dungi mornalanala ma langit i, songon api idaon. Djala hubege ma sada suara na mandok: «Hehe ma sude angka na mate tu djolo ni poruhuman on!» Disi ma morbolaan angka batu bolon, djala mungkap ma angka tanoman, djala hehe be ma angka na mate sian bagasanna (Joh. 5, 28. 29). Adong do halak na morlas ni roha situtu, huhut manaili dompak gindjang; adong do deba angka na mabiar, na manabunihon dirina tu angka tor dohot dolokdolok (Pang. 6, 15. 16). Dungi tarida ma, diungkap halak na hundul di atas ombun i ma sada buku, didokkon ma sude isi ni portibion merpungu tu djolona. Dungi ruar be sian ingananna, djala tading ingananna rumar. (2 Tess. 1, 8-10; Pang. 20, 11-14; Jes. 26, 21; Mich. 7, 16. 17; Ps. 5, 1-3; Mal. 3, 2. 8; Dan. 7, 9. 10). Djadi hubege muse, ninna halak na hundul di atas ni ombun i ma: «Papungu ma sude duhutduhut dohot, hurangkam, djala dabu tu bagasan api» (Matth. 3, 12; 13, 20; 26, 30; Mal. 4, 1). Gabe mungkap ma liang api na so hadodoan bagasna, tongon di inganan hadjongdjonganku, djala haruar ma sian baba ni liang i, timus dohot api godang, pola morbudjogo suarana. Dungi mangkuling muse ma Tuhan na hundul di atas ombun i; «Papungu ma eme i, pabongot tu sopongku!» (Matth. 3, 12).

Dungi tongkin i ma huida, torop halak manaek tu gindjang ni ombun i (1 Tess. 4, 16. 17), alai tading do anggo ahu. Hulului do nian inganan portabunianku, alai ndang adong dapot ahu, ai sai dipanotnoti halak na hundul di gindjang ni ombun i do ahu. Djadi huingot ma dosangku, djadi husolsol ma rohangku. I ma alana, umbahen na tarsonggot ahu sian podomanku.

Si *Kristen*: «Boasa ma mabiar situtu ho, ala diida ho sisongon i?»

Dungi dialusi halak i ma: «Ninna rohangku, nunga ro do ari porpudi, djala so hobas dope ahu; ai nunga dipapungu surusuruan i huida torop halak, diboan tu gindjang, ia ahu ditinggalhon do. Djala mungkap pintu na roko i, di djolo ni inganan hadjongdjonganku, djala hutanda ma rohangku na mangaliluhon ahu. Dungi sai didjonggor Panguhum i do ahu huhut songon pamereng ni halak na tarrimas dompak ahu.»

Dungi didok Si *Patoranghahomion* ma: «Nunga i sac, timbangi ma pangalaho ni sudena.»

Si *Kristen*: «Olo! Sasude i patuduhon pangkirimon dohot biar di ahu.»

Si *Patoranghahomion*: «Denggan, pabongot ma sudena i tu bagasan roham, angka naung niidam, asa gabe sipatudu i di ho, djala mandasdasi ho di dalan sidalananmu.»

Asa dung songon i, morhobas ma Si *Kristen*, dialithon ma hohosna, asa gopas ibana borhat mordalan. Dungi didok tuan Si *Patoranghahomion* ma: «Pangapul i ma mandongani ho tongtong, di dalan na mamboan ho sahat tu sambulom!» Dungi mordalan ma Si *Kristen* huhut morendeende songon on:

«Dison djumpang au poda na uli,
Siingotonki tama, tau pangurupi;
Di mula dohot di udjung ni pandalani,
Ingotonku i, djala huhaholongi.
Sude naung huida dohot na hubege,
Tu Si *Patoranghahomion* hudok mauliate.»

5. Pangkilalaan ni Si Kristen di lambung hau na pinorsilangi.

Didok nampuna djamita on: Huida dope dibagasan nipingku, adong ma sada dalan na bolon na tinudju ni Si *Kristen*, djala morparik be do humaliang di siamun dohot di hambirang. Goar ni parik i: Hatuaon. (Jes. 26, 1). Tu dalan barungbung i ma laho Si *Kristen* na morsiporsanon i; djala lodja do ibana dibahen dokdok ni siporsanonna i.

Dungi didatdāti ma mordalan, djadi sahat ma ibana tu ingan adaran na hōrnop; disi adong ma djongdjong sada hau pinorsilang, djala holang otik sian i tungkan pea, adong sada tanoman. Ida ma! dung sahat ibana tu hau pinorsilang i, runsur djala peut songon i sambing sibonanonna i sian abarana, djadi morgulanggu-lang ro di baba ni tanoman i; gabe mago ma siporsanonna i.

Las ma roha ni Si *Kristen*, ala naung neang ibana, sian sibonanonna i na sailaon. Didok ma sian las ni rohana: «Nunga dilehon Ibana tu ahu las ni roha, morhitehite arsak ni rohana, hangoluan morhitehite hamatean!» Dungi djongdjong ma ibana disi mamerengi sian longang ni rohana, ai tau halongangan do i antong tu ibana, ala hau na pinorsilang i paneang (pasonang) ibana sian sibonanonna. Sai diulahulahi do manotnotihon, djala ganup dibereng manetek ma iluna, pola mabaor ro di hurumna (Sach. 12, 10). Djadi andorang mamereng ibana huhut tangis; ida ma! ro ma, mandapothon ibana, tolu halak, na morsinondang, morlinanglinang, mandjalang ibana, ninna ma: «Tabe ma di ho!» Dungi didok na pordjolo i ma: «Nunga sinesa dosam» (Mark. 2, 5). Na paduahon i: Maningkati abitna na buruk i djala na rotak i; diambolongkon ma i, dilehon ma abit na imbaru (Sach. 3, 4). Na patoluhon, mambahen sahap portanda tu bohina (Eph. 1, 13), djala mangalehon tu ibana sambalun harotas naung tarsahap (Pang. 2, 17; 2. Tim. 2, 19); huhut didok tu ibana: Ingkon djahadja-haonna surat i saleleng di pordalananna ibana, djala molo sahat ibana tu pitu ni banua gindjang i, lehononna ma surat i tu Si *Djaga* pintu i. Dungi habang ma sitolu halak i, djadi morhadjing-djang ma Si *Kristen* tolu hali sian las ni rohana; dungi mordalan ma ibana huhut morende, ninna ma:

«Saleleng huboan dosangku

Ndang tarhatahon arsak ni rohangku.

Di na sahat au tuson, beha pangkilalaanku:

Dison do bona ni pasupasu,

Ai na huporsan madabu sian abarangku,

Pangarahuti, dison do ambolong.

Pasupasu ni silang, tanoman: I ma haneangon.

Ibana sitaon dosangki, tama hinaholongan.

Ninna nampuna djamita on: Huida dope dibagasan nipingku mordalan ma Si *Kristen* sahat tu rura ni dolok i; djala holang otik sian dolok i, mamereng ma ibana, djadi diida ma tolu halak, na modommodom djala patnasida tarbeang do.

Goar ni na sada: Si *Oto*; na sadanari: Si *Losok*; na sadanari: Si *Rohadjungkat*. Asa dung diida Si *Kristen* nasida, peakpeak songon i, ro ma ibana manungguli nasida, huhut ma didjouhon: «E! hamu na tarlalap modom songon na di udjung tiang lajar ni parau (Spr. 23, 34), djala di gindjang ni laut na so hadodoan i

do hamu; dibahen i; hehe ma hamu! Beta hita huurupi pe hamu, asa malua hamu sian beanganmuna i; ai molo tung ro tu hamu, ibana, na songon singa, na morauang na mangalului manang ise sibondutonna, sai na soroonna do hamu» (I Petr. 5, 8). Dungi dipadirgak be ma uluna, mamereng Si *Kristen*. Dungi ninna Si *Oto* i ma: «Ndang adong huida nanggo sada ro pormaraan.» Ninna Si *Losok* i ma: «Modom ma hita sangkidopnari!» Dungi ninna Si *Rohadjungkat* i ma: «Ah! diboto be do, manang aha na tama siulahononna!» (halak sisongon i, nang djodjot pinaingot, ndang ditangihon, molo so djolo Debata manungguli rohana). Asa songon i ma pangalahonasida, diulahi ma muse modom. Dungi mordalan ma Si *Kristen*, diarsakkon rohana do, taringot tu na tolu halak i, na di bagasan pormaraan, djala na so olo urupan, paluahon nasida nian sian beangan i.

Dungi diida Si *Kristen* ma muse dua halak, midjur sian parik harbangan ni dalan na sompit i, mandjumpangkon ibana. Goar ni na sada: Si *Burnang*; na sadanari: Si *Pangansi* (*porgabus*). Dungi disungkun Si *Kristen* ma: «Na ro sian dia do hamu ale tuan, djala na laho tudia do hamu?»

Si *Burnang* dohot Si *Pangansi* mangalusi: «Hami na tubu di huta *Pamudjion* na so morguna; na laho tu dolok Zion do hami, mangalului hasangapon disi.»

Si *Kristen*: Antong molo songon i, boasa so bongot hamu sian pintu na sompit i, na di bona ni dalan on? Nandang diboto hamu, na tarsurat di buku: «Manang ise na so bongot sian pintu, djala sian parik ibana mandjangkit laho bongot, panangko do i djala pamunu (Joh. 10, 1).»

Si *Burnang* dohot Si *Pangansi*: «Ninna roha ni halak na di hutanami, madaohu do dalan i, molo ingkon djolo bongot sian pintu na sompit i; ala ni somalnami do mamolus dalan na dju-monok, nang pe mandjangkit iba sian parik songon nangkin.»

Si *Kristen*: «Alai anggo pambahenan sisongon i, margago adat ni luat na naeng topotonta i do i, dohot aturan ni patik na denggan i.»

Si *Burnang* dohot Si *Pangansi* mandok: «Unang pola por-duli ho taringot tusi; manang aha na hubahen hami, adatnami do i; ai nunga 1000 taon didalani halak dalannami on.»

Si *Kristen*: «Haalusan ompumuna do i, molo ditilik tu bagasan buku patik ni radja i?»

Si *Burnang* dohot Si *Pangansi*: «Naung sian nahinan do i adatnami, lobi ma 1000 taon naung salpu. Djala ninna roha ni Panguhum na tigor, denggan do i, ala naung somal songon i (angka na bongot tu ugama sian dalan na lipe, ingkon tibu tandaon-na liluna). Hami, sian parik manaek; ho, sian pintu na sompit i masuk, djala rap di dalan on do hita nuaeng; beha, aha do im-

barna diida ho, morhasurungan do ho nuaeng sian hami?»

Si *Kristen*: Ianggo pordalanonku, mangihuthon aturan ni Tuhanku do; alai hamu, morguru tu ringkot ni rohamuna do (1. Petr. 1, 18) manang sian dia pe; ala ni targoar hamu panangko, ninna Tuhan nampuna dalan on. Huhilala do, ndang tama hamu goaron portigor, di udjung ni pordalananmuna on; ai bongot sian dalan na so pinatuduhonna do hamu; paruaronna do hamu, so mandjalo asi ni roha sian ibana.»

Djadi ndang diantoi sidua halak i be ibana, nda holan on nama didoknasida: «Parangem ma pature!»

Ala ni mordalan ma nasida masiboan pangalahona be, ndang be mangkatai nasida, holan hata on nama didok nasida tu Si *Kristen*: «Diulahon ho adat dohot aturan ni patik na tama, so manang dia imbarta, nda holan badjubadjumi tahe. Didok rohana-mi: Silehonlehon ni halak do i di ho, manghuphupi porsacmaranmi.»

Si *Kristen*: Ianggo morhitehite pangulahon di patik, ndang dapotan hatigoran djolma (Gal. 2, 16). Molo so bongot situtu hamu sian pintu i ndang sahat hamu tu hangoluan: Taringot tu badju na hupake on, i do na nilehon ni Tuhan nampuna luat, na naeng topotonki. Tutu do na nidokmuna i, mangkupkupi porsacmaranonku do, djala i do gabe singkoram ni asi ni rohana di ahu; ai ndang adong hian di ahu sisongon on. Abit na buruk djala na maribakribak hian do di ahu (Jes. 61, 10). Djala gabe apulapul do i di ahu di pordalananku. Asa molo sahat ahu tu pintu i, mamintor ditanda Tuhan i do ahu, ala na hupake badju on; ai porsen do i dilehon Ibana tu ahu, di ari na siningskatanna i abithu na maribak i sian dagingku. Angkup ni, sada sahap na di bohingkon, na so niidamunæ dope, na nilehon ni sahalak donganna i, di ari hapepeut ni siporsanonku sian abarangku. Dungi hudjalo dope sambalun surat naung tarsahap, na tarbahen mangapuli ahu, molo hudjaha i turutturut dalan. Ditonahon hian, lehononku surat i tu Sidjaga pintu i, na di banuagindjang i; i ma gabe panindangi, paboa na huihuthon aturan ni ugama na tama. Tangkas huboto: Sude na hugoari i, ndang adong sisongon i di hamu, ala so bongot sian pintu na sompit i hamu.»

Sude i, na tarsurat i ndang dialusi halak siduadua i; mengel be do nasida djala masiberengan.

Asa huida ma mordalan be ma nasida, djala Si *Kristen* mordalan tu djolo. Sai sip nama ibana, ai sasadasa nama mordalan; sipata morhosa godang ibana, alai dipasabam do muse rohana, mandjahadjaha surat balunan i, na nilehon ni sada *porsinondang* i, djadi sabam ma rohana binahan ni.

6. Angka na masa tu pordalan di lambung dolok Hasusaan.

Dung i mordalan be ma nasida huida, djadi sahat ma ro di bona ni sada dolok na morgoar *Hasusaan*. Adong do sada mual di bona ni dolok i, djala di lambung i, adong do dua sirpang, sian dalan na dompak pintu i tingkos, sada tu hambirang, na sada tu siamun ni dolok i. Alai anggo dalan na gogot i, tingkos do i tu atas ni dolok i. Dung i laho ma Si *Kristen* minum tu mual i, asa hipas ibana (Jes. 49, 10—12). Dung i nangkok ma ibana tu dolok i, huhut morende, ninna ma:

Nangkok au tu dolok na timbo on,
Lodjana ndang husarihon:
Mandiori arta na umarga,
Na tau pasonang roha.
Hupillit dalan na gogot djala porsuk.
Dalan na lambas puas tu banuatoru.

Sidua halak nangkin pe, sahat ma ro di bona ni dolok i. Alai dung ditailihon, mansai timbo djala rahis dolok i huhut diida, adong dalan na asing dua, ninna rohanasida ma: Mordomu do dalan na dua on tu dalan na nidalaman ni Si *Kristen*, di balik ni dolok on. Gabe manirpang ma nasida sian dalan na gogot i. (Mansai godang hamagoan molo manirpang iba sian dalan na gogot i). Goar ni sirpang na sada *Pormaraan*; na sadanari *Hamagoan*. Asa songon i ma pangalahona, didalani na sada pormaraan, na sadanari hamagoan, angka na puas be tu halongonan na bidang, na holom morimpotimpot, gabe tinggang, hehe muse, gabe mago nasida siap (Spr. 4, 19).

Alai Si *Kristen* pe, di na nangkok i ibana, mortinggangan do, alai sai behe do muse; gabe mandjurur nama ibana di nangkohan i, ai mansai rahis situtu do i. Asa dung ro di porsitongaan ni dolok i, adong do disi sada sopesopo na pinauli ni Tuhan nampuna dolok i, asa adong poradianan ni angka pordalan.

Disi ma moradian Si *Kristen* pasonang rohana, ala naung lodja ibana mordalan. Dibuat ma suratna balunan i sian hadjutna, djala didjaha ma, mangapuli rohana; huhut dipasonang rohana, paberengbereng badjuna, na djinalona i, di lambung hau na pinorsilang i. Dung i gabe sabam ma rohana djala las. Alai ndang pola sadia leleleng, mondohondok ma ibana, djala tarlalap modom, ro di na moreak bot ari (sude na mondohondok, sai na rugi do ibana). Djadi andorang modom ibana, madabu ma sian tanganna suratna, balunan i.

Alai, ala na tarlalap modom i Si *Kristen*, ro ma sada halak manungguli ibana, ninna ma: Laho ma ho tu porhis ale por-

losok, timbang ma pangalaho ni, asa morbisuk ho» (Spr. 6, 6). Mamintor ngot ma Si *Kristen* djala golamgolamon; dung i hapogan ma ibana mordalan, djadi sahat ma ibana tu atas dolok i. Asa dung moreak tolhas ibana tu gindjang, padjumpang ma ibana dohot dua halak, na morlodjong mulak sian djolo. Goar ni na sada: Si *Porbiar*, na sadanari: Si *Ganggu*. Dung i didok Si *Kristen* ma tu nasida: «Ala ni aha umbahen morlodjongi hamu, na pilit do dalan?» Dung i dialusi Si *Porbiar* ma: «Naeng laho tu dolok Zion do hami nian, djala nunga nangkok hami ro di inganan *Hasusaan* on, alai lam dao hudalani hami, lam godang hasusaan dapot hami, ala ni umbahen mulak hami laho tu sirpang i muse.»

Didok Si *Ganggu* muse: «Tutu do, ai adong do di djolo-nami, di dalan i nangkin, sapaang singa, manang na modom manang na mangonggop, hurang manat huboto hami; alai ninna rohanami, tung sura djumonok hami, ra mamintor soroonna djala porsurageonna do hami.»

Si *Kristen*: «Na mambibiari do hamu di ahu, tudia ma ahu laho asa malua ahu sian mara i? Djala molo mulak ahu tu hutangu, situtungon i morhitehite api barerang; laos hamagoan do. Dumenggan tahe, laos hutorushon ma dompak djolo, ai ndang adong labangku molo mulak ahu, nda holan hamatean djumpang ahu. Djala nang tung dapot ahu hamatean di pordalananhon, salpu i dapotan hangoluan salelengna do ahu muse; ala ni dumenggan do, molo sai hudatdati mordalan.»

Alai sai tuat do Si *Porbiar* dohot Si *Ganggu* sian punsu ni dolok i, alai anggo Si *Kristen*, didatdati do mordalan dompak djolo, huhut mamingkiri hata na binegena sian sidua halakondeng. Dungi disigati ma dohot hadjutna naeng mandjaha suratna i, pasabam rohana nian, alai ndang adong disi be. Djadi tarsonggot ma ibana, djala marsak, hira so diboto be mangkuling; ai tung hasea situtu do i nian, mangurupi ibana di pordalannan i, ro di banuagindjang. Djadi guga ma rohana, ndang diboto be sibaheonna; alai udjungna muse, diingot ma na tarpodom i ibana, di inganan poradianan, na di porsitongaan ni dolok i. Dungi mamin-tor manungkap ma ibana mortangiang, mangido hasesaan ni hao-tonna, na tarpodom i ibana; dung i pe asa mulak ibana, mangalului surat na balunan i, na mago i.

Dungi di na mulak i ibana, sai marsak do rohana; alai manang beha pe dokdok ni arsak ni rohana, Debata do umboto i. Sipata morhosa godang ibana, sipata tangis, djala djotdjot disolsoli rohana ala ni otona, na tarpodom i ibana, di inganan poradianan ni halak na lodja mordalan. Sai morhusari do ibana, di na mordalan i, huhut mangaranapi di lambung be, di sude dalan, naung binolusna i, anggiat djumpangsa nian surat balunanna i; ai i do

antong djotdjot mangapuli rohana di pordalananna i. Asa songon i ma pangalahona, di na mordalan i ibana, sahat ro di inganan, na tarpodom i ibana. Djala dung ditatap ibana poradiananna i, ganda ma arsak ni rohana, ai diingot ma salana, na tarlalap modom i ibana disi (1. Thess. 5, 6—8). Songon i ma ibana mordalan huhut manolsoli rohana, ala na tarlalap modom i ibana, huhut mandok: «O iale! na mago ma ahu, na modom arian di tingki hasusaan, mangoloi roha sibuk, naeng pasonang dagingna di inganan on. Ai ingkon on dibahen Tuhan nampuna dolok i, asa adong poradianan ni tondi sambing, di angka na lodja mordalan! Sadia dao do, na hudalani i, gabe so morguna. Songon na binahen ni halak Israel do na hubahen nuaeng; ai ala ni dosanasida, gabe didokkon Debata muse nasida mulak dompak laut na rara (Solok Akkaba), songon i ma ahu nuaeng mulak di arsak ni roha; i ma tahe hinorhon ni na tarlalap modom i. Aut ni tongtong ahu mandatdati mordalan dompak djolo, ra nunga tung dao ahu ro di sanonari. Nuaeng gabe tolu hali ahu mulahulak, di dalan sisahali dalanan nian, djala nunga mamungka bot ne ari. «Oë magopona i, tung tarpodom ahu!»

Asa songon i ma pangalahona, di na sahat ibana tu adian hamodomanna i. Gonop tongkin do ibana tangis. Dung i hundul ma ibana, dipaunduk ma uluna, ala ni arsak ni rohana i. Dung i diurupi Debata ma ibana. Ida ma! dapot matana ma suratna balunan i, di suhisuhi ni saposopo i, di toru ni bangku. Dung i angkadotdot ma ibana mandjompot surat i, djala dipabongot ma tu hadjutna. Asa dung djumpang Si *Kristen* muse suratna balunan i, apulapul na pasonang rohana i. Beha ulaning las ni rohana? Ndang tarhatahon tahe; ai surat i ma na patorangkon hango-luan, siteanon muse di banuagindjang. Dibahen i denggan ma muse ditabunihon suratna i tu bagasan hadjutna, huhut mandok mauiate situtu tu Debata, ala dipatongon matana tu inganan hadjumpanganna i; sian las ni rohana huhut moriluilu. Dung i mordalan ma ibana, mandatdati sidalananna i, huhut mansai hatop ibana laho nangkok tu dolok i, asa gira sahat, ai nunga bot ne ari. Alai molo tarsingot muse tu rohana, na tarlalap modom i ibana, morisuang ma ibana, huhut mandok di bagasan rohana: Pe! mordjea do na tarlalap modom songon ahu on. Gabe mordalan di haholomon nama ahu nuaeng, ai nunga mago hatiuron ni mata ni ari; gabe dihuphupi na holom sidalananku. Djala hubegé sude soara na djorbut nuaeng, dibahen ho ale porpodomon na roa. Morningot muse ma ibana huhut di djamita, djinamitahon ni Si *Porbiar* dohot Si *Ganggu*. Beha ma ulaning rohana, mornida singa, hinabiaran ni sidua halak i? Dung i sai morhusari ma ibana, ninna rohana ma: Somal ni binatang do tahe borngin i mangalului sipanganonna. Molo tung padjampang ahu dohot ibana, di na holom

on, beha ma ulaning bahenonku, asa malua ahu? Songon i ma pingkiranna di na mordalan i ibana. Andorang na mangarsakkon i ibana manaili ma ibana dompak djolo, djadi pintor diida ma sada bagas na balga, na morgoar *Nauli*, na di bariba ni dalan na bolon i. (1 Tim. 5, 7. 8; Pang. 3, 2).

7. Angka na masa tu Si Kristen di bagas Nauli.

Didok nampuna djamita on, huida ma di bagasan nipingku, lam hatop ma Si *Kristen* mordalan tu djolo, ai disura rohana, atik tung tarbahensa do sorang di bagas i. Djadi andorang holang dope ibana sian bagas i, sahat ma ibana tu sada alaman na gogot, hirahira saratus dopanari daona, sian halak na mandjaga bagas na bolon i. Andorang pamanatmanathon i ibana, diida ma di djolona: Dua singa, angkupangkup be di dalan i. Dung i morhusari ma ibana: Patut do mulak Si *Ganggu* dohot Si *Porbiar* mida pormaraan sisongon on.

Alai na nirante do singa na dua i, alai ndang diida Si *Kristen* anggo rante i. Djadi morhusari ma ibana huhut mabiar; disangkap rohana naeng mulak, songon sidua halak nangkin, ai ndang adong be pangkirimonna na asing, molo so naeng mate disi. Alai anggo pandjaga ni pintu i, na morgoar Si *Dungo*, dung diida pangalaho ni Si *Kristen* na naeng mulak i, didjouhon ma tu ibana: «*Songon i dauk do haporseaonmu!*» (Mark. 4, 40). Unang pola mabiar ho mida singa i, ai na tarrante do i; umbahen na dibahen i disi: Na mangundjuni haporseaon do i, asa tanda manang ise na porsea dohot na so porsea. Mordalan ma ho sian tongatonga ni alaman i ndang adong na mangkahua ho.»

Didok nampuna djamita on: Mordalan ma Si *Kristen* huida, huhut angkadotdot, sian biarna mida singa i; alai didatdati do mordalan, mangoloi pandokkon ni pandjaga i tu ibana. Dibege ma suara ni singa i patungoromon, alai ndang dipekkon Si *Kristen* be, mortopaptopap ma ibana mordalan, sahat ro di inganan ni pandjaga i. Dungi ninna Si *Kristen* ma tu ibana: «Tuan! bagas ni ise do on? Tarbahen ahu do sorang dison saborngin on?»

Dungi dialusi pandjaga i ma: «Ianggo bagas on, na pinauli ni Tuhan nampuna dolok on do, bahen inganan panuduhon, tu angka na mangalului banuagindjang.» Disungkun pandjaga i muse tu ibana: «Sian dia do ho ro, djala tudia do ho laho?»

Si *Kristen*: «Na ro sian huta hamagoan do ahu, naeng laho tu dolok Zion, alai nunga bot ari nuaeng, ala ni hupangido tu ho, asa dison ahu morborngin saborngin on.»

Si *Pandjaga*: «Ise do goarmu?»

Si *Kristen*: «Goarhu nuaeng, Si *Kristen* do, alai anggo goarhu na djolo, halak Na so dapotan asi ni roha do; bangsongku sian pinompar ni Si Japhet do, (Gen. 9 27) na niloas ni Debata mangingani undungundung ni Si *Sem*.»

Si *Pandjaga*: «Denggan, dia do alana, umbahen songon i bot ari ho ro, ai nunga mate mata ni ari?»

Si *Kristen*: «Tibu do ahu nian sahat tuson, aut unang na morsala ahu. Tarpodom do ahu di inganan poradianan, na di porsitongaan ni dolok on, djala di na tarpodom i ahu, mago do pangaropan ni roha i sian ahu. Ai dung sahat ne ahu tuson, ndang morisi be pangkirimonku; hulului ma di hadjuthu, hape ndang be disi. Djadi mulak ma ahu muse tu porpodomanki mandiori, huhut marsak situtu rohangku; dung pe ro disi ahu muse, asa djumpang ahu pangiriman ni rohangki, djadi mulak ma ahu muse tuson. I ma alana.»

Si *Pandjaga*: «Denggan, hudjou ma djolo nuaeng sada na morbadju sian bagas, molo dioloi pangidoanmu, togihononna do ho annon bongot, rap dohot angka donganna, songon na somal di inganan on.» Asa dung i, dipalu sidjaga pintu i ma giringgiring mandjou, djadi mamintor ruar ma sada boruboru, na denggan morpangalaho, djala na lambok morbohi, na morgoar «Si *Manat*,» huhut ma didok: «Boasa didjou ahu?»

Si *Pandjaga* i mangalusi: «Ro sian pordalanan do halak on, borhat sian huta hamagoan, naeng laho tu dolok Zion; alai ala ni lodjana djala nunga bot ari, gabe dipangido tu ahu, asa morborngin ibana dison. Djadi hudok tu ibana: «Denggan, alai djolo djouonku do ho. Nuaeng pe, manati ma ibana, manang lehet di roham, dohot di pornidaanmu songon na somal tu bagas on!»

Asa dung sun i, disungkun na morbadju i ma ibana: «Sian dia do ho, djala naeng laho tudia do ho?» Dungi dipaboa ma tu na morbadju i sude pangalahona. Dungi disungkun na morbadju i muse tu ibana: «Sian dia diboto ho dalan on?» Dohot taringot tusi pe, dipaboa ibana sude. Disungkun dope tu ibana: «Angka aha do diida ho, djala padjumpang dohot ho, di naung nidalananmi?» Dohot taringot tusi pe, dipaboa ibana sude. Dungi disungkun na morbadju i muse: «Ise do goarmu?» Dungi dialusi ma: «Goarhu nuaeng, Si *Kristen* do, sai naeng dison do ahu morborngin saborngin on, ai huboto do, inganan on, na pinauli ni Tuhan nampuna dolok on, bahen inganan porlinggoman dohot poradianan di angka na laho tu banuagindjang.» Dungi mengkel ma boruboru i huhut moriluilu. Asa dung manang piga minut lengna, didok boruboru i ma: «So ma djolo, hudjou ma donganku, dua manang tolunari.» Dungi morlodjong ma ibana tu pintu, didjou ma donganna Si *Hapistar*, Si *Barmidadebata* dohot Si

Holong. Asa dung ro nasida, pungu ma nasida mangkatai dohot ibana, didjou nasida ma Si *Kristen* bongot tu bagas i, huhut mandok: «Bongot ma ho na pinasupasu ni Debata, tu bagas na pinauli ni Tuhan nampuna dolok on, bahen inganan poradianan ni angka na mangalului banuagindjang.»

Asa dung i, dipaunduk Si *Kristen* ma uluna mandok mau-liate, dungi diihuthon ma nasida bongot tu bagas i. Asa dung hundul Si *Kristen*, dilehon ma ibana minum, djala mornonang ma nasida. Morgontigonti ma na tolu i mangangkupi Si *Kristen*, manaringoti godang angka hata na denggan, paima rade sipanganon.

Si *Biarmidadebata*: «Ro ma ho tuson ale *Kristen* na denggan, masihaholongan ma hita, ai nunga hudjalo hami ho bongot tu bagas on sabornjin on. Mangkatai ma hita, asa tarapul roh-nami, umbege angka na masa tu ho di pordalananmi.»

Si *Kristen*: «Denggan do i nang di rohangku, naeng begeonmu.»

Si *Biarmidadebata*: «Aha do na manungguli roham di mu-lana, umbahen didalani ho dalan on?»

Si *Kristen*: «Na huhaporushon sambing do diringku, sian inganan hadurusan ni mudarhu, dung hubege sada suara, na mandok: «Molo sai di ingananmon ho, sai na ro do tu ho hama-goan!»

Si *Biarmidadebata*: «Beha do di mulana, umbahen sahat ho tu dalan on?»

Si *Kristen*: «Morphite sian asi ni roha ni roha ni Debata do, ai andorang di na mabiar i ahu, pasarisari hamagoan i, ndang huboto tondongonku manang tu dia; djadi ro ma tu ahu sada bawa, gabe angkadotdot ma ahu huhut tangis. Goar ni bawa i: Si *Porbaritanauli* do, djadi dipatuduhon ma tu ahu, djala ninna ma: Laho ma ho tu pintu na sompit i! alai anggo sian porbinotoanku, tung na so huboto do dalan tusi, djadi ditogihon ma ahu tu dalan na dompak bagas on.»

Si *Biarmidadebata*: «Beha, laho do ho tu bagas ni tuan *Sipatoranghahomion* i?»

Si *Kristen*: «Olo, laho do, godang do angka halongangan huida disi, sai huingot dope i rasirasa nuaeng, djala ndang halu-pahononku i saleleng mangoli ahu. Tolunari na djumotdjot huingot, pordjolo: Taringot tu Kristus i, na patanakkon ulaon asi ni rohana, di bagasan roha ni djolma, atik pe dialo Sibolis i Ibana; paduahon: Taringot tu sada djolma pordosa, naung agoan pang-kirimon ni roha, taringot tu asi ni roha ni Debata; patoluhon: Taringot tu halak na mornipi; diipi ibana, nunga ro ari porpudi.»

Si *Biarmidadebata*: «Dihatahon do sude nipina i dibege ho?»

Si *Kristen*: «Olo! I ma sada halongangan situtu di rohangku, mabiar do ahu, udju dihatahon i tu ahu, alai las do rohangku muse, dung hubege i sudena.»

Si *Biarmidadebata*: «Holan i do diida ho, di djabu ni *Si Patoranghahomion i?*»

Si *Kristen*: «Ndang! ditogihon dope ahu tu sada inganan, dipatuduhon do tu ahu sada bagas bolon, na niinganen ni torop halak, angka na mamake pahean mas. Dohot taringot tu sada halak, na barani situtu, manahopi angka pordjaga na morsindjata; di djolo ni pintu ni bagas i; dungi laho ma ibana masuk tu bagas i, monang ma ibana, djala dapotan hasangapon salelenglelengna. Taringot tusi: Manungguli ringgas di bagasan rohangku do i. Djadi sangkap ni rohangku, naeng tading di bagas ni halak na denggan i ma ahu nian, anggo sada taon lelengna, alai huboto do: Na dao dope sidalananku.»

Si *Biarmidadebata*: «Angka aha dope diida ho di pordalanan-mi?»

Si *Kristen*: «Oi, huida dope, dung mordalan ahu, ndang sadia dao dope sian i, adong ma halak na targantung, djala mabaor do mudarna tu tiang hau i; djala dung huida i, mamintor peut ma siporsanonku na dokdok i sian abarangku, na huholsohon na sailaon, madabu boti do songon i dung ro disi ahu. I ma sada apala na huhalongangkon, ai ndang dung huida na djolo na songon i. Dungi di na moradian ahu manotnotihon; ida ma! ro ma tu ahu tolu halak, angka na morsinondang. Sada halak sian nasida mandok: «Nunga sinesa dosam!» djala na sadanari mangalehon pahean mas tu ahu, i ma na hupangke on, dung djolo dibolongkon paheanku na rotak, djala na maribakribak i. Na patoluhon i mambahen sahap tu bohingku, songon naung niidam; djala dilehon tu ahu sada balunan surat, huhut ma ditait surat i sian hadjutna patuduhonsa.»

Si *Biarmidadebata*: «Ndang be diida ho dungkon ni i?»

Si *Kristen*: «Angka naung huhatahon i tu ho, i ma na umarga djala na rumingkot. Alai adong dope huida angka na asing, i ma: Bawa tolu halak, angka na modommodom di lambung ni dalan na bolon i; na tarbeang do patnasida be, ndang tarpahehe ahu nasida; i ma: Si *Olo*, Si *Losok*, dohot Si *Rohadjungkat*. Dung i padjumpang dope ahu dohot Si *Burnang* dohot Si *Pangansi*, angka na manaek sian parik; didok do: Naeng laho do hami tu dolok *Zion*, alai tibu do nasida mago; djala hupaingot do nian nasida, hape ndang olo porsea, ala hasusaan na godang, i ma na manganangkohi dolok on, dohot na mamolus baba ni singa i. Alai ahu pe aut unang pandjaga na di lambung pintu i, ra tung nunga dohot ahu mulak. Alai mauiliate ma tu Debata na patolhas-hon ahu tuson; djala hudok ma tarima-kasi tu hamu, ala na olo hamu mandjangkon ahu, sorang tu bagas on saborngin on.»

Dungi dipingkir Si *Hapistarani* ma: Denggan do, molo dohot ahu manungkun ibana, asa hubege deba alusna,

Si *Hapistarán*: «Nandang diingot roham be inganan, na tina-dingkonmi dung ro dison ho?»

Si *Kristen*: «Huingot dope, alai maila rohangku, djala su-bang situtu; ai molo huingot djala molo huhalungunhon huta na hutadingkon i, sonang do nian anggo sibukku, alai on do lomo ni rohangku: Naeng mangalului huta na dumenggan i, na di banua-gindjang i (Hebr. 11, 15. 16).»

Si *Hapistarán*: «Adong dope diboan ho ugasan, na somal pinangkem na djolo?»

Si *Kristen*: «Adong dope nian, alai ndang hombar tu lomo ni rohangku be i, atik pe di bagasan dagingku dope, ala dihalo-mohon rohangku do na djolo. Oe hata i na huhatahon i, huar-sakkon do i nuaeng, ai nang tarsunggul lomo ni roha daging i, ndang oloanku be. Ringkot do nian rohangku mangulahon na denggan i, alai hadjahaton i, laos adong dope di bagasan dagingku (Rom. 7, 15—21).»

Si *Hapistarán*: «Beha, nda dirimpu ho sipata naung ditalu-hon ho angka pangalaho, na mangarsahi roham muse?»

Si *Kristen*: «Adong do nang sisongon i; alai ndang piga hali, djala molo ro pingkiran sisongon i, tingki mas na arga do i di rohangku.»

Si *Hapistarán*: «Beha, diboto ho do manang dia, na tau mangintopi ganggumi sipata?»

Si *Kristen*: «Olo, molo hupingkiri manang aha, na huida di hau na pinorsilang i, gabe mintop do ganggu ni roha i; angkup ni muse: Molo huida badjubadjungku, na morsinondang on, motap do; molo hudjaha surat balunan na huboan on, motap do di-bahen i; angkup ni: Molo hehe ringgas ni rohangku mordalan, tu inganan pandjaloanku di siteanon, mintop do ganggu i.»

Si *Hapistarán*: «Aha do na parohon ringgas ni roham situ-tu, naeng laho tu dolok Zion?»

Si *Kristen*: «Ala na dihalungunhon rohangku situtu naeng idaongku Ibana na mangolu, naung mate na djolo di hau pinorsilang i. Ai ninna rohangku: Ra tung disi ma ahu malua, sian na-sa gangguganggu nuaeng; ai dibaritahon halak do: Nandang be ma-te djolma disi (Jes. 25, 8; Pang. 21, 4), dungi muse: disi ma mor-inganan ahu dohot na huhalungunhon. Na tutu do na hudok on di ho: Mansai holong rohangku di Ibana, ai ala Ibana do: neang ahu sian siboanonku, na niarsakkon ni rohangku na sailaon. Ala ni dihalungunhon rohangku situtu, sada inganan na so morisi ha-matean, djala rap ahu dohot angka na mamudji Debata, na man-dok: «Na badia! na badia na badia do Jahowa Zebaoth.»

Dungi disungkun Si *Haholongan* ma Si *Kristen*, ninna ma: «Adong do anakkonmu dohot djolmam?»

Si *Kristen*: «Adong do sada djolmangku dohot opat dakdanakku.»

Si *Haholongan*: «Boasa so diboan ho nasida, asa rap dohot ho tuson?»

Dungi tangis ma Si *Kristen* huhut mandok: «Las situtu rohangku nian, aut tung tarbahen ahu rap dohot nasida tuson, alai tung na so olo do nasida rap dohot ahu di pordalanankon.»

Si *Haholongan*: «Molo songon i, tama adjari nasida nian, patuduhon torang tu nasida angka hamagoan na naeng ro i?»

Si *Kristen*: «Nunga hupaboa, djala tangkas hupatuduhon tu nasida, songon pinatuduhon ni Debata tu ahu, taringot tu hamamago ni huta na huingani hami; alai huida pangalahonasida, ndang olo porsea, djala songon pangeleselesi do (Gen. 19, 14).»

Si *Haholongan*: «Nunga ditangiangkon ho tu Debata, asa diporgogoi Debata adjarmu na tu nasida i?»

Si *Kristen*: «Nunga hutangiangkon nasida gogo, morhitehite hata holong; ai ho pe, ra dihilala roham do, holong ni rohangku tu nasida.»

Si *Haholongan*: «Nunga dipaboa ho tu nasida, arsak ni roham, ala ni biarmu di hamagoan i; ai anggo di rohangku, nunga torang diboto ho hamagoan i.»

Si *Kristen*: «Olo! djotdjot huulahulahi mamaritahon i, pola diida nasida sian porbohingku, ala ni biarhu, di ari poruhuman na ro sogot, alai ndang olo dauk rohanasida mangihuthon ahu.»

Si *Haholongan*: «Ala ni aha, umbahen so olo ro nasida, mangihuthon ho?»

Si *Kristen*: «Ala holong dope roha ni djolmangku di roha portibion, djala a'la haotoon ni angka ianakkonhu diihuthon nasida do roha sibuk; songon i ma porrohaonnasida, dipasombu nasida ahu morpangalaho songon on, mamboan hauntungonku.»

Si *Haholongan*: «Atik na targasip do nasida, dibahen pangalahom na hurang denggan, andorang na manogihon i ho di nasida, asa dohot mangihuthon ho?»

Si *Kristen*: «Tutu do, ndang pudjionku diringku, ai hu hilala sambing do godang ni porsalaanku, djala huboto do, pangalaho na hurang denggan, i do mangagohon poda na denggan, na naeng sahat tu iba, alai hudok ma: Hudjaga do nian diringku, asa unang targasip nasida, morhite sian pangalahongku na hurang denggan, djala asa unang hupadjogal rohanasida, umbahen so diihuthon nasida ahu tu dalan mandjalahi hangoluan. Tongon do, i ma umbahen didok nasida tu ahu: Matigorhu do ho; ai hupasiding do, asa unang sala ahu di rohansida. Anggo ninna rohangku, ala ni on do, umbahen so olo nasida mangihuthon ahu, ala hupasonang rohanasida, morhitehite lambok ni rohangku, ai mabiar do ahu mordosa tu Debata, dohot mambahen na so ture tu djolma.»

Si *Haholongan*: «Songon i ma anak ni Si Adam, na morgan-

ar Si Kain; ala pambahenanna na djahat, dihosomi rohana anggina na tigor i (1 Joh. 3, 12). Molo tung dibahen djolmam dohot anakkonmu hansit ni roham ala ni, tanda ma, na tinundalhonnasida dalan na tigor i, lias ma ho sian pordosaonnasida i (Hez. 3, 19).»

Didok nampuna djamita on: Huida dope di bagasan nippingku, songon i ma pangalaho nasida, hundul masisungkunan, masialusan, ro di tingki ni pormanganon, djala dung rade sipanganon i, hundul ma nasida mangan. (Panganon on, tudosan ni roti dohot anggur Jes. 25, 6). Ai gok hamuliaon, dohot tuak anggur na tabo do panganon i, dohot pangkataion na hinatahonnasida i: Angka taringot tu Tuhan nampuna dolok i; dohot taringot tu bagas na binahen ni Tuhan i; dohot taringot tu ulaon na niula ni Tuhan i; dohot poralaan, umbahen diula Tuhan i sisongon i. Dungi dapot ahu ma on, sian sude hatanasida i: Na tutu do: Ulubalang di pormusuan do Tuhan i, udju i, ai ditaluhon ibana do radja i, na maniop hagagoon ni haholomon i. (Heber 2, 14. 15) Alai nang Ibana, hona haporsuhon do, ala ni do umbahen muba holong ni rohangku di Ibana. Dohot sian hata ni halak, huhaporseai do on ninna *Si Kristen*: Dipatupa Ibana do sudena i, morhitehite ha-uuse ni mudarna; djala sumurung dope pambahenanna ala sian: Asi ni rohana sambing dihorhon saluhut ulaonna i. Dungi adong muse dope halak di bagas i na mandok: Diangkupi nasida Ibana mangkatai, dung mate Ibana di hau na pinorsilang i djala dung hehe Ibana muse sian na mate. Dungi na deba, angka na di bagas i, mangkatindangkun hata on: Naung ruar sian bibir ni pamanganna on: Dihaholongi Ibana situtu, angka na mangalului dalan tu hangoluan, pola so djumpang hami tudosan ni holong ni rohana, sian habinsaran ro di hasundutan (Ul. Apost. 1,3; 1 Kor. 15, 6).

Dibahen nasida muse dope angka panindangion ni, diporhatutu nasida on: Ditadingkon ibana do hasangaponna di banuagindjang, ala ni hami angka na gale dohot na lea on. Dungi dibege nasida dope hatana on: Tung na so olo do Ibana moringan di dolok Zion, ianggo holan Sasadasa, djala nunga dilehon Tuhan i hasangapon, dohot tanda haradjaon tu torop halak, naung mandalani dalan on, nang manang beha pe pogosna, dohot leana sian hatutubuna hian (1. Sam. 2, 8; Ps. 113, 7).»

Djadi songon i ma pangalahonasida, hundul mangkatahatai, ro di na nia robot ni borngin. Dungi dipasahat nasida ma dirinasida tu Debata, asa diramoti, djala dipasonang Debata porpodomonnasida. Alai Si *Kristen* ditogihon nasida tu sada bilut na mordjandela dompak habibinsar ni mata ni ari, Hadameon go-ar ni bilut i. Dungi modom ma ibana ro di na binsar ari. Djadi ngot ibana, dipagogo ma suaranya mangendehon ende on;

«Sonangna i ahu saonari!

Ai holong ni Jesus na godang i do mangaramoti,

Ai ndada sahali, djotdjot do disesa dosangku.

Asa dung manogot i, hehe ma nasida sude, djala mangkatai dope nasida, otik, godang hatanasida tu Si *Kristen*, ninna nasida ma: «Unang ho djolo mordalan, ai naeng dope patuduhononami tu ho angka na arga, na adong di bagas on.» (Si *Kristen* mor-siadjar mangkaholongi ugama).

Djumolo, ditogihon nasida ma Si *Kristen* tu bagasan sada bilut, iaganan ni godang surat sian nahinan; sude dipatuduhon tu Si *Kristen*. Dungi huida ma di bagasan nipingku: dipatuduhon ma tu ibana djumolo, surat taringot tu portuturan ni Tuhan i, nampuna dolok i, i ma: Na adong hian sian na robi ni na robi, djala Anak ni na so morudjung (Mik. 5, 1; Joh 1, 1; Dan. 7, 9. 13. 22). Djala tigor do na tarsurat goar ni angka na djinalo ni Tuhan i, mangula ulaonna, dohot taringot tu pambahenanna. Dipahundul Ibana do nasida be tu inganan na so olo muba ro di salelengleleng-na; djala nang pe sega sude portibion, ianggo i ndang mago (Joh. 14, 2; Pang. 22, 5).

Dung i didjaha nasida dope tu ibana, taringot tu pambahenan ni angka naposo ni Tuhan i, i ma: Angka na paundukkon haradjaon; morparanghon hatigoran; mandjalo bagabaga; mangkuntam baba ni angka *Singa*; mangintopi gorgor ni api; haluaonnasida sian baba ni podang; na gabe morgogo angka na gale hian; angka na gabe parangan di hamusuon, djala monang (Hebr. 11, 33. 34).

Dung i muse, didjaha nasida dope tu ibana, sian surat na asing, na di bagas i. Tarida disi: Balga ni holong ni Tuhan i, dohot lambok ni rohana, nang pe balga dosa ni manang ise dompak Ibana, dohot dompak hatana. Angkup ni, adong dope disi: angka djamita na asing, angka halongangan, songon naung masa di Si *Kristen*, dohot angka na so masa dope; dohot taringot tu pambahenan, dohot djorbut ni musu i. Angkup ni: taringot tu apulapul dahot hasonangan, tu angka na mandjalahi hangoluan. Sude dipaboa nasida tu Si *Kristen*.

Dungi morsogotna i, ditogihon nasida ma Si *Kristen* tu bagasan sada bilut, porpeopan ni angka sindjata, (ni halak Kristen) dipatuduhon nasida ma disi ragamragam ni sindjata. Sian i ma dipambagihon Tuhan i tu angka na mangalului hangoluan, i ma angka: podang, lombulumbu, tahuluk Soldadu, badju portahanon, badju na so ra sega. Angkup ni sindjata portangiangon; djala manisai torop do angka porhohas i, singkop do pangkeon ni manang angka halak, nang tung sura songon bintang ni langit i toropnasida (Eph. 6, 10—18; 1 Thess. 5, 8).

Dungi dipatuduhon nasida dope tu Si *Kristen*: torop angka ulaula, angka na pinangke ni naposo ni Tuhan i, patupahon angka halongangan, songon: Tungkot ni Si Musa; tongkok bosi rap

dohot labang, na pinangke ni Si Jael mamunu Si Sisera; dohot angka hudon, dohot sulu damar, dohot sarune, na pinangke ni Si Gidion manaluhon parangan ni halak Midian (Exo. 7, 9. 20; 8, 16. 17; Num. 20, 9; Pang. 4, 2). Djala dipatuduhon nasida dope tu ibana, lombutlombut na mortanduk songon lembu djantan, na pinangke ni Si Samgar, mamunu 600 halak Philistin; dohot holiholi, isang-isang ni halode, na pinangke ni Si Simson, mangulahon torop tanda hagagoon, ro di ambalang, dohot batu na pinangke ni Si David, mamunu Si Goliat halak Enak sian huta Gat. Dungi adong muse dope sada podang na pinangke ni Tuhan i mamunu halak pordosa (panurirang porgabus i) di ari harorona, mambuat tabantabanna (Panguhum 3, 31; 1 Sam. 17, 49. 50).

Angkup ni sudena i, dipatuduhon nasida dope tu ibana, ragam ni angka ugasan na badia, na parohon las ni roha bolon tu Si *Kristen*. Dungi mulak ma ibana tu inganan hamodomannasida i.

Didok nampuna djamita on, huida dope di bagasan nippingku: Morsogotna i naeng mordalan ma Si *Kristen*, alai dipangido nasida dope, asa mian sadarinari Si *Kristen* disi. Ai ninna nasida do: Naeng dope patuduhononami tu ho angka dolokdolok hasonangan, molo tung torang langit i saotik, asa dapotan apul-apul ho, sian djonok ni inganannami on, tu inganan sitopotonmi. Dungi dioloi Si *Kristen* ma pangidoannasida i. Asa dung manogot i, ditogihon nasida ma Si *Kristen* tu atas ni bagas i, didokkon nasida ma ibana manatap dampak habinsaran, djadi dung ditatap: Ida ma! diida ma sada inganan na mordolok na djagar pinadjagar ni angka hau na tubu, dohot ragam ni suansuanan, angka na morporbue, dohot angka sunge, dohot bungabunga na lehet, dohot batang aek, tung djagar situtu do idaon (Jes. 33, 16). Dungi disungkun ma tu nasida: «Luat dia do i?» Alusnasida: «I ma luat ni Tuhan Immanuel,» na pinarade djala na niungkap songon bagas bolon on, tu saluhut angka na mangalului hasonangan. Molo dung sahat ho muse tusi idaonmu ma sian i pintu ni huta na di surgo. Adong do disi angka halak pormahan, na patuduhonsa muse tu ho.»

Djadi tarhilas ma roha ni Si *Kristen* mandalani sidalananna i; djala i do lehet di rohanasida. Ala ni didok nasida ma tu ibana: «Denggan do i! alai beta djolo satongkin tu bagasan bilut ni angka sindjata.» Dungi laho ma nasida sude tusi; asa dung sahat nasida ro disi, dilehon nasida ma tu ibana pahean ni dagingna sian uluna ro di patna; na togu situtu pahean i, ai aut tung beha adong pormaraan tu ibana di dalan i.

8. Si Kristen di rura haserepon ni roha.

Asa, dung dipangke ibana pahean i, mordalan ma ibana ro di harbangan rap dohot alealena i. Dungi disungkun ma sidjaga pintu i, manang naung adong diida mamolus halak, silului hango-luan, salpu nangkin!

Dungi dialusi Si *Djaga pintu i ma*: «Adong do huida.»

Si *Kristen*: «Ditanda ho do ibana?»

Si *Pandjaga*: «Nunga husungkun goarna, djala didok do: «Si *Habonaronnatongtong*» do goarna.»

Si *Kristen*: «O! hutanda do nian ibana, ai saluat do hami, djonok be do hutanami; na ro sian luat na hutadingkon i do ibana, i ma inganan hatubuanku. Nunga sadia dao ibana salpu di roham?»

Si *Pandjaga*: «Di rohangku nunga di toru ni dolok on ibana. nuaeng!»

Si *Kristen*: «Denggan! Dilehon Debata ma tu ho hasonangan, djala lam ganda ma pasupasuna di ho, godang do tarimaksi hudok di ho, ai nunga dibahen ho na denggan tu ahu.»

Dungi mandatdati ma Si *Kristen* mordalan tu djolo, djala didongani Si *Hapistaran*, Si *Haholongan*, Si *Biarmidadebata* dohot Si *Manat* ma ibana, ro di bona ni dolok i. Djadi mordalan ma nasida rap dohot ibana, djala sai didatdati nasida do mandok hata sipodaon na denggan, songon angka naung salpu i tu Si *Kristen*. Djadi dung sahat nasida ro di bona ni dolok i, ninna Si *Kristen* ma: Dos do huhilala susana, manganangkohi dolok on, dohot manuati.»

Dungi didok Si *Hapistaran* ma: «Tutu do na nidokmi, mansai godang hasusaan di na laho tuat tu rura *Haserepon*, (urduk ni roha) songon ho nuaeng. Aut tung beha tarsulandit ho, ala ni do umbahen hudongani hami ho ro di bona ni dolok on.» Djadi diingot Si *Kristen* ma i di na manuati ibana, alai atik pe songon i, tarsulandit do ibana, sahali dua hali.

Didok nampuna djamita on: huida ma di bagasan nipingku, dung sahat nasida ro di bona ni dolok i, dilehon angka aleale na denggan i ma tu ibana sangkimpal roti dohot sabotol anggur, dohot sasaputan porbue ni hau anggur. Dungi mordalan ma sasadasa, mandatdati sidalananna i.

Asa dung nania lelung ibana mordalan, sahat ma ibana ro di sada rura na morgoar: *Haserepon*. Mansai asi roha di Si *Kristen*, di na sahat i ibana tusi; mansai lodja do dihilala laho manalpu i. Asa songon i ma pangalahona; djadi diida ibana ma ro sian djolona, sian adaran i, begu na morgoar: Si *Apollion* (Pang. 9, 11) astuanna: *Sipangago*. Dung diida Si *Kristen* ibana, mansai

biar ma rohana, huhut morpingkir di bagasan rohana: Beha ma bahenonku nuaeng, mulak ma ahu! manang mortaon dison.

Songon i ma pangalahona, di na so ibana morpingkir, huhut ninna rohana: Molo hutundalhon ibana nuaeng, beha nama ahu? ai ndang morlombulombu pudingku, djadi mura hona sumbiana ahu. Ala ni hupagomos ma rohangku, djongdjong mando-pang Si *Apollion*, djala didok ma muse di bagasan rohana: «Nang pe mago hosangku sahali on, hot do anggo baritangku.» Djadi mordalan ma ibana mandapothon Si *Apollion*. Dungi dibereng ma ibana, diida ma rupa ni Si *Apollion*: djorbut situtu, ai morsisik do ibana songon ulok na djorbut, djala adong do dua habongna, songon habong ni haluang, djala patna do songon pat ni naga. Sian butuhana do ruar api, dohot timus moripulipul, djala ngangang do babana, songon baba ni Singa (Hiob. 4, 6). Asa dung djonok ibana tu Si *Kristen*, diserbeng ma ibana, huhut manungkun ninna ma:

Si *Apollion*: «Na ro sian dia do ho, djala naeng laho tudia?»

Si *Kristen*: «Na ro sian huta hamagoan do ahu, inganan ni saluhut hadjahaton; naeng laho do ahu tu luat *Zion*.»

Si *Apollion*: «I ma tandana, djumpang do ho; naposongku do ho; ai sude do angka luat na pinandokmi, ahu do nampunasa i, ahu do radjana djala tuhanna disi. Dia do alana umbahen maporus ho sian radjam? Aut unang ninna rohangku: naposongku do ho, djala oloanmu hatangku tu djoloan on, nunga hulombut ho dohot lombutlombut on, djala hupahornop ho songon tano.»

Si *Kristen*: «Tutu do, tubu ahu di luat na ginomgommanmu, alai sude angka parentam i, tung na djahat situtu do; angkup ni gadjim, ndang sae hangoluhononku, ai upa ni dosa, hamatean do (Rom 6, 23). Djala dung magodang ahu, bongot ma dohot tu rohangku pingkiran i, ala ni hulului ulaon na dumenggan sian ulaonmu.»

Si *Apollion*: «Ndang adong nanggo sada radja, na pasombuhon porripena laho, soada alana; ahu pe songon i do, ndang na paluaonku be ho. Denggan ma i, ala diporsingirhon ho gadjim dohot ulaonmu; asal ma mulak ho nuaeng, adong do i djumpang ho di luathu, hupadanhon ma i: lehononku tu ho.»

Si *Kristen*: «Nunga morpadan ahu dohot Radjangki, pola manolon ahu di djolona, ndang tarbahren ahu be mangose i.»

Si *Apollion*: «Tu ahu pe nunga dibahren ho songon i, djala sesaonku do sudena i, asal ma mulak ho!»

Si *Kristen*: «Aha ma na hupadanhon dohot ho? Djala hubahen pe sisongon i, ala ni haotoonku do; ndang adong porbino-toanku, dohot pangkilalaanku, saleleng di gomgommanmu ahu. Tutu dihaolongi rohangku na sailaon, angka pambahenan na roa,

angka na hubahen, udju rap ahu dohot ho. Songon i ma ale *Apollion* pangalahongku udju i, alai lumas situtu rohangku, di ulaon ni Radjangku nuaeng, ai gadjina, ulaonna, angka parentana, huriana dohot luatna na sumurung situtu do, lumobi sumurung do i sude, sian angka na di ho luhut, ale *Apollion*. Asa unang ma paksa ahu mulak tu ho, naposo ni radjangki nama ahu nuaeng, sai ihuthononku do Ibana.»

Si *Apollion*: «Timbang ma di roham dengganna, aha do dengganna djumpang ho di dalan na naeng dalananmu? Boto ma dengganna: Sude naposo ni Tuhanmi, morhasusaan do di udjungna, ala mangalo tu ahu, dohot dompak saluhut dalanku. Godang do sian nasida tarbunu, pinasiaksiak. Nuaeng dipaboa ho, taringot tu ulaonna, dumenggan sian ulaonku, alai so dung dope Ibana ruar sian ingananna i, paluahon angka naposona sian tanganku. Alai anggo taringot tu ahu, nunga torop halak umbotosa, sude manisias na di tano on tahe: naung lan do hupalua sian tangan ni Tuhanmu, morhitehite gogongku, manang sian ansiansi, songon i ma dohot ho, hupalua pe ho sian tanganna.»

Si *Kristen*: «Molo tung lumambat, asa ro pangurupi ni Tuhan i paluahon naposona, pangundjunina do i di holong ni rohanasida tu Ibana, manang na olo do nasida morsigantung tu Ibana ro di udjungna. Dungi taringot tu arop ni roham, i ma hasusaan angka na tinaonnasida, gabe hasangapon do i di nasida muse. Ai nasida pe, diboto do: Na so morhasonangan nasida di tano on, umbahen dipaimaima nasida hasonangan na naeng ro dope, i ma, molo ro Tuhannami morhasangapon rap dohot angka surusuruanna na badia i (Math, 25, 31; Kol. 3, 4).»

Si *Apollion*: «Alai ndang burdju diulahon ho ulaon ni Tuhanmi, tung mangarop ma roham, mandjalo upa sian Ibana?»

Si *Kristen*: «Di angka pambahenan dia ma hurang haburdjuonku ale *Apollion*?»

Si *Apollion*: «Di mulana mordalan dope ho, mamintor tar-gasip do, di na madabu i ho tu gambo *Ganggu ni roha*. Angkup ni, naeng undjunanmu paneang sibonanmu di dalan na so tigor. Nda dumenggan nian paimaimaonmu haroro ni Tuhanmu, asa Ibana mananggali sian ho? Debanari salam, tarlalap modom ho, gabe mago ma artam na arga i. Dung i pola naeng mulak ho, ala ni biarmu mida Singa. Dung i na hinatahonmi taringot tu pordalanammu, na niidam pe, dohot na binegem, sude do dipaboa-boa ho, mambuat pudjipudjian tu ho.»

Si *Kristen*: «Tutu do i sude, djala lan dope na so pina-boam. Alai na lambok do roha ni Tuhanku, na husomba i, ti-bu do saleschononna sudena i. Dungi angka tihashi sasude, na lohoh tu ahu udju di luatmu, pola morhoihoi ahu manaon, nunga husolsoli rohangku ala ni, djala nunga dapot ahu hasesaan ni si-

an Tuhanku.»

Dung i hehe ma Si *Apollion*; djorbut do ibana djala patungoripon mandok: «Ahu do musu ni Tuhanmi, huhasogohon do Ibana, nang hatana, dohot angka naposona; na mangalo ho do ahu antong umbahen ro!»

Si *Kristen*: «E! *Apollion*, ingot ma na naeng bahenonmu tu ahu, ai di bagasan dalan ni Tuhanku do ahu, (i ma dalan na badia i,) ala ni djaga situtu ma ho.»

Djadi dipabalga Si *Apollion* ma dirina nasa bidang ni dalan i; didok ma: «Ndang mabiar ahu, dibahen i. Hobas ma bahen dirim, ai na mate ma ho; nunga manolon ahu tu goar ni na roko na umbagas i, ndang tarbahen ho be meret sian on; dison ma putusonku hosam.» Dungi disiorhon ma sada sumbia tu andora ni Si *Kristen*, alai ndang hona; ai lombulumbu na di tanganna i do disorohon, djadi malua ma ibana sian hamagoan i. Dipagopas Si *Kristen* ma huhut dirina mangalo, ai nunga tangkas diida, tingki poraloon do nuaeng. Alai sai digogoi Si *Apollion* do maniori, hira udan na madabu do angka sumbia i dompak Si *Kristen*, gabe mabugang ma ulu, pat, dohot tanganna, atik pe sai didengkari sian nasa malona, djadi sumurut ma ibana otik tu pudi. Djala dung diida Si *Apollion* songon i, diambat ma Si *Kristen*, alai Si *Kristen* i pe, dipapir ma rohana mangalo Si *Apollion* sian nasa gogona. Leleng ni satonga ari do portongtangon na sobu on, paima sungkot hasusaan ni Si *Kristen*, ai lam hansit ma angka bugangna i; djala lam leleng, lam tu galena ma ibana.

Asa dung diida Si *Apollion* songon i, didapothon, djala dilodjong ma Si *Kristen*; dirangguthon ma, djala dilodjai, morhitehite angka pambahenan na djorbut, pola galegale, djadi tinggang ma Si *Kristen*, djala malua dohot podang sian tanganna. Dungi dipagogo Si *Apollion* ma soarana mandok: «Nunga guru di ahu ho nuaeng.» Djala Si *Kristen* pe, ndang be dihirim rohana ibana mangolu, ai nunga naeng padosonna ibana dohot tano. Alai diurupi Debata do ibana, ai di na naeng tihamon ni Si *Apollion* ibana, naeng putusonna halak na ture i, manigor hatop do disala Si *Kristen*; ditangkap ma podang i, djala dapotsa ditiop, huhut mandok: «Unang surakkon ahu ale musungku, ala dung tinggang, ai sai na hehe dope ahu» (Mik. 7. 8), laos ditihamhon ma podang i tu Si *Apollion* tongon ma hona porgisihanna. Mangilala ma Si *Apollion* i di bugangna i, ala ni sumurut ma ibana tu pudi. Asa dung songon i diida Si *Kristen*, ninna ma: «Nunga huhamonangkonsude poraloan on, morhitehite na mangkaholongi hita (Rom. 8, 37—39).» Djadi dipaherbang Si *Apollion* ma habongna, laho habang; gabe so diida Si *Kristen* be ibana (Jak. 4, 7).

Tutu, taringot tu porporangon na sobu on, ndang adong na mangkilala di bagasan rohana, nda holan angka, na umbege, na

mornida, djala na morporang disi; ai begeonna ma bolon ni soara dohot surak ni *Si Apollion* di bagasan porporangan i, songon soara ni naga moruoror djala morioho, alai na sambariba musunari, i ma *Si Kristen*, marsak do djala morhosa godang, huhut morhoi (Eph. 6, 10—18).

Ninna nampuna djamita on: Saleleng na moralo i *Si Kristen*, ndang dung mira bohina huida, dung pe ditullang *Si Apollion* dohot podangna sidua baba i, asa mengkel ibana otik, djala manaili dampak gindjang; tung na djorbut do tahe sudena i huida, ai ndang dung huida dope sisongon i. Dung sun na mormusu i, ninna *Si Kristen* ma: Mauliate ma hudok nuaeng tu Ibana, na paluahon ahu sian baba ni singa, djala laos Ibana muse pamonang ahu mangalo *Si Apollion*; huhut ma ibana morende ninna ma:

«Anggo holan gogonta i:
Tibu do mago hita!
Alai dibahen Jahowa i
Ulubalang di hita.
Ise do goar ni?
I ma antong Jesus i,
Na sasadasa do
Debata na tutu;
'Ndang tarbaen so monang.
Nang pe gok begu tano on,
Na naeng mamolgak hita,
Ndang i habiaranta on;
Sai ingkon monang hita.
Ai nang porrimas pe
Sibolis i, tahe,
Ndang habiaran be
Naung hona uhum i
Ditaluhon sahata.»

Asa dung songon i, ro ma tongkin i tangan sada tu *Si Kristen*, na maniop bulung ni hau hahipason; dungi dibuat *Si Kristen* ma bulung i, didaishon ma i tu angka bugangna, na hona di porporangan i, djadi manigor malum ma sude dihilala. Dungi hundul ma disi mangan roti, dohot minum anggur, na djinalona nangkini. Asa dung morgogo dagingna, morhobas ma ibana laho borhat, mandatdati mordalan; alai anggo podangna i, sai umpat do dipatioptiop; ai disura rohana, atik beha adong dope pormaraan na asing djumpangsa di dalan i. Alai ndang be pormaraan nian ro tu ibana sian *Si Apollion* salpu rura i.

9. Si Kristen di rura linggoman ni hamatean.

Alai udjung ni rura i udut tu sada rura na asing, na mor-goar: «Ruralinggomannihamatean» (Ps. 23, 4). Apala sian tonga ni rura i ma dalan tu luat na uli situtu i. Alai songon na so hasalpuan Si *Kristen* do idaon, ai manalisik, djala mansai lungun do rura i, songon na nidok ni panurirang Jeremias: «Sada halongonan na rambaon djala na morlehulehu, na lungun, djala na manalisik; tano hamatean na nilinggoman ni haholomon, i ma santurpuk tano na hasalpuan halak, (holan Si *Kristen* sambing) djala sumusa do Si *Kristen*, laho mamolus rura i, sian na moralo dohot Si *Apolion*. Botoonmu do i annon.

Didok nampuna djamita on: Huida ma di bagasan nipingku, dung sahat Si *Kristen* ro di tobing ni rura i, padjumpang ma ibana dohot dua halak, angka na mamboan barita na roa, taringot tu tano na denggan i (Num. 13, 32). Na mulak do nasida djala hatop situtu. Dung i mangkatai ma Si *Kristen* dohot nasida, ninna ma: «Naeng tudia do hamu?»

Alus ni halak i: «Mulak! mulak ma dohot ho, molo naeng ho sonang, mordame djala mangolu.»

Si *Kristen*: «Boasa! ala ni aha?»

Halak i: «Dia alana nimmu! Nunga hudalani hami dalan na naeng dalananmi, aut tung sura sai hudatdati hami dope mordalan tu djolo, ndang mulak be hami mamboan barita i tu ho.»

Si *Kristen*: «Beha? aha padjumpang dohot hamu?»

Halak i: «Oe! naeng masuk ma hami nian tu rura linggoman ni hamatean i; tung hami ma, moruntung dope hami mulak, dung huida hami; hamagoan do hape disi.» (Ps. 108, 10—12).

Si *Kristen*: «Aha ma na niidamuna i?»

Halak i: «Ah, mansai holom situtu rura i, djala huida hami angka begu, sibolis dohot naga ni na roko i. Hubege hami dope huhut dibagasan rura i, adong angka na patungoripon, na mangandungi, na morhoihoi djala morisuang songon halak na morsidangolon di bagasan haporsuhon, angka na tarrante dohot na tarbeang. Huida hami dope di atas rura i morhobothobot, djala di gindjang ni, hamatean na mangkerbangkon habongna, na manunggul ganggu ni roha huhut; ai tung na djorbut situtu do sudena i; guntur morhaliosong, hira na so binoto dohonon (Job. 3, 5. 10. 22).»

Si *Kristen*: «Sude hinatahonmuna i, ndang dope tutu djumpang ahu sisongon i, alai on do dalanki sibolusonku, asa sahat ahu tu inganan poradiananku.»

Halak i: «Denggan, molo i do dalanmu, dalani ma, alai

ndang be ringkot anggo rohanami.»

Dungi sirang ma nasida, masitondong dalanna be ma. Iä Si *Kristen*, sai umpat do podang i dipatioptiop di na mordalan i ibana, dibahen biarna; disura rohana padjumpang ibana dohot musu.

Ninna nampuna djamita on: Huida ma di bagasan nipingku, adong sada godung na bagas situtu tungkan siamun, näsa gandjang ni dalan. I ma godung inganan portuktuhan (portingangan) ni angka na mapitung, portogi ni na mapitung di tingkina; gabe duaduansa nasida targodung tu bagasan i. (Math. 15, 14) Djala huida muse tungkan hambirang ni: adong sada gambo, hamagoan bolon situtu di bagasan i. Molo tung madabu halak tusi, nda tung na djumpangsa be sidegean ni patna. Tu gambo i ma madabu Radja Daud na djolo, pola mago ne, aut unang porgogo na so hatudosan i manait ibana sian i (Ps. 40, 3). Mansai sompit do dalan i. Disi dibereng Si *Kristen* i, mansai marsak ma ibana. Naeng guncm ne ibana tu gambo na di hambirang, djadi morpingkir ma ibana naeng paluahon dirina, djala andorang songon i, madabu ma ibana tu godung na di siamunna i.

Asa songon i ma pangalahona manalpui i, huhut hubege ibana morhosa godang, ala rura na ni linggoman ni haholomon i; hira mabiar ibana mangalangka, ala so diboto manang dia hao-djahan ni patna.

Di porsitongaan ni rura i, baba ni na roko i huida, djala di tongatonga ni dalan i do ingananna. Disi ma morpingkir Si *Kristen*: «Becha na ma ahu nuaeng? Disi ma api na mornalana djala mortimus, mortimburak dohot angka balontungna, suara angka na djorbut pe tarbege huhut disi. Alai ndang pola anggo tung songon biar ni Si *Kristen* udju moralohon Si *Apollion* na djolo, biarna nuaeng, ala ni dipasarung ma podangna i. Sindjata na asing ma ditiop na morgoar: «*Portangiangon*» (Eph. 6, 18). Hubege ma suara pandjouon ni Si *Kristen*, songon on: Ale Debatangku, sai ramoti ma tondingku (Ps. 116, 4). Dungi mordalan ma ibana, djala didjomba angka dila ni api i, huhut dibege sada suara na morsidangolon, djala mangguhangguk, songon halak na mangarimpu ibana maribak djala magopu. Tarida do na djorbut i, djala tarbege suara na siarsahon i manang piga mail daona. Djadi di na sahat ibana tu sada inganan, disurasura rohana ma, ro begu torop tu ibana, ala ni, hundul ma ibana mamingkiri sibahenonna.

Sipata pingkiranna: Dengganan ibana mulak, alai dipingkir muse: Nunga tahe ro di porsitongaan ahu, djala nunga huhamonangkon angka hasusaan dohot pangundjunan angka naung salpu i; gumodang nama hamagoanku molo mulak sian na mandatdati tu djolo. Djadi putus ma pingkiranna, ingkon datdatanna tu djolo, atik pe dibereng lam djonok begu i tu ibana. Djala dung lam

donok, mandjou ma ibana, ninna ma: «Sai na datdatanku do mordalan tu djolo mangasahon gogo ni Tuhan Debatanku! (Ps. 71, 16).» Djadi ala ni, sumurut ma tu pudi angka begu i.

Adong dope sadanari na so tarhalupahon ahu, i ma: Na gabe maoto i Si *Kristen*, gari suaranya handiri ndang be ditanda, dung sahat ibana tu lambung ni godung na roko i. Ai adong ma sada begu na djahat, mangihuthon ibana sian pudi, dihusiphon ma tu ibana, angka hata bura dohot pangaleaion pola dirimpu Si *Kristen* ro sian pingkiranna i (Sibolis i naeng mangaleai ibana). Djadi lam ganda ma susana, pola songon na djut pingkiranna, ai ninna rohana: Nunga dileai ibana Radja i, naung hinaholonganna na djolo; alai sai didjaga do nian dirina, asa unang diulahon sisongon i. Alai ndang adong tarbahen paboahon, manang adong na paontokkon, asa unang tarbege be soara i, djala umboto manang sian dia ro hasusaan i.

Asa songon i ma arsak ni rohana, di na mandatdati ibana mordalan, manang sadia dao, dung i hira na dibege do soara ni sada halak na mordalalan di djolona, mandok songon on: «Ndang pola mabiar ahu mandalani rura, dohot linggoman ni hamatean, ndang huhabiari hamagoan, ai Ho do donganku!» (Ps. 23, 4).

Dung dibege Si *Kristen* hata i, mamungka sonang ma rohana; alana, pordjolo: Torang ma di ibana di pordalananna i, adong dope halak na asing na mangkabiari Debata, mordalan sian bagasan rura i. Paduahon: Djumpangsa ma: Debata do na mandongani nasida, nang pe di na holom morimpotimpot. Molo songon i Debata do dohot mandongani ahu, nang pe songon na tarholip Ibana sian pornidaanku, ala ni haholomon na di tongan dalan on, aha dope sihabiaranku! (Hiob 9, 11). Patoluhon: Mangarop ma rohana, djumpangan donganna sauduran ma ibana, ia dung padjumpang nasida muse.

Dungi mordalan ma ibana, huhut mandjoudjou tu halak na djumolo mordalan i; alai ndang diboto pordalan naung djumolo i, manang ise mandjou ibana. Ala ni ndang barani ibana mangalusi, ai dirimpu do sasada ibana mordalan di rura i. — Dungi pintor binsar ma ari, djadi hiras ma roha ni Si *Kristen* mandok: «Olo nunga dipauba linggoman ni haholoman i gabe hatiuron (Amos 5, 8).»

Asa dung torang ari, mamereng ma ibana dompak pudi, naeng tangkas idaonna, angka djea naung sinalpuanna dibagasan borngin i, di na mordalan i ibana di na holom morimpotimpot i. Djadi diida ma tutu godung na dingkan siamun i, dohot angka gambo na dingkan hambirang, dohot sompit ni dalan, na di tongatonga ni na dua i; djala diida ma: Sibolis, angka begu, dohot ulok naga, di bagasan baba ni ruang ni na roko i. Alai ditatap sian na dao do i sude, dung tiur situtu ari, ndang barani ibana djumonok, ai nunga torang sude diida angka i, songon na tarsu-

rat di buku i: «Nunga dipatorang ibana angka pangalaho hasimoon, na di rura ni haholomon nilinggoman ni hamatean, paruarhon tu hatorangan» (Hebr. 12, 22). Las ma rohana, ala naung malua ibana sian hamagoan i; ai nunga mabiar hian ibana di angka djea i. Alai anggo nuaeng, nunga tangkas dibereng, ai nunga tiur disondangi mata ni ari. Lam timbo ma mata ni ari, dohot i ma gabe pangurupion tu *Si Kristen*. Alai timbangi ma: Susape di na mordalan di rura linggoman ni hamatean i, sumusa dope di dalan na naeng dalananna dope. Ai olat ni inganan hadjongdjonganna nuaeng, lan ma, angka tali sambil, tirangkap, djorgong, godung dohot partuktuhan, ro di pansidungan ni rura i. Aut tung disi ibana mordalan udju holom ari, songon di mulana mordalan di rura i, nang pe adong di ibana saribu tondi, tung na so mangolu do. Alai songon naung hudok i: Lam timbo do mata ni ari, djadi didok *Si Kristen* ma: «Palitona manondangi ulungku, djala hinorhon ni hatiuronna i, hasalpuan ahu do angka na holom morimpotimpot» (Hiob 29, 3). Hatiuron i ma mangurupi *Si Kristen*, djadi mordalan ma ibana ro di udjung ni rura i.

Dungi huida ma di bagasan nipinku: di udjung ni rura i adong angka mudar, holiholi dohot sirabun, dohot daging na djinaldjalan mortanggotanggo, sian angka halak na mordalan disi na djolo. Alai udju hundul ahu mamingkiri i, dapot matangu ma sada liang ni tolu halak; i ma Liang ni Paus, liang ni Silom, dohot liang ni halak porbegu.

Disalpu i *Si Kristen* ma i, ndang morhasusaan, ai nunga songon na mate ne halak porbegu dohot Paus; na porpudi i dibahen tuana dohot ala naung torop bugangna, pola tos di angka ringringna, ndang tarbahensa be mambahen manang aha djea, holan djuguk nama ibana di baba ni liang i, mamerengi halak na mordalan i, huhut mangkaharati sisilonna. Alai anggo dongana na sada i, i ma Silom i morgogo dope. Djadi di na mandatdati mordalan *Si Kristen*, dibereng ma Paus na gale i, na hundul di baba ni liang i ndang diboto be manang dia sidohononna; dungkon ni on: «Ndang dapotan roha hamu, paima tinutung hamu muse.» Alai sip do *Si Kristen*, huhut dipahusor bohina laho mandatdati mordalan, so morhasusaan be. Dungi morende ma ibana, ninna ma:

«Ndang na tarhatahon halongangan

Taringot tu haluaonku sian hamagoan:

Rura hamatean i, dohot tolu pangambat i.

Sipalua ahu, i ma pudjionki.

Holom morimpotimpot mangkaliangi ahu di pordalanan,

Alai mangolu dope ahu, hipas dope mordalan,

Sian pangurupi ni Kristus Tuhanki.»

10. Si Kristen djumpangan donganna.

Ninna nampuna djamita on: Didatdati Si *Kristen* ma mordalan; djadi sahat ma ibana tu sada inganan adaran, na pinauli, bahen portinandaan tu angka pordalan. Ala ni nangkok ma Si *Kristen* disi, huhut manaili dompak djolo, djadi dapot matana ma Si *Burdju* (*Bonartongtong*), mordalan di djolona. Dungi didjou Si *Kristen* ma ibana, ninna ma: «Paima! paima ahu! asa rap hita mordalan.» Dungi dialusi Si *Burdju* ma: Nandang! ndang tarbahren, naeng ahu palua diringku, ai di pudingku do Si *Hadjahaton* i, naeng manopsop mudarhu (Num. 35, 10). Dungi bukbak ma taroktok ni Si *Kristen* umbege i. Alai dipadoras ma mordalan mandapothon, pola disalpui ibana muse Si *Burdju* di dalan i. Songon i ma pangalahona, umbahren djotdjot: na pordjolo gabe porpudi, djala porpudi gabe pordjolo.

Djadi morlas ni roha ma Si *Kristen*, huhut mengkel dung didjeloani amparana i. Alai dibahren lodjana, galegale ma ibana, djala djotdjot tartuktuk, gabe tirggang ma ibana, so tarbahensa hehe; ala ni ro ma Si *Burdju* mangurupi ibana, ditogu ma ibana pahehehon. Olat ni i saroha ma nasida djala masihaholongan.

Ninna nampuna djamita on: Huida di bagasan nipingku, ala naung masihaholongan nasida be, gabe rap mardalan ma djala lehetlehet mangkatai, taringot tu angka pangalaho na masa tu nasida di pordalananna be. Songon on ma pangkataion ni Si *Kristen* dohot Si *Burdju*:

Si *Kristen*: «Ale ampара haholongan na burdju, mansai las rohangku dung padjumpang hita, djala mordomu (binahren ni Debata) pangalahom tu pangalahongku, di pordalananta na sumurung on dibahren Debata.»

Si *Burdju*: «Nang ninna rohangku hian nian, sai naeng do ahu rap dohot ho, andorang di luatmu dope ho; alai ala ditinggalhon ho ahu, djadi hupatomos rohangku mordalan sasada ahu ro dison.»

Si *Kristen*: «Sadia lelengnari dope ho maringan di huta hamagoan i, andorang so borhat ho mangihuthon ahu?»

Si *Burdju*: «Moradian do ahu djolo, paima so tartahan ahu be. Ai dung borhat ho, torop do angka na manganonangi taringot tu luat i, tibu nama segahonon ni api sian langit.»

Si *Kristen*: «E! dohot do angka donganmu mandok songon i?»

Si *Burdju*: «Olo! ndang pola sadia leleng, nunga torop halak mandok songon i.»

Si *Kristen*: «Beha do, ndang adong sian angka nasida, na dohot paluahon dirina, manang holan ho do?»

Si *Burdju*: «Ah, nang pe torop angka na mandok songon i, ndang piga na porsea sintongna masa, ai di na morbada nasida, adong do na mangelesi ho, dohot haporsuhonmu; alai anggo ahu, huhaporseai do, udjung ni hutanta i: ingkon tibu nama soksohan ni api dohot barerang na madabu sian langit hutanta i. Ala ni do umbahen maporus ahu paluahon diringku.»

Si *Kristen*: «Beha, adong do dibege ho taringot tu Si *Pananginangitongkin* i?»

Si *Burdju*: «Hubege do, diiluthon ho, ninna, ro di gambo Ganggu ni roha, djala didok halak, madabu ibana tu bagasan i. Alai ndang pola sidohonon hata on tu pinggol ni halak, ninna rohangku, nunga tarida ibana morgulu tu bustak na rotak i.»

Si *Kristen*: «Beha do didok angka donganna i tu ibana?»

Si *Burdju*: «Dung mulak Si *Pananginangitongkin* tu luatna, sai dilealeai halak do ibana rasirasa nuaeng; adong na manihasi, adong na mangelesi, adong na mangkasogohon. Nandang olo halak saor tu ibana, mangalehon ulaon pe so adong. Sumusa djala lumodja do ibana nuaeng sian na djolo, andorang so ditadingkon luatna» (halak siporbalikbalik ingkon maila).

Si *Kristen*: «Boasa pola songon i pangaleai nasida di Si *Pananginangitongkin* i, ai nang nasida dihasogohon do dalan na ni-dalananna di mulana.»

Si *Burdju*: «Oe didok halak: tama ma hona gantung Si *Pananginangitongkin*, ai porgabus do ibana, djala ndang tigor didalani sida-dalananna i. Ahu pe nang di rohangku, na sinunggul ni Debata do angka halak i, nang pe musuna, mangelesi ibana, asa gabe sipatudu tu halak na asing, paboa naung sumurut ibana sian dalan hangoluan» (Jer. 29, 18. 19).

Si *Kristen*: «Beha, dung ho mangkatai dohot ibana, andorang so borhat dope ho sian luatmi?»

Si *Burdju*: «Padjumpang do ahu sahali dohot ibana di tongan dalan; alai dung dibereng ahu, mameol ma ibana tu alaman na asing. Hira halak na maila do pangalahona, djadi ndang saut ahu mangkatai dohot ibana.»

Si *Kristen*: «Oe, mulamulana haruar ahu sian huta hama-goan i, hurimpu do djolma hasea ibana, alai nuaeng, husura nunga mago ibana rap dohot luatna i; tudos ma i tu hata ni umpama: Mulak tu utautana do biang i, djala na morgulu do babi di na rotakna, dung moridi» (2 Petr. 2, 22).

Si *Burdju*: «Nang ninna rohangku, laos songon i do pangalaho ni Si *Pananginangitongkin*; alai aha bahenonta, i nama pangalahona.»

Si *Kristen*: «Ale dongan *Burdju*, dumenggan ma unang tahatai be taringot tusi, taringot tu hita ma tahatahatai. Paboa ma djolo tu ahu: Angka aha do padjumpang dohot ho di pordala-

nanmi, ai huboto tangkas adong do padjumpang dohot ho manang aha; alai molo tung so adong halongangan bolon ma i tu ahu.»

Si *Burdju*: «Malua do ahu sian gambogambo hausopanmi udju i. Dungi sahat ma ahu tu pintu na sompit i, djala ndang adong hasusaanku, ia so holan na padjumpang i ahu dohot boruboru Si *babidjalang* i, naeng diagohon ne ma ahu.»

Si *Kristen*: «Denggan! Tuani ma malua ho sian djorgong-na i, ai i do na naeng mandjorat dohot Si *Joseph*, alai malua do ibana songon ho. Aha dibahen Si *babidjalang* i tu ho?»

Si *Burdju*: «Nandang tarpaboaboa be, tung mansai malo do dilana morhata, manglekelek ahu, mangihuthon ibana nian, djala dipadhanhon do: holan angka na tabo bahenonna tu ahu.»

Si *Kristen*: «Bo! asa morpadan ibana dohot ho, laho patoguhon roham nian?»

Si *Burdju*: «Ah, diboto ho do antong astuan ni na tabo ni roha ni daging di tano on, angkup ni lomo ni rohana na roa i.»

Si *Kristen*: «Dok ma mauiliate tu Debata, ala naung malua ho sian ibana, ai sogo ni roha ni Debata situtu do i, molo adong na lonong tu gambo ni boruboru Si *babidjalang* i» (Spr. 22, 14).

Si *Burdju*: «Nandang tarbahen ahu dope mandok, manang naung malua situtu ahu sian boruboru Si *babidjalang* i, manang ndang?»

Si *Kristen*: «Ah, naung hona do ho dongan?»

Si *Burdju*: «Nandang! ai ndang huulahon dope hadjahatonna i, ai huingot dope hata ni Si *Salomo* na mandok: «Udjung ni langkana i tu na roko (Spr. 5, 5). Ala ni hupapitpit do matanku mamolus, asal unang dapot ahu, binahen ni solosolona i, djadi dileai ibana ma ahu» (Hiob 31, 1).

Si *Kristen*: «Nandang adong be pangundjunan na asing tu ho di dalan i?»

Si *Burdju*: «Di na sahat ahu tu bona ni dolok *Hasusaan* i, padjumpang do ahu dohot sada halak na matua. Djala disungkun do ahu, ninna ma: «Laho tudia do ho? djala ise do ho? Dungi hualusi ibana: «Sada halak pordalan do ahu, na laho tu tano hasonangan!» Didok na matua i muse: «Huida pangalahom songon sada halak na burdju djala na bonar. Olo do ho tinggal rap dohot ahu? djala olo do ho mandjalo upangku na hulehon?» Dungi husungkun ma ibana: «Ise do goarmu?» Dungi didok ma: «Goarhu Si *Adam* pordjolo, di huta *Sipatooto* do ahu moringanau.» (Eph. 4, 22). Dungi husungkun muse ma ibana: «Aha do ulaonmu, djala aha do gadjim, na naeng lehononmu tu ahu?» Alusna: «Ulaonna i, ninna, mansai tabo, djala gadjina, ninna, i ma: ahu pancan ni sude.» Dungi husungkun muse: «Aha ma pangisi ni bagasmu, djala angka ise do anak gadjianmu?» Alus-

na: «Pangisi ni bagashu, i ma: ragamragam ni na tabo di hasiangan on, djala angka gadjianku, i ma: angka anakku.» Dungi husungkun ma: «Piga do anakmu?» dungi dipaboa: tolu boruna. Pordjolo: Roha sibuk; paduahon: Ringkotringkot ni mata; patuluhon: Hadjungkaton di hangoluan. (1 Joh. 2, 16). Molo olo ahu, didok do: djadi ahu morbagas dohot nasida. Dungi husungkun: «Sadia leleng ahu dipangido roham dohot ho?» Alusna: «Saleleng mangolu ahu.»

Si *Kristen*: Dia do udjungna porsiranganmuna dohot na tuatua i? Si *Burdju*: «Anggo ibana, naeng ihuthononku do, ai ninna rohangku: na lehet do hatana i. Alai andorang mangkatai hami, ida ma! tarida ma di bohi ni na tuatua i tarsurat, songon on: «Tadingkon ma djolma na buruk i rap dohot ulaonna i!» (Kol. 3, 9).

Si *Kristen*: «Beha do udjungna?»

Si *Burdju*: «Sude hatana i hupingkiri ma, aut tung sura laho ahu tu bagasna i, gadisonna do ahu songon hatoban, ala ni hutinggalhon ma ibana, asa sohot hami mangkatai. Dungi didok ma, suruonna sada halak na paporsukporsuk ahu, mansai posi di pordalananku. Djadi hutadingkon ma ibana; alai dung sumurut ahu, huhilala ma songon na dibobok dagingku, hira satonga pangkilalaanku naeng mangihuthon ibana, ala ni tangis ma ahu mandok hata on: «Ahu djolma sitaon na porsuk» (Rom 7, 24). Djadi laho ma ahu manganangkohi dolok i. Asa dung morhira satonga dalan, manaili ma ahu dompak pudi, djadi huida ma, ro sada halak mangeahi ahu, hira angin do hatopna laho mandapothon ahu. Di lambung ni soposopo i, poradianan ni pordalan i do ahu didapot.»

Si *Kristen*: «Nang ahu, disi do modommodom, djala tarlap, dungi mago ma surathu balunan i sian hadjuthu.»

Si *Burdju*: «Olo ale ampara na deggan, tangihon ma djo-lo hatangkon ro di udjungna. Dung djumpang halak i ahu murhing do idaon, dilombuti do ahu pola mandate; alai dung tardjolma ahu muse, husungkun ma: «Boasa songon i bahenonmu tu ahu?» Dungi didok ma: «Ala dos do hisapmi dohot hisap ni Si Adam pordjolo i,» huhut ma dilombuti andorangku. Dungi tinggang ma ahu magulang tu lambung patna. Djala dung hehe ahu, hupagogo ma soarangku mandok tu ibana: «Asi ma roham mida ahu!» Alai didok ma: «Ndang huboto patuduhon asi ni roha;» djala dilombut ma ahu, naeng mamunu ahu ma nian di rohana. Saut do i antong, aut unang ro sada halak mangalelei ibana.»

Si *Kristen*: «Ise do i na mangalelei ibana?»

Si *Burdju*: «Ndang hutanda ibana, ianggo di mulana, alai dung tundal, huida ma: morruang do tanganna dohot patna dohot lambungna. Disi pe asa huboto, i do Tuhanta i. Dungi nangkok ma ahu.»

Si *Kristen*: «Halak na mandjumpangkon ho pordjolo i, i do Si *Musa*, na so umboto morasi ni roha, dompak angka na mangalo patikna.»

Si *Burdju*: «I ma tutu, nang ahu, huboto do i, ai apala sahali on be ibana padjumpang dohot ahu, nunga ro ibana andorang sonang dope ahu di bagashi; didok ibana, tutungonna bagas-hu molo sai huingani.»—

Si *Kristen*: «Ndang diida ho bagas i, na djongdjong di bariba ni dalan i, andorang na padjumpang i ho dohot Si *Musa*?»

Si *Burdju*: «Olo huida do, Singa i pe huida do andorang so sahat ahu tu bagas i; alai hurimpu naung modom pangisi ni bagas i, ai hos ari dope udju i. Djala ala na timbo dope ari, i do umbahen husalpui dope pandjaga i; dungi tuat ma ahu sian dolok i.»

Si *Kristen*: «Halak na mandjaga pintu i pe, didok do, diida do mamolus ho sian i. Alai mansai las rohangku aut bongot ho nian tu bagas i, djala dipatuduhon dohot tu ho angka halongangan na disini ndang halupahononmu be i ro di hamamatem, tung sura diida ho. Dungi husungkun muse ma ho: «Ndang padjumpang ho dohot manang aha di rura haserepon i?»

Si *Burdju*: «Padjumpang do ahu disi dohot Si *Marsak*. Sai disosoi do ahu asa mulak nian. Ninna ma: «Ndang adong hamuliaon di rura haserepon i; angkup ni didok dope: Molo naeng mordalan ho mamolus rura on mutap do roha ni angka donganmu mida ho, i ma: Si *Djunikat*, Si *Tingkal* (*Tuit*) *Sihului sangkap dohot Si Lului pudjipudjian*, ai dihasogohon rohanasida do tariparanmu rura i.»

Si *Kristen*: «Denggan! dia do alusmu?»

Si *Burdju*: Ningku tu ibana: «Nang pe donganku samarga sude na pinaboami, (ai sintong do tutu angka i donganku samarga, mangoloi roha sibuk na djolo) dung hulului hangoluan, dihasogohon nasida ahu, djala ahu pe huhasogohon nasida. Huhut ningku muse: «Taringot tu rura on, ndang sintong pandokmu, ai rura haserepon do hitehite tu hasangapon; ai manang ise na patimbohon dirina, sai na mago do ibana, ala ni do, umbahen naeng ahu manalpui rura i mandapothon hasangapon; ai pinillit ni angka na morlas ni roha (bisuk), ndada pinillit ni Si *Marsak i*.» (Philip. 4, 4).

Si *Kristen*: «Ndang adong be manang ise na asing, djumpang ho di rura i?»

Si *Burdju*: «Padjumpang do ahu dohot Si *Maila*. Alai sude angka naung padjumpaag dohot ahu, ndang adong na djumahat sian ibana; ai anggo angka na asing, olo do sipata manangihon adjar; ndada songon i Si *Maila*; sai morbada do ibana djala ndang olo morhatopothon goarna i.»

Si Kristen: «Aha do didok ibana tu ho?»

Si Burdju: «Ah! Maila do ibana di ugamanta; ninna do: «Ugama i, i do sada siulaon apala na lumea, djala na rumoa ni na roa.» Angkup ni: «lambok ni roha i, ninna, ndada i pahean ni bawa;» ninna muse: «angka na mangaramoti hatana handiri dohot na mandjangkon uhumna, tudoshon halak na tarrante do i, ndang songon sada porgogo na morhaluaon.» Djala didok muse dope: «Angka na sangap dohot na mora, rangkak do morugama; djala molo tung adong na naeng morugama na gabe lalaen do» (1 Kor. 1, 26; 3, 18; Joh. 7, 48). Dungi muse: Manang ise pe na mangalului hangoluan sian dalan on apala sian halak na balga, manang halak na sangap nasida, holan sian angka na lea djala na metmet do; angkup ni angka na oto djala na so morbisuk. Songon i ma pangelaelana di ahu pamasuk sipao-tootona i. Angkup ni, direhei do halak, angka na morilulu, umbege hata ni Debata, djamita sipaingot rupani. Nandang maila halak na marsakinarsak dohot angka na morhosa godang, naek midjur laho mulak sian garedja ninna. Dungi nda hasurahan do, molo olo mangido hasesaan ni salana tu angka donganna, djala singkatonna manang aha na tinangkona ninna. Djala ninna muse dope: «Ugama do manirangi halak sian angka na sangapsangap, djala mambahen hite mangkaholongi halak na pogospogos, ala na morsaugama. Ala ni ninna *Si Maila*, i do sada ulaon hailaon.»

Si Kristen: «Aha do didok ho tu ibana?»

Si Burdju: «Nandang haalusan ahu, anggo di mulana, hira na naeng talu ne ma ahu, pola rara bohingku songon pangalaho ni bohi ni halak na maila. Alai muse, lam morpingkir ma ahu songon on: Sude na timbo di halak, i do hagigian di Debata (Luk. 16, 15). Dungi hupingkir muse: Diboto *Si Maila* nian patorangkon pangalaho ni djolma, alai anggo pangalaho ni Debata, dohot hatana, ndang diboto paboahon. Dungi huingot muse: Ndada morguru tu hapistaran dohot angka patik ni halak mandabu uhum tu djolma di ari poruhuman i, morguru tu hapistaran dohot patik ni Debata do, manang tu hamagoan manang tu hangoluan. Ala ni ninna rohanku: Dumenggan do huihuthon Debata dohot hatana, nang pe sude portibion mangalo. Ai nunga huboto hian: Diporhamaol Debata do hadaulaton dohot saudara na so manolsoli; djala gabe angka na oto di portibion do na bisuk di roha ni Debata, djala ummora do angka na mangkaholongi Kristus, atik pe na pogos nasida di portibion, sian angka na mora hian na mangkosomi Ibana. Ala ni hudok muse ma: «Ho ale Maila, laho ma ho sian lambungkan ai nunga patar musu do ho di dalan tu hangoluanku, tung tama ma humolong rohanku di ho asa di Tuhanku? Djala aut tung hubahen songon i, ndang tarbahen ahu djongdjong moradophon bohina, molo dung ro Ibana. Djala molo tung hu-

hailahon ugamana dohot huriana, tung hirim be rohangku, haholonganna ahu?» (Mark. 8, 38).

«Sintong do Si Maila i, i do sada halak na djahat djala na so hasca; hira na so halongkangan ahu sian ibana, saleleng dipasusasa ahu. Sai dipangkusiphon do tu pinggolhu, asa sala ahu tu ugama i, alai ningku ma tu ibana: Unang be datdati mungundjuni ahu, ai hamuliaonku do i, ugama na nileaanmi. Laos sumurut ma ahu manadingkon ibana, djala morende ma ahu songon on:

«Lan do pangundjunan na ingkon djotdjot masa

Tu pordalan, na mandalani, dalan tu hasonangan na tu gindjang i;

Ingkon taluhononna: Sibuk, roha daging, angka musu i;

Sibolis, hisapna pe ingkon taluhononna,

Molo naeng morsonang i muse.»

Si *Kristen*: «Las rohangku, ala barani ho mangalo halak na djahat i. Sintong do na nidokmi: djumahat do ibana sian halak na asing, ai barani do ibana mangihuthon hita ro di tongandalan, djala pailahon hita di djolo ni halak, manuan hailaon di ulaon na denggan i. Aut unang halak na djungkat ibana tung na so tarbahensa do mambahen songon i. Alai sai taalo ma ibana sian nasa roha, ai hatahata sambing do angka pandokna i. Ninna Si *Salomo* do: Halak na bisuk do nampuna hamuliaon dohot hasangapon, alai halak na oto i dapotan hailaon na so morsamari» (Spr. 3, 35).

Si *Burdju*: «Dipingkiri rohangku do: Tapangido ma tu Debata siporgogo i morgogoihon hita asa taralo hita Si Maila i, ai dihalomohon Debata do angka na manaluhon ibana.»

Si *Kristen*: «Sintong! alai beha, ndang be na padjumpang dohot ho di bagasan rura i?»

Si *Burdju*: «Nandang! Ai dapotan sinondang ni mata ni ari do ahu di sude pordalananki dohot di rura lingoman ni hamatean i.»

Si *Kristen*: «Denggan! Tuani ma malua ho sian sude pangundjunan i. Alai anggo ahu, siol talu ma ahu sangombas, di na bongot i ahu tu bagasan rura i, ai mormusu na sobu do ahu dohot Si *Apollion*, ulu ni hadjahaton i. Pola do tinggang ahu dibahen, djala didegehon ahu; ala ni, songon na mate nama huhilala; malua dohot podang i sian tanganku. Dungi ninna ma: «Mago ma da ho!» Alai djoudjou ma ahu tu Debata, mangido pangurupion; djadi malua ma ahu sian hamagoan i. Dungi bongot ma ahu tu dalan na di rura lingoman ni hamatean i, ndang morsulu ahu; hurimpu ma disi ahu mate, hape ndang piga dan, binsar ma ari, djadi mordalan ma ahu mamolus rura i.»

11. Si Kristen dohot donganna, padjumpang dohot Si Lagehata.

Ninna nampuna djamita on: huida ma di bagasan nippingku, rap mordalan ma na dua i. Dungi manaili ma Si *Burdju*, gabe diida ma, ro sian na dao sada halak, na morgoar Si *Lagehata*; djadi ala na lambas dalan disi, tarbahen nasida na tolu i ma rap mordalan. Ia rumang ni Si *Lagehata* i, gindjang do, djala lume-het do tatapon dao, asa panotnotan djonok. Dungi mamungka mangkatai ma Si *Burdju* dohot ibana.

Ninna Si *Burdju* ma: «Heil ale dongan. na laho tudia do ho? naeng laho tu surgo do ho?»

Si *Lagehata*: «Olo! naeng laho tu surgo do ahu!»

Si *Burdju*: «Denggan! Molo songon i, ra donganku ma ho.»

Si *Lagehata*: «Ahu pe, las rohangku moralealehon ho.»

Si *Burdju*: «Beha ma, rap ma hita mordalan, huhut manga-nonangi, hata na tau hangoluan?»

Si *Lagehata*: «Ahu pe, mansai las rohangku mangkatai, molo hata hatuaonta, rap dohot ho, nang dohot na asing, ai sarongkan do ahu dohot halak na mangalului na denggan; ai na tutu do na hudok on: rangkak do angka na padjumpang dohot ahu, na olo mangkatai taringot tu hata, angka na parohon tua; ganup mangkatai nasida tahe, angka hata hagaoron do, marsak rohangku dibahen!»

Si *Burdju*: «Tutu do, parohon arsak ni roha do na songon i, nang tu rohangku, ai aha dope na dumenggan di tano on, sian dila na mangkatai, taringot tu Debata dohot hatana!»

Si *Lagehata*: «Mansai las do rohangku di ho, ala ni sude hatami, na gok habonaron dohot haburdjuon; ai tutu do, aha ma na lumobi, sian na mangkatai di hata ni Debata? Dia ma pangalaho na dumenggan sian i. Aut adong sada halak na naeng mangkatai angka halongangan, songon on rupani: diboto mandiordiori angka na simo di barita, manang mangalului, djala palusorhusor angka na di na tinompa, angka halongangan dohot angka tanda-tanda, djala dihatai nda dumenggan djala tumangkas dapot ibana i tarsurat di hata ni Debata?»

Si *Burdju*: «Sintong do i, alai na parohon hatuaon tu hita, i ma tapatangastangkas nuaeng.»

Si *Lagehata*: «Olo, songon pangkataion na hudok i, i do na dumohar, djala morhitehite pangkataion sisongon i ma dapotan di porbinotoan morragamragam; ba i ma taringot tu pangalaho ni tano on na olo sega, djala muba, dohot taringot tu untung, dohot hangoluan sian Debata. Alai sumurung sian i i ma on: na dapot iba sian pangkataion i do poda songon on: ingkon tubu paduahalihon djolma asa tu hangoluan ibana ai ndang sae ulaonta padeng-

ganhon hita, ingkon tu haburdjuoni ni Kristus do hita morsigan-tung; sian pangkataion i ma dapot djolma huhut hatorangan tari-ngot tu laba ni haubaon ni roha i, dohot taringot tu tangiang do-hot pangundjunan dohot haporseaon. Djala morhitchite sian i, di-antusi do angka bagabaga ni Debata, angka na mangapuli ibana morhite sian barita na uli. Angkup ni, tandaon ni djolma sian i manang na djahat manang na denggan, pingkiran dohot pangala-ho ni na asing, ai ingkon taluhononna na djahat i, hamonangkon-onna na dengan, djala adjaranna sian na oto.»

Si Burdju: «Tigor do i, ringkot rohangku, umbege i sude sian ho.»

Si Lagehata: «Oe! Magopona i! tung so piga na ringkot roha mangkatahatai, djala pahusorhusorhon sisongon i, ala so di-haringkothon poda taringot tu haporseaon, djala so dihilala, tari-ngot tu asi ni roha ni Debata na mangalehon hangoluan i tu nasida!»

Si Burdju: «Bege ma! angka na mangantusi poda i taringot tu hasonangan sogot, na mandjalo do i sian asi ni roha ni Deba-ta, ai ndang na haantusan djolma i ianggo sian pingkiranna handiri, manang sian porhataonna.»

Si Lagehata: «Sudena i huboto do, ai ndang tarbahen ma-nang ise i, djumpangan manang aha molo so dilehon Debata (Joh. 3, 27). Taringot tu sude angka poda i, holan morhitchite sibasabasa ni Debata do i, ndada morhite sian pingkiran manang ulaon; tarhatindangkan ahu do i, morhite sian panindangion sian Barita na uli.»

Si Burdju: «Denggan! dia ma nonanganta nuaeng?»

Si Lagehata: «Dia do lomo ni roham, asa huhatahon, ma-nang taringot tu banuagindjang, manang taringot tu tano on; manang taringot tu poda dohot hasimoon, manang taringot tu Debata; na torang manang na holom, na denggan manang na roa; angka naung salpu manang na naeng masa, na di ruar manang na di bagasan, poda na lehet manang na dokdok. Sude i huha-tahon torang molo morlaba hita sian i.»

Ninna nampuna djamita on: Disi pe asa longang *Si Burdju* i, umbege sude nidok ni *Si Lagehata* i, huhut ma laho ibana mandapothon *Si Kristen*, na mordalan sasadasa satongkin. Ninna ma tu *Si Kristen* i: «Ah! mansai malo do aleale i na djumpang hita. Sintong do, didjalahi dalan hangoluan morhitchite haburdjuon.»

Dungi dialusi *Si Kristen* ma huhut mengkel: «Naung dipa-otooto halak, na pinudjimi, lobi sian dua pulu halak, angka na so tumanda ibana.»

Si Burdju: «Ai ditanda ho do i?»

Si Kristen: «Hutanda do! Tumangkas do ibana hutanda, asa ibana tumanda dirina.»

Si Burdju: «Paboa ma tu ahu, ise do i?»

Si Kristen: «Goarna *Si Lagehata*, (na ringgas holan mangkatai) nang ibana, laos moringan di hutanta do, longang ahu, ala so ditanda ho ibana; alai di rohangku, ala na bolon i do hutanta, umbahen so ditanda ho.»

Si Burdju: «Anak ni ise do i, djala didia moringan?»

Si Kristen: «I ma anak ni *Si Dengganhata*, na moringan di Baba na duatdait. Manang ise na tumanda ibana, sai digoar do ibana *Si Lagehata*. Alai atik pe malo ibana mangkatai, ndang na morguna hatana i nango saotik.»

Si Burdju: «Alai songon na lambok do bohina idaon.»

Si Kristen: «Ra holan tu angka, na so tumanda ibana tangkas, songon na lehet ibana tatapon sian na dao, ianggo djonok, djala molo di bagasna, mansai roa do rupana dohot pangalahona. Tudoshon gombaran deba ibana, molo dao: lehet idaon, alai molo djonok, ndang be lehet di pamerengan.»

Si Burdju: «Atik na gaitmu do i, ai mengkel do ho nangkin.»

Si Kristen: «Ah! Debata umboto, ndang barani ahu mam-bahen gait sisongon i, manang pasalahon halak so adong alana. Angkup ni, mansai morbisuk djala morangkal do halak i. Nandang na morimbar di rohana manang ise donganna. Ia songon i hata-na tu ho, songon i do rohana dohot pangkataionna di djabu pormodatan, dohot di bagas porminuman tuak. Lam godang sopi dohot tuak diinum, lam godang hata di pamanganna. Taringot tu ugama i, ndang bongot i nango saotik tu rohana; holan puas sian pamanganna do i. Angkup ni, ugamana: holan mangarundut-runduti nama i.»

Si Burdju: «Ah! molo sintong hatami, nunga dohot ahu di-paotooto.»

Si Kristen: «Olo ma tutu, nunga dipaotooto ho, ai ingot ma angka hata on: Tung sidung ma manang dia ulaon anggo holan hata mandok, hape ndang diulahon? ai apala hatahata sambing haradjaon ni Debata, siulaon do i dohot hagagoon (Math. 23, 3; 1. Kor. 4, 20). Songon na nidok ni *Si Lagehata*, taringot tu na mortangiang, hamubaon ni roha, hatutubu paduahalihon, dohot taringot tu haporseaon; alai holan hatahatana sambing do i. Hutanda do ibana, ai nunga dung huida ibana di balian dohot di bagasna i; ndang morisi ugamana. Tudos tu umpama on ibana: «laklakna bontar, hape ndang morisi na tabo di bagasan.» Nandang adong di djabuna i portangiang, nang tanda ni hamubaon ni roha. Na tutu do, na hudok on: tudoshon pangalaho ni pinahan do pangalahona. Dumenggan dope porsombaon ni pahampahanan tu Debata, sian ibana; gabe haliluon, hailaon, dohot sogo ni roha do ugama i ala ibana, di sude angka na tumanda ibana. Nandang dapot hata na denggan di inganan ni *Si Lagehata* (Rom 2, 24). Songon on do pandok ni halak taringot tu iba-

na: «Na badia di balian, Sibolis ia di bagas.» Songon i do tongtong pangalahona didapot angka donganna sabagas. Nang djolmana dohot ianakkonna nunga dihilala djahatna, ai porholit djala sibahen gaor do ibana di bagasna. Tongtong do dibadai angka naposona, gabe mago ma pingkirannasida, ndang diboto be sibahenonna, manang sidohononna. Angka na mangarehei ibana mandok: «Taganan do iba rap dohot halak Atje, unang rap dohot Si *Lagehata* i,» ai holan na paotootohon do ulaonna, dohot mandjalo sisip. Dungi diadjari do angka ianakkonna, asa anggiat diihuthon nasida ibana. Djala molo tung adong djumpangsa sian angka ianakkonna i, na naeng morlambok dohot morholong ni roha, na naeng tarsunggul rohana dibahen hata hasintongan, manigor ninna ma ma: «E ho na rintik djala na oto!» Dihasogohon ibana do pambahenan sisongon i. Na tutu do na hudok on tu ho: «Anggo di rohangku, nunga torop halak lengse, dipaotooto ibana.»

Si *Burdju*: «Tutu do i, ale hahang, patut do haporseaan-ku hatami, ndada holan ala ni hatami, dohot do ala Kristen ho ai ndang tarbahen halak Kristen mandok hata na so sintong tu donganna djolma, dibahen i ninna rohangku, dihatahon ho do songon pambahenanna situtu.»

Si *Kristen*: «P pikir ma! lumeleng do ibana hutanda sian ho, ai ahu pe djolo, hupingkiri do taringot tu ibana songon pininkiranmi. Djala aut holan barita sian angka musu ni ugaman-ta hubege taringot tu ibana, ndang porsea ahu, ai djotdjot do dipahatahata halak pordjahat angka portigor; alai anggo taringot tu Si *Lagehata* i hudjamitahon, djala hupatuduhon ma tu ho djahat-na morhitehite sitindangi. Angkup ni sude halak portigor dohot na denggan roha, hira na maila do mamereng ibana, ndang olo nasida mandok alealena ibana.»

Si *Burdju*: «Nuaeng pe asa huboto, asing do hape morhata, asing do mangulahon. Muse pe huporrohahon porbolatan ni na dua rongan i.»

Si *Kristen*: «Tutu do, adong porbolatan ni na dua rongan i, songon porbolatan ni daging dohot tondi. Ai songon daging na so mortondi dohot na so morhosa, bangke nama i, songon i do pangkataion na so mordongan pambahenan. Ngolu ni hakristenon, i ma angka pambahenan, songon na tarsurat di barita na uli i: «Pangoloion na ias djala na badia, na so morlindang, di djolo ni Debata, Amanta i, i ma: mangurupi angka dakdanak na so morama so morina dohot boruboru na mabalu di haporsuhonnasida, huhut mangaramoti nasida sian angka tihas ni portibion» (Jak. 3, 27). Nandang diboto Si *Lagehata* i pangadjarion sisongon i; sae do ninna rohana, pangkataion dohot pananginangion, mambahen halak Kristen na ture, hape suman tu pangalaho ni na paotooto dirina do i (Joh. 15, 17). Pananginangion i, tu-

doshon na manuan boni do i, pangkataion na denggan i, paboa-hon naung morporbue boni i di bagasan roha, alai pambahenan i do porbuena. Ai tama do botoonta hian: sude djolma tu por-uhuman di ari porpudi, paresohon angka porbuena be, i ma pam-bahenan i (Math. 13, 23). Nandang sungkunonna di ari i: Aha dihaporaeai ho? manang angka hata dia do dihatahon ho? On do disungkun: Aha diulahon ho! djala hombar tusi dabuon uhum tu ho! Tudoshon tu ari panggotilan do ari porpudi i (Math. 13, 30. 39). Djala nunga diboto ho: di tingki panggotilan, holan porbue do niluluan ni halak. Tutu ndang dihalomohon Debata pambahenanta manang dia, molo so morharoroan sian haparseaon, alai umbahen hudok i, na patorangkon pambahenan ni Si *Lage-hata i* do ahu tu ho, ai so hasea sogot anggo holan hatahata.»

Si *Burdju*: «Angka i do na paingot ahu di hata ni Si *Musa*: Lev. 11, 3; Deut. 14. Nasa pinahan na so mabola tambirikna, ndang djadi panganonmu.»

Lan do pinahan na morngalu, hape hibul do tambirikna, ala ni ndang gandjing nasida. Si *Lagehata i* pe songon i do: hira na dingalungalu ibana do sude bohalsa i, ai sude porbinotoan nua-eng, tarbahensa do papuashon morhitehite hata; alai ndang ma-bola tambirikna, mandok: ndang sirang dope ibana sian dalan ni dosa dohot portibion; tongtong dope morsisilon ibana songon biang dohot gompul, ala ni ndang na ias ibana.»

Si *Kristen*: «Diporhatutu rohangku do i. Sintong do na nidokmi, djala na tutu do lapatan ni umpama i deba, alai huam-bai dope debanari tusi. Didok Apostel Paulus taringot tu halak angka na morpangalaho songon Si *Lagehata i*: Na songon hangsa na mangkuling do nasida, djala songon ogung na moruolol (1 Kor. 13, 1—3). Ugasan na so mangolu do i (1 Kor. 14, 7). Tudos tusi do sude djolma na so morhaporseaon na so mangolu, djala na so umboto asi ni roha ni Debata, morhitehite Kristus i. Nandang tagamon bongot angka i tu haradjaon na di banuagindjang, nang pe diboto mangkuling di hata ni djolma, dohot di hata ni suru-suruan ni Debata.»

Si *Burdju*: «Denggan! nang di mulana i pe nian, apala sa-dia ringkot ni rohangku mordinganhon ibana, ai sogo hian do nian nang roha ni pangkilalaanku. Nuaeng pe dia ma sibahenonta, asa malua hita sian ibana?»

Si *Kristen*: «Bege mal adjarhon djala ulahon ma songon na hudok, djala tibu sirang ibana sian hita on; molo tung so di-pangkilalahon Debata tu rohana djala dipaubal»

Si *Burdju*: «Aha ma na nidokmi, ulahononku?»

Si *Kristen*: «Denggan do molo laho ho mangkatai dohot ibana, taringot tu gogo ni hadaulaton tu Debata. Dungi sungkun ma ibana tangkas, manang na adong hadaulaton i di bagasan ro-

hana, di bagasna dohot di parangena pe.»

Ninna nampuna djamita on: Doras ma laho Si *Burdju* mandapothon Si *Lagehata*, huhut mandok: «Rap ma hita! Beha do pangalahom nuaeng?»

Si *Lagehata*: «Tarimakasi, ai sonang do ahu. Anggo ninna rohangku sai mangkatai dope hita nuaeng.»

Si *Burdju*: «Denggan! ringgas djala las rohangku, ala didokon ho ahu djumolo manungkun. On do sisungkunonku nuaeng tu ho: «Songon dia ma dipapatar Debata ulaon asi ni roha di bagasan roha ni djolma?»

Si *Lagehata*: «Huhilala, angka pangkataionta on ma na ringkot i taringot tu hagagoon na sian Debata. Lehet ma i, i ma pangkataion na denggan. Nuaeng pe, olo do ahu mangalusi djala torang, songon on: Pordjolo, molo tung adong dihilala djolma asi ni roha ni Debata di bagasan rohana, dihorhon i ma surak-surak ni roha mangalo dosa.» Paduahon—*Burdju*: «Paima! pasombu djolo tatimbangi sadasada. Di rohangku dumenggan ma dok: Asi ni roha ni Debata i do na pehehehon roha, mangkagigihon dosa.»

Si *Lagehata*: «Boasa? dia ma salisi ni: morsurak mangalo dosa dohot mangkagigihon dosa?»

Si *Burdju*: «Hei! mansai dao dope salisi ni. Sada halak pe, tarbahen do mangkatai dohot morsurak gogo mangalo dosa holan sian bisukna, ala dilului pudjipudjian binahen ni dongan, alai ndang na tarbahensa mangkasogohon dosa, molo so morhitehite hagagoon ni Debata. Ai nunga djotdjot hubege: Torop do halak na mangangguhi di tongatonga ni donganna mangalo dosa, morhitehite hata, alai dipeop do dosa i di bagasan rohana, dohot di djabuna, dohot di hutana. Songon djolma ni induk somang ni Si *Joseph* tahe, mangangguhi do ibana songon djolma na tigor roha, mangalo hadjahaton, alai anggo pangidoan ni rohana: aut tung tarbahensa ma nian mambahen na djahat dohot Si *Joseph*. (Gen. 39. 12—18) Adong muse dope halak na mangalo dosa, mortudosan tu sahalak inaina na mangompa anakonna. Satongkin diburai ma, ninna ma: «anak na djahat!» «hape tongkinnari dihaol ma djala diumma.» Aha ma paduahon na naeng djamitahononmi?»

Si *Lagehata*: «Paduahon: dapotan porbinotoan godang do djolma taringot tu porbinotoan di hata hasimoon na di Barita na uli i.»

Si *Burdju*: «I ma nian tama pordjolo dohononmu, alai nang di djolo manang di pudi didok ho i, ndang na tutu i, ai tarbahen halak do morporbinotoan godang di hasimoon ni Barita na uli i, hape ndang dope diingani asi ni roha ni Debata, ianggo rohana (1 Kor. 13, 2). Tutu, tarbahen do sude porbinotoan di halak, hape sisoada do nasida di roha ni Debata, djala ndang anakna

nasida (1 Kor. 13, 2). Disungkun Tuhan Jesus sahali angka sise-anna, ninna ma: Diboto hamu do sude angka hata on? Dung i dialusi siseanna i ma: «Olo Tuhan!» Dung i didok Tuhan Jesus ma muse: «Mortua do hamu molo diulahon hamu i! (Joh. 13, 12. 17). Asa ndada pasupasu tu angka na umbotosa, tu angka na mangu-lahon do (Luk. 12, 47). Ai adong do djolma na morporbinoto-an, hape ndang diulahon, songon na nidok ni Barita na uli i: «Ma-nang na umboto lomo ni roha ni Tuhanna, hape ndang diulahon!» Tarbahen sada halak do umboto sude hahomion songon angka su-rusuruan ni Debata, alai ndada ala ni i umbahen halak Kristen ibana. Dibahen i: tanda na nidokmi, ndang tarpangke i. Tutu porbinotoan i do palas roha ni angka siduatdait dohot angka por-tenga, alai holan angka na mangulahon i do palas roha ni Debata.»

«Angkup ni, tutu nian, ndang tarbahen denggan roha, molo so morporbinotoan, ai holom do roha sisongon i; alai adong do sada porbinotoan na so mangkorhon hangoluan, ala dipangke djol-ma i morsual, tung dao tahe porsalisian ni, dohot porbinotoan na bongot tu roha dohot tu ateate, sinunggul ni haporseaon dohot holong ni roha, mangulahon lomo ni roha ni Debata. I do por-binotoan na ture djala na morguna. Na pordjolo nidokmi, sae do holan tu Si *Lagehata* sambing, alai na paduahon i, dilului halak Kristen na bonar roha (Ps. 50, 16. 17).

Si *Lagehata*: «Songon na naeng palipehon hatangki do ho huida; ndang hasea i huroha.»

Si *Burdju*: «Ulahi muse patuduhon di alamat na asing tari-ngot tu ulaon asi ni roha ni Debata di bagasan roha ni djolma.»

Si *Lagehata*: «Nunga i, ndang olo be ahu, ai ndang mor-domu pangkataionta i huida.»

Si *Burdju*: «Denggan, molo so olo be ho. Uwa ahu ma pasombu patorang i tu ho!»

Si *Lagehata*: «Denggan, patorang ma!»

Si *Burdju*: «Tanda ni ulaon ni Tondi Porbadia di bagasan roha: patar do i nang di ibana handiri nang di donganna, huma-liang ibana. Patar do i di ibana morhitehite pangkilalaanna di djorbut ni dosana dohot hamagoanna hian. Diboto huhut, ala na so porsea rohana na sailaon, apala i do djea na gumodang djala na mangaithon uhum ni Debata tu ibana, molo tung so da-potsa asi ni roha ni Debata morhitehite Kristus» (Mark. 16, 16; Rom 7, 24).

Sude pangkilalaan on dohot pingkiran na hudok i, i do na patubuhon panolsolion godang dohot hailaon, ala ni dosana i, di bagasan rohana; djadi dung i torang, huhut diboto Sipangolu iba-na, i ma Kristus sambing na gabe hatuaonna, giot ma rohana morsaor dohot Tuhanna, mauas male ibana mida hatigoran ni Kristus i (Ps. 38, 18; Matth. 5, 6; Gal. 1, 15). Songon balga

dohot togü ni haporseaonna tu Sipangolu ibana, songon i ma las ni rohana dohot hasonanganna, songon i do dohot hauuasna mida habadiaonna; angkup ni, manang songon dia serep ni rohana, songon i do dohot panandaonna di na hinaholongan ni roha ni Kristus, songon i do huhut pangulana, mangula di hata ni Tuhan i. Alai ala tongtong dope ditanda, dihilala dosana, ala ni do umbahen so sonang rohana dope. Atik so tutu morasi ni roha Debata mida ibana. Mabiari ibana djotdjot, atik beha lilu ibana: diporbaga rohana anak ni Debata nian ibana, alai atik ndang na tutu; dibahen ringgas rohana mangido tu Debata roha na tongtong, djala na hot morhaporseaon, asa tangkas diboto, ulaon ni Tondi Porbadia do tutu na di bagasan rohana.» (Joh. 16. 9; Gal. 2, 15; Ul. Ap. 4, 12; Pang. 21, 6). Alai patar do ulaon ni Tondi Porbadia di bagasan roha tu angka dongan: Pordjolo: Morhitehite panopotionna di haporseaon di Tuhan Jesus.—Paduahon: Morhitehite parangena, na mordomu tu hata haporseaonna.»

«Ai porbuwe ni roha na badia do parange na badia; djala parange sisongon i ma ingkon parangehononna nang di bagasan nang di balian. Dipodai djala didasdas roha na badia i ibana mangkagigihon dosana, djala paserephon rohana moradophon Debata. Sian nasa rohanta olo ibana mangalo dosa i, manang mida donganna saripe, manang di balian ni bagasna; djala ndang songon binahen ni pangansi dohot angka siduatdait, pangaloonna mida dosa i, songon bawa naung unduk di hata ni Debata do, djala morhaporseaon dohot holong ni roha situtu (Hiob 42, 5. 6; Ps. 50; 23; Hez. 20. 43; Matth. 5, 8; Joh. 14, 15; Rom 10, 10; Phil. 3, 17-20). Songon i do pangalahona, molo dung Tondi Porbadia mangula di bagasan rohana. Nuaeng pe adong dope hata sialusanmu taringot tusi? molo soada, asa husungkun ho sada porsungkunan-nari!»

Si Lagehata: «Ulaonku nuaeng, mananginangi hatami, unang anggo mansoadahon, dibahen i datdati ma.»

Si Burdju: «Songon on do na naeng sungkunonku: Ai beha, adong do dihilala ho, songon na huhatahon i di bagasan roham, djala adong do parangem dohot pangkataionmu bahen sitindangi ni? manang na djongdjong di hatahata sambing do ugama-mi? djala molo tung adong alusmu, unang hatahon lobi sian na tarulahon ho. Debata do saksi; ai ndada hamaloon mamudji, djala patigotigor dirina, umbahen tau manang ise, ingkon morhitehite paminterion ni Debata do ibana, asa tau djala pintor (2 Kor. 10, 18). Ai atik pe tardok manang ise, songon on, manang songon an, alai angka donganna sahuta do mandok: sipaotooto do i, godang do dosa ni il»

Ninna nampuna djamita on: *Si Lagehata* i pe, muba ma ~~hina~~ huhut mandok: «Hatamon huida, hata taringot tu Debata do i,

huhut taringot tu pangkilalaan ni roha di bagasan dohot saudara na denggan. Angka hatami na ragam i, ndang bongot i tu rohangku, ala ni ndang olo ahu mangalusi taringot tusi. Ai taringot tusi, ndang dung huulahon, alai anggo na naeng ho gurungku, ba, ndang olo ahu; tulakkononku sambing do sangkap ni roham. Alai husungkun ho muse; boasa pola naeng begenmu sian ahu angka i, umbahen disungkun ho sisongon i?»

Si *Burdju*: «Ala huida, djala hubege angka pangkataionmu songon na malobihu; djala muse, ndang huboto manang hata sambing na nidokmi manang na tutu i. Angkup ni, hudok ma tu ho morhitehite habonaron: Nunga hubege taringot tu pangalahom, morugama do ho morhitehite bibir sambing, pangkataionmi do patandahon: haporseaonmu na so morisi do, ala ni didok halak: tihas do ho sada di ugama i. Binahen ni pangalahom sisongon i, gabe godang halak tartuktuk, djala torop mago hinorhon ni ugamami. Moraleale tu bagas porimnuman sopi, dohot pormainanon, dohot harotahon, dohot harorangan, dohot hata barangsi, dohot panolonon, dohot sipaotooto do ho, djala moraleale ho dohot halak na djahat dohot tu angka na tu-los tusi. Adong do sada boruboru na tudos tu ho, i ma boruboru sibabidjalang, boruboru i ma na parohon hailaon tu angka boruboru na asing na lehet morparange; songon i ma pangalahom, parohon hailaon tu angka na togu morugama!»

Si *Lagehata*: «Sipamurai do ho dibege pinggolhu djala gabe panguhum na posi; ala ni ninna rohangku: ndang na tabo lagum dohot pangalahom, ndang hasea pangkataion dohot ho; tinggal ma ho, laho ma ahu!»

Ninna nampuna djamita on: Ro ma Si *Kristen* mandapot-hon Si *Burdju* huhut mandok: «Beha do ale ampara, nda hudok hian tu ho udjung ni pangkataionmu! Di rohangku ndang mordo-mu hatamuna atehe, ai roha daging do rohana. Dumenggan do, ninna rohana, sirang ibana sian ho, asal unang dipauba rohana i; alai nunga laho ibana, loas ma laho ibana tusi. Ibana do nampuna rugi, ndada hita. Dumenggan i antong di hita, ibana paulak dirina, asal unang sian hita tulakna. Ai molo tung rap ibana dohot hita, gabe dohot hita roa; djala tarsurat muse dope di Barita na uli i: «Padao ma ho sian halak sisongon i» (1 Tim. 6, 5; 2 Tim. 3, 5; 2 Kor. 6, 17).

Si *Burdju*: «Las do rohangku ala masisungkunan dohot masialusan raphon Si *Lagehata* i saotik, atik tung beha tarsunggul ro'ana muse, ala ni djamitangki. Nuaeng malua do ahu sian sapatana nang pe mago ibana.»

Si *Kristen*: «Denggan do i, ala na mordjamita i ho torang tu ibana, ai rangkak do djolma saonnari dapot na olo maminsang Si *Lagehata* i. Ala ni halak sisongon i, umbahen dihasogohon to-

rop djolma ugamenta i, ai halak angka na malo mangkatai do nasida songon Si *Lagehata*, hape roa do pangalahona, atik pe djot-djot saor dohot halak na tigor. Angkup ni, halak na morsangkap na djahat, djala na roa do nasida, gabe dohot barita ni ugamenta roa; gabe dapotan hasusaan godang angka na tigor roha i. Aut tung adong ma nian halak na mangadjari nasida, angka na tudos tu Si *Lagehata* i, songon na binahenmu, djala dipinsang, asa unang barani be pasumansuman dirina songon halak na tigor, manang saor dohot halak na porsea.» Djadi mamungka morendeen-de ma Si *Kristen* dohot Si *Burdju*, songon on:

«Si *Lagehata*, porhata na mansai tabo;

Rupana, dengan idaon ni halak na oto.

Ala ni ro Si *Burdju* mangalusi sian roha;

Mulak maoto Si *Lagehata* djala maila.

Songon i na torop, ringgas mangkatai sambing,

Na so mangihuthon hata ni Debata.»

12. Si Kristen rap dohot donganna i, padjumpang dohot aleale haposan ni rohana.

Ninna nampuna djomita on: Songon i ma pangalahonasida huhut mangkatahatai, taringot tu pangalaho na niidanasida di dalan i, bahen daon haliliannasida, asa unang diingot lodja di dalan i. Ai di halongonan do nasida na mordalan i. Asa dung di na morhira salpu adaran i, mamereng ma Si *Burdju* dompak pudi, gabe diida ma: ro sada halak sian pudi, djadi dipamanatmanat ma, huhut ma didok: Ale ampara *Kristen*! «Ise do na ro sian pudinta an?» Djadi dung ditanda Si *Kristen* ibana ninna ma: Ah! i ma alealengku na huhaholongi, ai i do gurungku. Dungi dung djonok na ro i ninna Si *Burdju* ma: «Nang ahu alealengku do i, ai ibana do na patuduhon tu ahu dalan na tu pintu na sompit i.»

Si *Porbaritanauli* i pe sahat ma tu nasida, huhut manabei nasida na dua i, ninna ma: «Hipas ma hamu na dua, haholongan ni rohangki; diurupi Tuhan i ma hamul!»

Si *Kristen*: «Santabi ma di ho morriburibu ale gurungku na huhaholongi, ai molo dung hubereng bohim, sai huingot do holong ni roham, na patuduhon tu ahu dalan hangoluan, djala mangurupi ahu di dalan sidalaranku.»

Dungi ninna Si *Burdju* ma: «Morriburibu ma pasupasu di ho ale gurungku na mormulia! tung na di tingki na denggan do harorom na tu hami, ai mamboan laba do ho di hami.»

Dungi dialusi *Porbaritanauli* i ma: «Olo alealengku sidua halak, beha do pangalahomu nuaeng dung sirang hita? Angka aha do djumpang hamu, djala beha do pangaloon dohot hamonanganmu?»

Dungi didjamitahon *Si Kristen* dohot *Si Burdju* ma sude pangalahonasida be dohot angka hasusaan i, na masa tu nasida, sian mulana ro di udjungna.

Dungi didok *Si Porbaritanauli* i ma: «Mansai las rohangku mornida hamu, alai ndada ala na padjumpang i hamu dohot pormaraan i, ala ni na monang i do hamu, atik pe na gale hamu nian. Ditaluhon hamu do angka i ro di sadari on. Ala ni mansai las rohangku, ai mortua ma hamu, morlaba dohot ahu, ai na tutu do, ahu do manabur, djala hamu do manggotil; djala rap morlas ni rohã do panabur dohot panggotil di tingki ni panggotilon molo tung tongtong hamu hot (Joh. 4, 36). Alai unang ma mornalodja hamu, ai na djumpang do muse tingkina, sai na manggotil do hamu (Gal. 6, 9). Di djolomuna do tumpal i, ugasan na so sega i, dibahen i, lodjong hamu ma, asa dapot hamu i (1. Kor. 9, 24—29). Adong do halak na morlodjong, mambuat tumpal i djala dapotsa, alai dung mordalan ibana manang sadia dao, ro ma muse halak na asing, mangarampas sian ibana. Dibahen i momosi ma sude na di hamu i, asa unang dibuat manang ise tumpalmuna i (Pang. 3, 11). Ai ndang malua dope hamu sian sumbia ni Sibolis i. Ala ni sai tongtong ma tudju hamu haradjaon ni banuagindjang i; djala haporseai hamu ma hata i taringot tu na so niidamuna dope: Gotaphon hamu sian rohamuna anggo angka na di tano on, unang be palohot hamu i di bagasan rohamu; djala gumodang djaga hamu dirimuna, unang paolooloi hamu hisap ni sibukmuna, ai sipaotooto bolon do i. Sai alo hamu ma sian nasa gogomuna, nasa dosa dohot hadjahaton. ai Radja ni banuagindjang, olo mangurupi hamu monang.»

Dungi didok *Si Kristen* ma tarimakasi, ala ni poda na nilehon ni *Si Porbaritanauli* i tu nasida, djadi didok dope: «Tambai dope podami tu hami, asa adong bohalmami di pordalanan. Ai huboto do: diboto ho do sude angka na di djolonami nuaeng, asa tartampar hami hamagoan i.» Songon i do dohot pangidoan ni *Si Burdju*,

Si Porbaritanauli: «Hamu ale angka anaha! Nunga didjaha hamu na tarsurat di Barita na uli na sintong i, na mandok songon on: Ndang tarbahen hamu manalpui angka haporsuhan laho bongot tu haradjaon ni banuagindjang i (Ul. Ap. 14, 22). Dungi songon on muse dope pandokna: «Di ganup luat dohot huta, sai adong do tali dohot haporsuhan na paimaimahon hamu disi (Ul. Ap. 20, 23). Ala ni do umbahen ditaon hamu ragamragam haporsuhon di pordalananmuna i. Asa nunga ditaon hamu i godang ni hasusaan i, alai sai adong dope na ro, ai ida ma, na salpu ne ma adaran on djala djumpang hamu ne ma sada luat dohot huta

di djolomuna i. Di bagasan huta i ma hamu halianganna djala linsinganna, pola bunuonna hamu. Na tutu do: sahalak sian hamu, pasintongkon bagabaga dohot hata ni Debata, na tu ibana morhitehite mudarna. Alai sai burdju ma roham ale, asa dibasabasahon Radja i tu ho tumpal na tumongtong i. Halak na mate disi morhitehite hamatean na so morsamari porsukna, ibana do mandjalo gumodang untung sian na di donganna i, ai tumibu do ibana sahat tu tano hasonangan i. Angkup ni, ndang hilalaonna be hamporsuhan na tinahan ni angka donganna, di na mordalan i nasida. Alai molo dung sahat ho tu huta i, djala masa tu ho angka na hupandok i, ingot ma alealem djala morpangalaho songon baa ma ho, morbisuk, huhut pasahathon tondim tu Debata, di bagasan ulahon na sumurung i» (1 Petr. 4, 19).

13. Si Kristen dohot Si Burdju sahat tu Onan na so morguna hatuiton.

Ninna nampuna djamita on: huida ma di bagasan nippingku, asa dung disalpui na dua i adaran i, dapot ditatap ma sada huta sonson di djolonasida i. Goar ni huta i: «*Nasomorguna*» (na so hasea). Di huta i adong do sada onan, na morgoar: «*Onan na so morguna*.» Naung lelung do i adong, umbahen digoar onan i. *onan na so morguna*, ai di na lumea sian na so hasea do ingananna i (Ps. 62, 10). Angkup ni, morragam do tigatiga dohot djolma angka na disi; sude na so hasea songon nidok ni halak na bisuk: Sude pambahenan na roa, na so hasea, angka na songon alogo do disi (Pred. 1, 2; 2, 11—17). Asa anggo onan i, ndang na imbaru pinungka, naung sian na hinan do i. Tarbahen ahu do paboahon tingki ni i: hirahira 5000 taon ma dung mamungka onan i. Djala diboto Si *Apollion*, Si *Beelsebul* dohot Si *Legion* rap dohot angka paranganna i hian do, ndang tarbahen manang ise laho tu tano na sumurung i, molo so mamolus sian huta i, i ma alana umbahen dibahen nasida disi onan sada. On ma ragam ni tigatiga angka na ginadis di Onan i: Bagas, tano, dagangan, angka inganan ni hamuliaon, panggaorgaor ni angka lutat, haradj'aon; lomolomo ni roha ni sibuk, las ni roha, angka na tabo morragamragam; amaama, inaina, dakdananak, namagodang dohot na poso; hangoluan, mudar, daging, tondi; mas, intan, angka humala dohot mutiha morragamragam, dohot angka na asing sian i. Angkup ni, adong dope di onan i sian na hinan; porsidao mataon, sipaotooto, djudji, ragamragam ni gondang, meammameam haotoon; pa-

ngalaho binatang, panamunon, panangkoon dohot hadjahaton morragamragam. Djala tondong ni muse, tarida do angka on: Halak sibunu djolma, pormainan, sitindangi gapgap na so habilangan, sude i morrupa na rara songon mudar, songon na adong di angka onan na asing, na ummetmet sian i. Angka na di bagasan onan i adong do: Alaman Jawa, alaman Hindu, alaman Bugis, alaman Tjina, alaman Ambon, alaman Mangkasar, alaman Padang, alaman Bandjirmasin, alaman Bali, alaman Wolanda, alaman Ingoris, alaman Frankreich, alaman Deutsch, djala sude i gok tigatiga na so morguna.

Asa, songon na hudok nangkini, taringot tu dalan na tu tano na di banuagindjang i, ndang tarbahren manang sian dia, nda sian tongatonga ni onan i (1. Kor. 5, 10). Gari Radja i, na sian banuagindjang i, ingkon mamolus sian onan i udju di tano on Ibana. Di tingki i, mansai ribur do onan i. Disi ma ro Si *Beel-sebul* manoso i Tuhan i, manuhor ugasan na so hasea i, ninna ma mandok Tuhan i: «Molo olo Ho morsomba tu ahu, tung na sumurung, lumobi do hasangaponmu bahenonku.» Dipatuduhon ma tu Ibana sude alaman i, sian na sada ro di na sadanari, sude angka haradjaon na di tano on, di na satongkin, asa mangelehelek manuhor ugasan na so hasea i. Alai ndang pola solo roha ni Tuhan i di daganganna i. Ala ni ditadingkon ma luat i, so pola morharugian di balandjo nango tung saduit, ianggo tu na so hasea i (Math. 4, 1—11). Asa naung robirobian do onan i, ala ni mansai balga do i.— Angka pordalan silului hasonangan i pe, ndang tarbahren nasida so mamolus onan i. Alai disi diida pangisi ni onan i nasida mamintor guntur ma nasida mangarongomi si dua halak i:

Pordjolo: Ala asing pahean ni halak pordalan i sian pahean ni halak na di onan i, umbahren dirunggui nasida pordalan i (Heber 10, 33) huhut mandok: «Angka na lalaen do halak on?» Deba mandok songon on: «Angka halak na hinan do il» (1. Kor. 4, 9; Hiob 12, 4).

Paduahon: Asing pahean ni pordalan on, pangkataionnasi da pe asing do. Ndag piga halak mangantusi hatanasida, ala hata Kanaan do; ai pangisi ni onan i, halak portibion do i. Dja di hira halak harangan do pordalan i di rohanasida (1 Kor. 14, 11).

Patuluhon: Tubu ma sogo ni roha ni angka portigatiga mi da pordalan i, ala so olo manuhor boniaganasida, ai ndang sihol rohanasida nango mamereng dompak i. Molo adong mandjou nasida, mandokkon manuhor, disongsong pordalan i ma pinggol na dohot djaridjarina huhut mandok: «Hupadao do matanku, asa unang hubereng tu ugasan na so hasea!» (1. Sam. 12, 11; Ps. 119, 37). Huhut manaili pordalan i dompak banuagindjang, as-

tuanna: Situhoron dohot pansarian i, di banuagindjang do (Phil. 3. 20. 21).

Na deba halak, pangisi ni onan i, dung diida pangalahona-sida i, ninna ma sian lea ni rohana: «Aha naeng tuhoronmu?» Alai lambok do bohi ni sidua halak pordalan i, huhut mandok: «Hasintongan naeng tuhoronnami.» (Spr. 23, 23).

Alai dung dibege halak onan i, lam ganda ma sogo ni rohanasida. Adong na mangaleai; adong na mangelesi; adong na mamurai; adong muse na mandokkon donganna, mamastap hurumnasida, dungi gabe guntur ma onan i. Asa dung sahat barita i tu radja ni onan i, disuru ma sada halak haposanna, paresohon dohot manangkup halak pordalan i. Dungi diboan ma nasida tu bagas porhataan i; djadi disungkun siporhata i ma nasida, ninna ma: «Sian dia do hamu ro? djala aha do na niulamu tuson? asing situtu paheanmu sian hami on.»

Dungi dialusi Si *Kristen* dohot donganna i ma: «Halak pordalan do hami, angka pordagang di hasiangan on, na naeng mulak ma tu sambulonami, i ma Jerusalem na uli na di banuagindjang.» (Heber 11, 13-16). Aha ma pambahenannami? so adong hubahen hami manang tu ise pangisi ni huta on manang luat on, manang onan on. Alai sude do nasida mangelesi hami, djala guntur nasida, i ma alana umbahen sundat hami mordalan. Angkup ni disungkun nasida do hami: «Aha na naeng tuhoronmu?» Djadi hualusi hami: «Hami na naeng manuhor Hasintongan (Htigoran).»

Alai, ninna roha ni panguhum, i ma: na so sintong hatanasida i. Sibahen guntur sambing do nasida di onan i.

Ala ni disuru ma manangkup dohot mangalinsingi dohot mangalapuhon gambo tu daging dohot tu bohinasida i. Dungi dihurunkon ma nasida, asa dipaidaida halak na di onan i nasida manang piga ari, huhut dileai, dohot mangelesi, dohot morengkelengkelihon. Djala hundul di lambung ni radja ni onan i do nasida, dipaidaida do nian sude, pambahen ni pangisi ni onan i tu halak pordalan i, alai dipasombu do.

Alai sidua halak pordalan i, hohom do nasida hundul. Nandang dialusi nasida angka hata ni pangaleai dohot pangkehelaion ni halak na di onan i. Dohot pangalinsingina tu nasida, ditaon nasida do, holan asiasi do dipangido, asa unang sai didatdati nasida mangalinsingi nian; djala sai dengen do hatanasida, mangalusi angka hadjahaton dohot na so uhum na ro tu nasida. Dipaandar nasida do holong ni rohanasida dompak angka pangisi ni onan i, atik pe na djahat pambahenannasida i. Alai adong dope sian angka halak pangisi ni onan i, na morroha na dengen saotik, na patuduhon holong ni rohana tu pordalan i; tarida: sian paminsangna, di angka pangelesi i. Alai ro ma pangelesi i mandok: «Tama do nian dohot hamu sude tu hurungan, ai leatni, do-

ngannasida do hamu.» Djadi morbadai ma nasida djala guntur. Alai sai so do anggo pordalan i morpangalaho na togu huhut morgogo di djolo ni halak na torop i.

Asa dung songon i, tarboan muse ma sidua halak i tu djolo ni panguhum. Dungi disalahon panguhum i ma nasida, ninna ma: Ala hamu do umbahen guntur dison; dungi dilingsingi ma nasida, djala dilohothon ma bosu tu rungkungnasida. Dungi ditogutogu ma mangaliathon di onan i, asa mabiar halak na disini, unang adong be mandok suara, mangondingi pordalan i.

Alai anggo Si *Kristen* dohot Si *Burdju* sai tong do hot pangalahonasida, djala morbisuk dohot manaon haporsuhon, morroha na lambok djala na hohom; pola tubu asi ni roha mida nasida, di roha ni torop pangisi ni onan i. Tarsunggul ma roha ni na deba naeng mangihuthon pambahen ni sidua halak i, alai gumodang do tutu pangisi ni onan i mamingkiri on: Binunu ma halak on, ai anggo rante i dohot gomali, ndang sae i manesa dosanasida, tama do nasida bunuon. Dungi dipabongot ma nasida muse tu hurungan i, paimaimahon uhum tu nasida. Dibeangkon ma nasida huhut (Ul. ni Ap. 16, 24).

Disi ma djumpang Si *Kristen* dohot Si *Burdju* muse gogo, ai diingot nasida ma hata ni Si *Porbaritanauli*, na mandok: «Lan do hasusaan sibolusonmu di pordalananmuna on.» Songon i ma pangalahona, hundul ma nasida, pasonangsonang rohana, huhut hohom pasahathon dirina tu Tuhan Jahowa, sigomgom sasudena, djala paimaimahon udjungna.

Di na sahali, diboan isi ni onan i ma nasida tu porukuman, naeng paputushon uhum i. Ia goar ni panguhum i, on do: Si Hosominadenggan; anggo pangaluan i, songon on do: Sidua halak on musunami, na mansegahon boniaganami do, djala na pabalikkon roha ni halak morriburibu, mangihuthon poda na djorbut i, mangalo uhum ni radjanta (Ul. ni Apost. 19, 24 ff).

Dungi dialusi Si *Burdju* ma: «Nunga ma tutu hualo sude angka na so hombar moradophon Tuhan na tumimbo ni na tumimbo, alai anggo hagunturon i, na tutu situtu ndang hami mambahensa, ai halak hadameon do hami, songon i do nang angka dongannami, na mangihuthon adjarnami. Molo tung tarsunggul roha ni na deba sian nasida, morbalik sian hadjahaton tu na denggan, paboa na so sude dope pordjahat angka na di onan i. Molo tung adong na balik sian radja na di onan i, i ma Si Beelsebul i, tu-re do i, ai i do musu ni Tuhannami. Na barani situtu do ahu mangalo ibana dohot angka paranganna on sudena. Dungi didjou pangisi ni onan i ma panindangi mangaluhon pordalan i.

Djadi ro ma tolu halak: Goar ni na sada: *Pangiburuon*; na paduahon: Si *Porseaitutian*; patoluhon: *Pangellem*. Dung i disungkun panguhum i ma nasida, ninna ma: «Ditanda hamu do

halak na di hurungan on? djala dia do pangaluanmu taringot tu nasida, mangaluhon nasida?» Dung i djongdjong ma Si *Pangiburu*, ninna ma: «Ale Tuhan! naung lelung hutanda djala huboto do halak on. Barani do ahu manolonhon i di djolo ni rapot poruhuman on!»

Dungi ninna panguhum i ma: «Antong tolon ma!» Dungi manolon ma Si *Pangiburu* i huhut mandok: «olo ale tuan, atik pe tardok denggan goar ni halak on, alai na djahat do i di hutanta on, ai ndang na diporhamaol nasida patik dohot radjanta i. Sian nasa gogona, naeng pabalihonna roha ni torop halak, morhi-tehite pangadjarion na djahat i. I ma na nidokna i, poda haporseason dohot ugama na togu dohot hatigoran; djala torang situtu do i didok: Ugama hakristenon i, tung mansai dao do porsalisasi-an ni, ndang na tarbahen mordomu dohot adat ni luatta na so morugama ninna. Asa tung disalahon situtu do adat na taihuthon i ale tuan, ndang na bonar ulaonta i ninna, atik pe taulahon.»

Panguhum: «Aha dope sidohononmu?»

Si *Pangiburu*: «Lan dope ale tuan hatahononku nian, alai mabiar ahu, atik beha mangolngolhu di roha ni rapot on. Dibahen i, loas ma angka tuantuan na asing i mangkatindangkun debanari taringot tusi; molo tung adong dope hurang sipaputusan ni rapot on, hutambai pe annon.» Dungi sumurut ma ibana tu lambung.

Asa dung songon i, didjou ma Si *Porseaiutiutian*. Didok panguhum i ma: Tailihon ma indi, na di hurungan i, asa husungkun ho! Aha do saksihononmu taringot tu Radjanta i moralohon halak on? Djadi dung disuru ibana manolon, ninna Si *Porseaiutiutian* ma: «Olo tuan, ndang tangkas hutanda halak on, djala ndang ringkot rohangku umboto manang aha taringot tusi. Holan on do na huboto: Halak pordjahat do halak on, pangago dompak hutanta, i do na djumpang ahu, andorang morbadai ahu dohot ibana di bagasan hutanta on. Hubege hatana: na rumar do, ninna, ugamanta i, ndang lomo ni roha ni Debata i; ala ni ale tuan, tung tuan i ma manimbangi taringot tusi, manang dia ma udjung ni hata tu na mandok: tangiangta na so morguna, sude hita di bagasan dosa, halak siagohononhon do hita; i ma ale tuan hatangku.»

Asa dung i, didjou ma Si *Pangellem*, didokkon ma manolon, huhut disungkun panguhum i: «Tarbahen ho do ale, gabe saksi, mangkatindangkun manang aha taringot tu halak on?»

Si *Pangellem*: «Olo tuan, dohot sude hamu tuantuan na djuguk di rapot on, bege hamu ma: halak on, naung lelung hutanda do i, djala hubege do hatana, na so tama nian baritahononhon di djolo ni rapot on, ai on do: Nunga dileai ibana radjanta Si *Beelsebul* i, djala dielesi sude alealena, angka na pinorsangapan i, i ma: Tuan na matua (djolma na buruk) tuan Roha daging, tuan

Hataboon, tuan Lungun di hamuliaon tano on, dohot tuan Por-mainanon, dohot tuan Rohaahut, rap dohot sude na sangapsangap di huta ingananta on.» Ninna halak i do: «Aut tung sura sude halak mangihuthon podana, ndang adong na sangap di hutanta on. Dungi ndang mabiar ibana mangaleai Tuhanku, na manguhumi ibana nuaeng; didok do: «Kapur na so morugama do ho!» djala lan dope hatana na roa i, pahodarhon bohi ni angka tuantuan na di hutanta on dipandok.»

Asa dung sun mangkatai Si *Pangellem* i, mangkuling ma Panguhum dampak na di hurungan i, ninna ma: «He ho halak por-djahat, djala panggunturi, hamu angka na bisuk, dibege hamu do pangaluan ni angka tuan, na daulat i, dampak hamu?»

Si *Burdju*: «Djadi do alusanku, asa malua ahu?»

Panguhum: «Nandang tama be ho leleleng mangolu; tongkinon nama ho mate bahenon, laos di ingananmi, alai asa diboto hadjolmaon, halalambas ni rohanami, mangalusi ma ho ale panggunturi, asa hubege hami.»

Si *Burdju*: «Nuaeng ma hualusi, pangaluan ni tuan *Pangiburu* i. Nandang adong na hudok, nda holan on: Molo dialo manang ise dampak patik, nang uhum, nang adat na sian Debata, mangalo dampak Debata do ibana disi, djala i do musu di ugamanta, ugama Kristen i. Molo tung sala *hatangki*, patuduhon salana, asa hutopoti, djala hupangido hasesaan ni.

Taringot tu hata ni *Si Porseaiutiutan*, on do alushu: Angka halak na mangoloi djala morsomba tu Debata, diringkoti ma haporseaon na sintong, ai i do patandahon holong ni roha tu Debata. Alai ndang adong haporseaon na sintong, ia so sian hapataron ni Debata di lomo ni rohana; alai molo tung adong haporseaon ni manang ise, na mangalo dampak lomo ni roha ni Debata, na ro sian pingkiranna sambing do i, djala ndang morlaba i tu hango-luan sogot.

Dungi taringot tu hata ni tuan *Pangellem*, nunga hudok: «Panggomgom ni luat on rap dohot paranganna, angka na ginoaran-na i, nunga tama situtu nasida bongot tu banuatoru sian mori-nangan di huta on.

Asi ma roha ni Debata di ahu.»

Dungi mangkatai ma Panguhum i dohot angka sipaputus uhuman i: «Ida ma halak angka na mamboan hagunturon tu hita on, djala nunga dibege hamu panopotionna; dibahen i paputus hamu ma manang na tama bunuon halak on, manang paluaon. Alai hupaboa ma djolo angka adat ni uhum di hita.

Adong do sada uhuman di buku patik, di tingki ni radja Parao, radja na balga i, naposo ni radjauta, songon on: Molo adong halak na mambahen ugama na asing sian hita, gabe lam to-rop, djala tubu guntur, didokkon do mambolongkon angka anak-na i tu batang aek.» (Ex. 1, 22) Djala adong muse uhuman di

buku patik, andorang di ngolu ni Si Nebukatnezar, naposo ni radjanta i, songon on: «Manang ise na so olo morsomba tu ganaganaan na pinaulina sian mas, didanggurhon do tu liang pamururan» (Dan. 3, 6). Djala di ngolu ni Si Darius, songon on do patikna: «Manang ise na barani mortangiang tu Debata, na so Debata ni radja Darius, didabu do tu bagasan godung porbabi-atan» (Dan. 6, 7).

Nuaeng pe, nunga mangalo halak panggunturi on, di sude uhum ni radjanta, nang angka tonana, nang porningotanna, nang pangalahona, ala ni ndang tama paluaon ibana, ai nunga digaori ugamanta.» Asa dung i, ruar ma angka tuantuan porhata i, angka na morgoar: Si Pitungroha, Si Musu, Si Porgapgap, Si Murhing, Si Halomohonnaholom dohot Si Djogal-roha; sude nasida papuashon uhumanna be di bagasan poruhuman i. Asa dung dos tuptupannasida i, mandok: porsala do Si *Burdju*, dipaboa nasida ma i di djolo ni Panguhum i. Alai pulik be do hata uhuman nasida i dipaboa. Ro ma djolo Si Pitungroha, didok ma: «Tangkas do huboto, halak Ketzer do halak on.» Dungi didok tuan Musu ma: «ingkon bunuon halak na djahat songon on, ai gari mamereng bohina ndang tartahan ahu.» Dungi ro ma tuan Porgapgap, didok ma: «Na djahat sahali do ibana.» Ninna tuan Murhing muse ma: «Nandang tama ibana mangolu nang satongkin.» Songon i do sude hata ni angka tuantuan i.

Panguhum i pe, didabu ma uhumna, ninna ma: «Binoan ma tu hurungan i. Disi pe ibana mate, bunuon, morhitehite pamunuon na djobut. Dungi diboan halak ma ibana, djala diuhumi ma: Djumolo dilingsingi, dungi dipalealea, dungi diseseati ma sasaotik dagingna i, dungi didangguri ma ibana dohot batu; i pe asa ditiham dohot podang.

Dungi ditutung ma bangkena i, asa gabe sirabun. I ma udjung ni Si *Burdju*.

Ninna nampuna djamita on: Huida ma, di pudi ni angka na torop adong sada hureta na mordua hoda, paimaimahon Si *Burdju*, paima tos hosana. Dung tos hosana i, mamintor diboan ma tu atas ni ombun, mordongan soara ni sakka dohot sarune; dungi sahat ma tu pintu ni surge i.

Alai anggo taringot tu Si *Kristen*, dipangolu nasida do, djala dipabongot tu hurungan. Tinggal disi ma ibana manang piga ari. Alai ala ni gogo ni Debata, na manguhumi sude pambahe- nan ni djolma paluahon Si *Kristen* sian tangan ni musuna i. Dungi mordalan ma ibana huhut morende, ninna ma:

«Si *Burdju*! na burdju do ho tu Debata,

Turpuk na dengen dilehon Debata,

Di na dialo ho pordjahat.

Na morsurak do tutu Sibolis;

Alai morende djala morlas ni roha do Si *Burdju*.
Atik pe ibana mate tarhunu,
Tondina mangolu djala sonang.

14. Tuan Dalansirpang dohot donganna.

Ninna nampuna djamita on: huida ma di nipingku, mordalan ma Si *Kristen* sasadasa. Djadi adong ma donganna muse na morgoar Si *Hirim* (alana: mangkirim ibana di hangoluan sogot, dung diida pangalaho ni Si *Kristen dohot* Si *Burdju* andorang di onan i) mangihuthon Si *Kristen*, gabe masihaholongan ma nasida songon na morhahamoranggi. Ida ma! Songon i ma pangalaho ni Si *Burdju* gabe saksi halomoan di ugama on, ai tubu ma sian bonina i sada halak, gabe dongan ni Si *Kristen* di pordalananna i.

Dungi ninna Si *Hirim* ma tu Si *Kristen*: «E! alealengku, torop do nian pangisi ni onan i, na naeng mangihuthon pordalanmi, ale tuan, holan paima tingki na lehet nama, asa borhat nasida.»

Huida, di na haruar i Si *Kristen dohot* Si *Hirim* sian onan i, adong do mordalan djumolo sian nasida sada halak, na morgoar: Si *Dalansirpang*. Didok nasida ma tu ibana: «Halak sian luat dia do hamu? sadia dao naeng dalananmu dalan on?» Dungi dialusi ma nasida: «Ahu do na ro sian luat *Hatanatabo* djala na naeng laho tu tano na sumurung i do ahu.»

Si *Kristen*: «*Hatanatabo*, adong do manang aha na denggan tubu sian i?»

Si *Dalansirpang*: «Adong!»

Si *Kristen*: «Taringot tu *Hatanatabo*, huingot dope didok halak: Na mora do huta i.»

Si *Dalansirpang*: «Olo, i ma tutu, torop do angka dongan-ku samarga disi.»

Si *Kristen*: «Ise ma angka donganmi, djadi do sungkunonku i?»

Si *Dalansirpang*: «Hira na sude do pangisi ni huta i dongan-ku samarga; alai anggo na tangkas sumolhot tu ahu, i ma: Si *Porbalik-balik*, tuan *Naposo ni tingki*, dohot tuan *Siporhata natabo*. Sian tingki ni angka na tuatua dope, sai didok do angka i: *Siporhata natabo*; dungi muse tuan *Silandit dila*, tuan *Pangansi*, dohot tuan *Aleale* ni saluhut halak; alai anggo gurunami di huta i, i ma *Sigandjangdila*, (*Sihapodea*) iboto ni dainag ma i. Halak na mora do ahu, daompung do djuragan ni hopal, dibereng dompak on, dilugahon dompak an laos sian ulaon i do umbahen mamora dohot ahu.»

Si *Kristen*: «Naung morbagas do ho?»

Si *Dalansirpang*: «Olo, nunga! Djolmangu na denggan situtu; inangna i pe songon i do, boru ni boru Porgapgap ibana. Asa masuk tu pinompar ni halak na mormulia do ibana; djala naung morsiadjar do ibana. Mansai malo ibana palangkuhon dirina; dompak angka na sangap dohot na lea. Tutu, asing do hami nian otik sian angka na morugama na togu situtu, alai holan di na dua rongkakan na metmet on do; Pordjolo: ndang dung hualo hami alogo dohot pasang ni aek. Paduahon: Ruminggas do hami tu ugama i, di na morsipatu perak ugama i, (molo morlaba). Ringgas do hami mordalan di dalan ugama i, molo morsinondang mata ni ari, djala sude halak mamudji ibana» (Ul. Ap. 14, 13).

Disi, sumurt ma otik Si *Kristen* tungan lambung, huhut ma didok tu Si *Pangkirimon*: «Anggo di rohangku Si *Dalansirpang* do halak on, anak ni Si *Porhatanatabo*; djala molo sintong Si *Dalansirpang* i, tung djea godang do i di hita.» Dungi ninna Si *Pangkirimon* ma: «Sungkun ma goarna, ra paboaonna do.» Asa dung i, mulak ma Si *Kristen* mandapothon Si *Dalansirpang*, ninna ma: «Tung mansai malo do ho ale tuan, mangkatai, ummalo sian sude halak na di tano on, molo tung so sala hatangki taringot tu goarmu, ra Si *Dalansirpang* do ho, anak ni Si *Porhatanatabo*; tutu do manang ndang?»

Si *Dalansirpang*: «Ndang goarhu i nian, alai digoar halak do ahu songon i, ala so mordomu rohanasida tu rohangku. Alai ndang pola husarihon i, ai manang beha pe dengganniba, sai didok halak do na roa.»

Si *Kristen*: «Na adong do huroha, dibahen ho manang aha, umbahen ro goar sisongon i tu ho?»

Si *Dalansirpang*: «Ndang adong; halak sambing do mandok i goarhu; ala hugogo mangihuthon poda, morguru tu tingki na masa, asal ma morlaba ahu. Asa molo songon i panggoar ni halak tu ahu hudjalo nama i.»

Si *Kristen*: «Nang ninna rohangku tama do goar sisongoni tu ho!»

Si *Dalansirpang*: «Denggan! molo i ma pingkiran ni tuan i. Aut ma olo tuan i mambahen ahu alealena, disi pe, asa botoonna, manang na djahat manang na denggan ahu!»

Si *Kristen*: «Molo olo ho morsauduran dohot hami, ingkon aloonmu do alogo dohot pasang ni aek; alai huida sudena i, morbada do dohot pangkilalaanmu. Dung i ingkon ihuthononmu do ugamanami, nang di na mamangke ribakribak, nang di na morsipatu perak, djala ingkon hot djongdjong di ingananna, nang tarrante djala tarbeang; ingkon dos do i di pangkilalaanmu, songon udju di na pinudji ni halak ugama i.»

Si *Dalansirpang*: «Ndang tama hamu gabe portogi di ha-

porseanonku, manang manguhumi dohot mangadjari ahu. Pasombu ma ahu di dalan hasomalanku; alai loas huihuthon hamu.»

Si *Kristen*: «Sapat pe ndang djadi, molo so olo ho mangihuthon angka, na hupaboa i tu ho!»

Si *Dalansirpang*: «Na so tupa bolongkononku do porbinotoan-ku, ai ndang adong na sala disi, holan laba do tahe. Molo so djadi ahu rap dohot hamu, ndang pola mahua i; sasada ahu ma mordalan, songon na djolo. Atik na adong do donganku, djumpang ahu di dalan i, na olo moralealehon ahu!»

Ninna nampuna djamita on: Si *Kristen* dohot Si *Hirim* pe ditadingkon nasida ma Si *Dalansirpang* dao. Dungi manaili ma sada halak dompak pudi, djadi diida ma, tolu halak mangihuthon Si *Dalansirpang*. Djala dung padjumpang nasida, dihormati Si *Dalansirpang* ma nasida; nasida pe antong, ditabei ma ibana. Goar ni na sada: Si *Haholongiporhibion*; sadanari: Si *Giothepeng*, na sahalaknari Si *Holit*. Angka i ma sudena aleale ni Si *Dalansirpang* i, andorang di haposoonna be. Rap moraleale do nasida udju morsikola tu sada guru na morgoar «Si *Paniopgomos*;» na mangadjarhon tu nasida: Mandiori laba. Di bagasan bagas ni sada na morgoar «*Hagioton*» diingani. Diadjarhon guru i tu nasida: morhitehite gomos, elekelek, dohot gabus, mangalului laba; djala morhite lemes ni pangansion, mangihuthon ugama. Nunga malo na opat tuantuan i mangulahon adjar ni guruna i.

Asa dung masidjаланan, djala masihormatan nasida be, mangkuling ma tuan Si *Giothepeng* tu Si *Dalansirpang*, ninna ma: «Angka ise do na mordalan djumolo an?»

Si *Dalansirpang*: «I ma halak djulu, na so sadia dao sian hutanta, na naeng mangalului hasonangan do i morhitehite malonasida.»

Si *Giothepeng*: «Pel! Boasa so olo nasida paimahon, asa rap hita nian dohot nasida? ai nang nasida, nang hami, anggo di rohanguku, mangalului hasonangan be do.»

Alus ni Si *Dalansirpang*: «Tutu do songon hatami, alai anggo halak na mordalan djumolo, niidami, na gomos situtu do i, mangihuthon pingkiran ni rohana na gomos i. Dialo nasida do pangadjarion ni halak na asing, molo adong nanggo sahalak, na so sahata dohot nasida, di saluhut poda dohot pambahenan. Dipabali nasida do songon hita on sian porguruannasida.»

Hata ni Si *Holit*: «Nandang na danggan i, ai nunga dung hudjaha, adong do halak, na mamingkir djala na mangula lobi sian na tama. Halak sisongon i ma na mambahen dirina gabe panguhum manihasi ulaon ni na asing, djala dirina sambing dipatigortigor. Nuaeng hupangido sian ho, naeng botoonku: Di bagasan piga parkaro do marsalisi ho dohot nasida?»

Si *Dalansirpang*: «Taringot tu pangalaho ni halak i: nasida naeng

manulus dompak djolo, di nasa portaonan; alai anggo ahu, naeng paimahon angin dohot pasang ni aek djolo. Hobas do nasida di sude ulaon pambahenan, ala ni Debata, alai anggo ahu, hulului do dalan na hasea di ahu, asa sonang ahu dohot ugasanku.

Nasida, mangihuthon adjarnasida, dohot ugama, atik pe di alo sude halak; alai anggo ahu, hulului do dalan mangihuthon ugama i, asa morhasonangan ahu. Nasida mangihuthon tongtong ugama i, atik pe dileai halak nasida; anggo ahu, ndang olo mangihuthon, molo so morsipatu perak ugama i, djala morsinondang mata ni ari, djala dipudji halak ugama i.»

Ninna Si *Haholongiportibion*: «Ture do pingkiranmi, angkang *Dalansirpang*, ai ninna rohangku: na oto situtu do halak i, ai olo do ibana mangalehon ugasanna, atik pe tartiopsa nian; olo do mangu-lahon angka na so hasea di hita di tano on, ala dihirim na ro sogot! Morbisuk ma hita songon ulok. Tapahiang ma duhut udju di las ni ari. Ida ma bonbon il di bagasan ruangna do angka i di taon ngali, alai haruar do angka i muse, di tingki halehetanna, disi morlaba nasida. Sipata dilehon Debata udan, sipata las ni ari. Molo ringgas halak na di djolonta i, mordalan dohot mangula, di na ro udan, ala ni otonasida, rohana ma anggo taringot tusi. Alai anggo hita, mangula djala mordalan ma, dung morsinondang mata ni ari, djala siang dohot udan. Lomo do rohangku di ugama i, molo mambahen laba; ai sude angka ugasan na di tano on, nang angka arta, nang hamoraon di potibion, na nilchon ni Debata do i sude, djala na oto do manang ise, na so umpeop i. Dibahen i, ndang pola ihuthononta pangalaho ni halak na mordalan dju-molo i. Iango Si Abraham dohot Si Salomo, gabe na mora do nasida morhitehite pangoloion tu Debata, djala Si Iliob pe mandok: «Ingkon lam godang perak di portigor i» (Hiob. 22, 25).

Si *Holit*: «Anggo ninna rohangku: sahata do hita sude tari-ngot tusi, ala ni dumenggan unang be tahatai taringot tu pangalaho ni.»

Si *Dalansirpang*: «Hamu angka hahanggi, ida ma! na di bagasan pordalanan do hita sude, ala ni unang ma tahatai, hata na so morlaba. Husungkun ma hamu nuaeng; Beha molo tung adong manang ise portigatiga, manang pandita pe ibana, manang halak na mangula ulaon dohot tangan, djala ibana tarbahen mangomo arta di tano on nian, alai ingkon djolo ihuthononna ugama, ndang pola sian burdjuna, asal ma dipaulaula, djadi do ibana mamangke ugama i bahen porhitean ni pangomoan ugasan i? mandok: Djadi do ibana mangihuthon ugama, na so dung dipordulihon na djolo, morhitehite sipalensein i, asal morlaba ibana?»

Si *Giothepeng*: «Hualusi ma djolo sungkunsungkunmu, tari-ngot tu pandita. Molo adong halak sisongon i, na burdju morro-ha nian, alai otik do gadjina didjalo, hape ro ma na paboa ang-

ka on: Tadingkon ma huriam on, laho tu huria'an, gumodang do gadjim disi; tutu ingkon ringgas ho disi; djumotdjot mordjamita, djala ingkon paubaonmu pingkiranmu, taringot tu poda deba, mangihuthon lomo ni roha ni kuria i. Dungi dioloi ibana ma munsat sian huriana na sailaon, laho tu kuria i, ala morlaba ibana disi. Ianggo ahu, ndang sala ibana dohononku ala ni, ai:

Pordjolo: Nandang sala, molo dilului gumodang gadji, djala Debata do i, na paturehon dalam tusi.

Paduahon: Dungkon i, gabe lam ringgas ibana mordjamita djala mangaradoti ulaonna; ruminggas mangapil, djala manangkasi hata ni Debata, ai i do lomo ni roha ni Debata.

Patoluhon: Dituduhon huhut: olo ibana mansoadahon dirina, djala mortondi na lambok ibana, molo dipauba deba pingkiran-na, dohot pangadjarina, ala pangidoan ni angka donganna.

Paopathon: Dibahen i hupingkiri, dengen do sude pambahenanna; djala molo tarbahen morlaba sian i, boasa tung so djadi? Ala ni, ndang na ture, molo didok halak: ala ni holitna, umbahen dipaimbar hutana, djala dihaolongi perak. Balik ni, lam ringgas ibana mangula ulaon; tama dipapudjipudji nasida ibana nian. Ibana do sada halak na ture morpangalaho, djala na umboto dalam, mangulahon angka na dengen.

Songon i muse taringot tu halak na asing; molo otik do pangomoanna na sailaon rupani, alai lam ganda leatni molo masuk ibana tu ugama, boasa so djadi ulaonna i, ninna roha. Ai:

Pordjolo: Manang dia pe dalanna laho masuk tu ugama i, ndang morimbar, asal ma masuk tusi.

Paduahon: Aha ma sala, molo hulului sada boruboru na mora bahen djolmangku, djala morlaba ahu di lapongku nang morhitehite ugama?

Patoluhon: Angkup ni, angka halak na mandjalo sudena i di bagasan ugama, nunga tardjalo na dengen ibana; ala ni, on do udjungna: Djumpangan dongan saripe na mora, morlaba di lapo, djala moruntung do ibana, ala ni ugama. I ma angka na dengen, ai sude rap morguna di ibana.»

I ma na nialushonna tu tuan *Dalansirpang* mambuat pudjipudjian, ala ni ditolopi be ma hata ni Si *Giothepeng*; i ma na bongot tu roha djala mangan tu ateate, ai ninna rohanasida: ndang sisualon be hatanasida, djala ala djumolo Si *Kristen* dohot Si *Pangkirimon* mordalan saotik, saroha ma nasida mandapothon sidua halak pordjolo i, laho mangelesi (nasida) morhite sian angka hata, naung pinandokna i nangkin. Djala ala naung dialo Si *Kristen* dohot Si *Pangkirimon* i Si *Dalansirpang*, gabe dilodjongi ma, huhut dihilap dohot tangan. Djala dung diida sidua halak i, moradian ma nasida, paimahon Si *Dalansirpang* dohot donganna i djumonok.

Asa dung masidjalangan nasida, dipaboa nasida ma angka hatana

bongka ondeng, huhut ma disungkun tuan *Sihaholongi portibon*, manang na tarbahen nasida dope mangalusi angka hata i! Dungi didok Si *Kristen* ma: «Sada dakdanak, na onsopmanusu di ugama i, tarbahensa do mangalusi sampuluribu lobi sian i. Manang djadi manang so djadi ihuthononniba ugama ni Jesus Kristus ala ni laba di portibion, i do lapatan ni hatamuna! Beha ma, tarbahen ugama i gabe ompan mangomo angka na di portibion! Nda na djahat do molo adong na mambolongkon ugama i ala ni portibion, manang dipungka mangomo arta di hasiangan on morhite sian ugama? Djala ndang adong na mambahen songon i, dungkon ni halak Porbegu, angka Pangansi, Sibolis dohot Porsibalik mata.

1. Halak porbegu: Ai dung disangkapi Si *Hemor* dohot Si *Sichem* mumbuat boru ni Si *Jakob* dohot pinahanna dohot ugasanna rap dohot hepengna, olo do nasida moraleale dohot halak Israel; pola olo nasida pasunathon nasida dohot ianakkonna, asal ma saut di nasida angka i. Molo dung morsunat hami dohot ianakkonnami, di hami do borunasida dohot ugasannasida, ninna Si *Hemor*. Arta dohot boru dilului nasida, alai ugama i do porhitean, asa dapotsa, ninna rohana.

2. Angka halak arise Pangansi: «Dohot nasida masuk tu na saragam i. Tangiang angka na gandjang ditangiangkon nasida, hape bagas ni na mabalu dipapangani do. Asa morhitehite tangiang i, dilului nasida bagas ni angka na mabalu. Alai manaon uhum na dokdok do nasida sogot ala ni! (Matth. 23, 14)

3. Si *Judas Iskarioth*: Ringgas rohana tu ugama i, ala dilului labana di portibion; alai dung so djumpangsa i, dibolongkon ma muse ugama i dohot Tuhanna, ala dilului muse labana.

4. Si *Simon*, porsibalik mata i: Mangido pangalehonon Ton-di Porbadia ibana sian Si *Petrus*, asa tarbahensa morlaba morhitehite sian i (Ul. Ap. 8, 19. 20.)

5. Dungi ndang taralo ahu mamingkiri on: Nasa na moraulat tu Debata ala pangomoanna, sai bolongkononna do muse hadaulatonna, ala laba di portibion, songon na binahen ni Si *Judas* i. Dibahen i, nasa na mandok: Djadi do djolma mamangke ugama bahen pangomoanna, djala nang hamu sude na mandok: djadi do, huida: *Porbegu* do hamu, manang pangansi, manang *Sibolis*; djala djumpangang upamuna do hamu sogot.»

Ninna nampuna djamita on: masiberengan ma nasida sama nasida. Mago ma pingkirannasida, taringot tu alusnasida dompak Si *Kristen* dohot Si *Pangkirimon*. Alai anggo Si *Dalansirpang* dohot Si *Giothepeng*, tarhatotong ma, djala sumurut dompak pudi, asa salpu Si *Kristen* dohot Si *Pangkirimon* tu djolo. — Dungi ninna Si *Kristen* ma tu alealena i: «Molo so tartaon halak on djongdjong di poruhuman ni djolma, tung songon, dia ma panaon-pa moradohon poruhuman ni Debata! Molo sip nasida moradap-

hon samponggol ngarngar, tung beha ma ulaning pangalahona di adopan ni Debata, na songon api na morsigorgor! (Heber 12, 29). Si *Kristen* dohot Si *Hirim* mordalan ma djumolo, paima sahat tu sada adaran, na morgoar Si *Sonang*, ai disi sonang nasida mordalan; alai ndang sadia bidang adaran i, ala ni hatop do dibolus nasida i. Di bariba ni adaran i adong sada dolok, na morgoar Si *Untung*, ai adong do disi ruang perak.

Djadi ala rangkak do dapot dolok na morisi perak, dibahen i torop do halak angka na manalpu'i gabe mulak muse naeng mornida; alai, di na lam donok nasida tu lambung ruang perak i, marongrong ma tano i, ai mansai gamuk do i, gabe mago siap nasida. Adong do deba, angka na hansit patna, ro di hamamatenan ndang tarbahensa be tingkos mordalan.»

Ninna nampuna djamita on: Huida di bagasan nippingku, adong, holang otik sian bariba ni dalan na di tondong ni dolok perak i, djongdjong sada halak na morgoar Si *Demas*. Pangalahona, songon halak na denggan idaan; i ma na mandjoui angka pordalan i, asa ro mornida ruang perak i. Ninna ma mandok Si *Kristen* dohot Si *Hirim*: «E! mulak ma hamu tuson, ai naeng patuduho-nonku tu hamu saragam na denggan, djala tau idaanmunal!»

Si *Kristen*: «Aha ma labana mulak hami sian pordalanan-nami, asa huida hami i?»

Si *Demas*: «Adong do dison sada ruang perak, na tarhali, gabe porlabaan. Molo olo hamu ro tuson, susa saotik, tarbahen hamu ma papunguhon arta i di hamu.»

Si *Hirim*: «Beta hita, asa taida i!»

Si *Kristen*: «Nandang olo ahu, ai nunga hubege dung na djo-lo taringot tu pangalaho ni inganan i; nunga torop halak siap disi. Sadanari muse: hamoraon i, gabe djorat do i, di manang ise na mangalului i, djala disundati do halak di pordalananna.» (Hos. 9, 6; Matth. 13, 22).

Ninna Si *Kristen* ma tu Si *Demas*: «Ai nda hamagoan do inganan i, nda nunga torop halak sundat mordalan binahen ni?»

Si *Demas*: «Nandang pola! beha susana? holan tu angka na so morroha do.» Alai andorang mandok i dope ibana, mamintor mu-ba do bohina, songon halak na maila.»

Didok Si *Kristen* ma tu Si *Hirim*: «Nandang djadi mang-gulmit rohanta laho tusi, nanggo salangka, ingkon tatulus do sidalananta i.»

Si *Hirim*: «Aut ni Si *Dalansirpang* i sahat tuson, huongku, ingkon laho ibana manirpang tusi!»

Si *Kristen*: «I ma tutu! ndang pola maol i, ai i do nilulu-an ni rohana i, i do hombar ni. Di bagasan sartus hali laho ibana tusi, alai ndang malua ibana, sai na mago do.»

Si *Demas*: «Nandang olo hamu mornida tuson?»

Si *Kristen*: «E *Demas*! ho do naung manirpang sian dalan ni Tuhan i, na sintong i. Sasadasa do *Radja Panguhum*, na manguhumi ho (2 Tim. 4, 10). Boasa luluanmu dalan manogihon hami tu hamagoan? Molo tung manirpang hami, sai botoon ni *Radja* i do i, ndang tarbahen so hona uhumna hami.»

Si *Demas*: «Ahu do sada amparam, paima ma ahu satongkin, asa huihuthon ho.»

Si *Kristen*: «Ise do goarmu?»

Si *Demas*: «Goarhu Si *Demas*, pinompar ni Si *Abraham* do ahu.»

Si *Kristen*: «Nunga hutanda ho! Si *Gehasi* do ompum, djala Si *Judas* do amangmu. Pangalaho ni *Sibolis* do na niulahonmon; amangmu nunga ginantung, ala ni djahatna, balosna pe tu ho laos songon i do. Djaga situtu ma ho, ai molo sahat ahu tu *Radja* i, paboaonku ma sude pangalahom. (2 *Radja* 5, 20--27; *Matth.* 26, 14. 15; 27, 3—5). Dungi mordalan ma nasida na dua i.»

Djadi, disi diida Si *Dalansirpang* dohot donganna ruang perak i, hatop ma nasida laho mandapothon Si *Demas*. Manang na madabu nasida tu bagasan godung i, manang na laho mangkali perak, ndang huboto hami tangkas; holan on do na huboto hami; Ndang tarida be nasida di dalan.

Ninna nampuna djamita on, sahat ma *Sipordalan* i tu bariba ni dalan i tu sada inganan hadjongdjongan ni sada tiang batu, naung leleng; djadi dung diida nasida i, morlodjong ma nasida mandapothon i, ala asing diida nasida porrumangna, ai hira sada tiang sira do idaon. Duansa do nasida longang, mamerengmereng i.

Djadi tarida ma di Si *Hirim*, adong tarsurat di ulu ni tiang i, alai hurang popat ibana mandjaha i, ala ni didjou ma Si *Kristen*, didokkon ma berengonna, asa diboto lapatanna. Dungi didjaha Si *Kristen* ma: «Ingot ma djolma ni Si *Loth*!» Dungi morningot ma nasida muse: tiang sira on, i do djolma ni Si *Loth* i, na gabe tiang sira, ala morbalik ibana tu pudi, di na haruar nasida sian huta Sodom udju i (*Gen.* 19, 26). Ala ni pornidaan on, tu bu ma sungkun—alus di nasida, na dua i:

Si *Kristen*: «Ale ampapa, pornidaan na tama do na itaida on, dung salpu djoudjou ni Si *Demas* i di hita, mornida porlabonna i. Asa aut tung sura taihuthon lomo ni roha ni Si *Demas* i, songon sangkap ni roham, na naeng tusi, dia ma udjungta? sai na gabe tudos tu boruboru on do hita, djala gabe sorminan di mata ni djolma.»

Si *Hirim*: «Nunga husolsoli diringku ala songon i otongku. OtiKnari nama asa songon djolma ni Si *Loth* i ahu; ai dia ma tahe imbar ni dosa ni boruboru i sian dosangu? Boruboru on balik sambing do, alai ahu morsangkap naeng balik, djala laho

tusi. Pinudji ma asi ni roha ni Debata, ai tama do ahu uhumon-na, ala olo ahu mangoloi di giot ni roha sisongon i.»

Si *Kristen*: «Tama tapabongot tu rohanta be angka naung taida dison, asa morlaba hita sian i di tingkina. Djolma ni Si *Loth* i malua tutu sian sada uhum, ai ndang mago ibana di hasisiap ni huta Sodom, alai mago muse di tongandalan, songon na itaida nangkin, ai gabe batu sira do ibana.»

Si *Hirim*: «Tutu, tau do ibana bahen lumbalumba dohot ti-ruan tu hita. Lumbalumba, manundalhon dosa, unang mamereng dampak pudu: Ai batu on do patuduhon tu hita uhum, na mangonai tu angka na so olo palumbaon. Songon: Si *Kora*, Si *Datan* dohot Si *Abiram* dohot donganna na 250 halak i, na rap mago do nasida di bagasan dosana, gabe tiruan lumbalumba tu angka na asing (Num. 16, 27—35; 26, 9. 10). Alai umbahen longang rohangku nian hinorhon ni sasada on do: Diida Si *Demas* dohot angka donganna i do nian tanda lumbalumba on molo tung diungkap matana, alai atik pe songon i, barani do nasida, laho mangalului perak tusi.»

Si *Kristen*: «Olo tutu; tama longang rohanta disi, alai holan djat ni roha mullop sian pambahenannasida; tudoshon panangko do nasida, angka na manangko dope sian saku ni donganna, atik pe nunga di djolo ni panguhum ibana; manang tudoshon porgait: Morgait dope, atik pe nunga di toru ni gantungan ibana. Ai on do tarsurat taringot tu pangalaho ni isi ni huta *Sodom*: Na dja-hat situtu do nasida di djolo ni mata ni Tuhan i, atik pe basa situtu Tuhan i tu nasida na sailaon, djumolo asa siap nasida. (Gen. 13, 10—13) Alai lam ganda rimas ni Debata, molo diida, magopo do asi dohot lambas ni rohana i dibahen djolma. Ala ni diparo Debata do udan api barerang, mangago hutanasida i. Sintong ma: Ingkon lam ganda uhum tu halak na so porduli di angka tiruan pangalumbaau binahen ni Debata.

Si *Hirim*: «Tutu do nidokmi ale ampara, ai asi ni roha ni Debata sambing do, umbahen so dohot hita mago. Dibahen i tapudji ma asi ni rohana, djala tapaingotingot ma tong-tong djolma ni Si *Loth* i.»

15. Maliluon, Mahurungan dohot halu-aon ni pordalan sian bagas bolon „Pandeleon”.

Ninna nampuna djamita on: mordalan ma nasida huida sahat tu sada batang aek na denggan, naung ginoar ni Si *Daud*: «Batang aek ni Debata,» Alai digoar *Apostel Johannes*; «Batang aek

hangoluan;» (Ps. 65, 10; Pangung. 22, 1) djala di topi ni aek i situtu do mordalan nasida. Dungi morlas ni roha ma Si *Kristen* dohot donganna i mordalan disi, diinum nasida ma aek i, na tabo i, huhut pahipashon nasida naung lodja i. Angkup ni, di ganup ipar ni aek i, gok angka hau, na rata bulung do, na morporbuwe na tau pahipashon mudar ni na lodja mordalan. Paiparipar do disi pandjampalan na lambas, djala rata, huhut djagar, binahen ni angka bungabunga; djala ndada na olo muba rupa ni nang mortaontaon lelengna. Disi ma nasida moradian, djala modom, huhut sonang (Ps. 23, 2; Jes. 14, 30). Dung ngot nasida, diputihi nasida ma porbuwe ni hau i, asa dipangan, huhut minum nasida sian batang aek i. Dungi diulah muse modom. Songon i ma pangalahonasida, manang sadja lelung, huhut morènde songon on:

«Bereng batang aek na ias on!
Hasea tu pordalan na tuson.
Duhut na rata podomanna,
Porbuwe ni hau sipanganonna.
Na morroha digadis ma barangna,
Manuhor tano hasonangan on.»

Dungi muse, morsangkap ma nasida naeng mordalan, ai ndang dope sahat nasida tu na tinembak ni rohanasida. Djadi dung mangangan nasida, mordalan ma.

Ninna nampuna djamita on: huida di bagasan nippingku, ndang sadia dao dope nasida mordalan, sirang ma batang aek i sian dalan sidalanannasida, djala ndang tangkas tarida be aek i dohot pandjampalan na lomak i. Marsak do roha ni pordalan i ala ni; ganda dope arsakna, ala mamungka roa dalan djala holbung. Djala, ala lam nipis sipatunasida, ai nunga dao nasida mordalan, gabe mansai hansit patnasida dibahen godang ni batu na di dalan i.

Dibahen i mamungka ma ganggu roha ni pordalan i; sai mordalan dope nasida nian ngernger, ndang olo nasida so, manang manadingkon dalan i, alai huhut dihalungunhon nasida dalan na lumambok. Djadi di na mordalan djala mamingkiri dope nasida taringot tu hamamaol ni dalan i dohot rahisna, diida nasida ma di hambirang ni dalan i sada adaran dohot sada sirpang, na mamboan tu adaran i. Na morgoar: «Adaran panirpangan.» Ninna Si *Kristen* ma tu doganna i: «Molo tung puas tu dalan on do sirpang on, laho ma hita tusi.»

Si *Hirim*: «Molo tung mangaliluhon hita dalan on, beha do?»

Si *Kristen*: «Ndang tarbahen songon i: Ida ma, dalan on puas tu dalan na lambas i do.»

Asa, ala na tinogihonna i Si *Hirim*, diihuthon ma ibana mordalan tu sirpang i. Djala dung ro disi nasida, lambok ma tutu patnasida mordalan, djala diida muse, adong sada halak mordalan di djolonasida, na morgoar: «Si *Pangkirimonnasohasea*.» Djadi di-

djou Si *Kristen* ma ibana, huhut manungkun: «Puas tu dia dō dalam on?»

Alusna: «Tu pintu ni surgo il!»

Dungi didok Si *Kristen* ma tu Si *Hirim*: «Ida ma, nda hudok tu ho, i ma tandana na tigor dalanta on.» Songon i ma pangalahonasida mandalani dalam i.

Ari pe, bot ma, huhut mansai holom, asa songon i ma pangalahona, sirang sidua halak i sian na mordalan djumolo i. Alai ala so didjaga Si *Pangkirimon* na so hasea di dalam i madabu ma ibana tu godung, na binahen ni *Radja* nampuna dalam i, na manangkup halak na oto, na manengahon dirina di na so hasea; magopu ma ibana di bagasan godung i.

Alai, disi ma dibege Si *Kristen* dohot Si *Hirim* ibana madabu, naeng ma botoonnasida, manang ala ni aha umbahen madabu ibana, alai ndang adong nanggo sada na tarbahen pabotohon i. Holan suara ni na morhoi do dibege nasida. Didok Si *Hirim* ma: «Didia do hita nuaeng?» Sip ma Si *Kristen*, ai ninna rohana do: nunga lipe dalam. Tongkin i ro ma udan na por, hilap dohot ronggur, mansai djorbut pangalahona, djala balga ma dohot tangkudju.

Si *Hirim* pe morhosa godang, huhut mandok: «O inang! magopona i, tung hutadingkon dalam pordjolo i.»

Si *Kristen*: «Ise do umbotosa, morhasusaan hita di dalam on?»

Si *Hirim*: «Sian mulana dope nunga mabiar ahu, djala hu paingot tu ho saotik, djala naeng patorangonku i nian tangkas tu ho, alai ala tumua ho sian ahu, sip ahu.»

Si *Kristen*: «Ale ampara na dengen, unang ma metmet roham; nunga husolsolsoli rohangku, ala huboan ho sirpang sian dalam na pordjolo i, pola dihilala ho hasusaan na djorbut on, dibahen i sesa ma i ale ampara, ai ndada sian sangkap ni rohangku, umbahen huboan ho tu hasusaan on.»

Si *Hirim*: «Pasonang ma roham; nunga husesai sian rohangku huhut porsea ahu, sai manumpak tu na dengen ma on tu hita on.»

Si *Kristen*: «Las do rohangku, ala padjumpang ahu dohot dongan na lambok roha, alai unang be sai djongdjong hita dison ngongong, beta ma hita mulak.»

Si *Hirim*: «Ale ampara ahu ma djumolo mordalan!»

Si *Kristen*: «Unang songon il ahu ma djumolo, asa molo tung adong haporsuhon, gabe ahu pordjolo mangkilala; ai ala ni do umbahen lilu hita na dua sian dalam na sintong i.»

Si *Hirim*: «Unang ma ho mordalan djumolo, ala di bagasan hasusaan ho, atik beha lilu muse ho maon tu dalam na asing.»

Asa, dungi dipabarani nasida ma rohanasida, dibege nasida

mā sada suara na mandok songon on: «Patongon hamu ma rohamuna mordalan, dompak dalan na bolon i, dalan naung nidalananmuna! mulak ma hamu tu dalan na sintong i» (Jer. 31, 21). Alai nunga mansai magodang aek disi, ala ni mansai susa molo mulak. Asa, dung songon i, didok pingkiranku ma: Ummura do sirpang djolma sian dalan na sintong i, asa mangulahi mulak muse tusi, molo dung lilu.

Ninna nampuna djamita on: mulak ma nasida; alai, ala ni holom i dohot ala balga ni tangkudju, sai naeng lonong do nasida. Sia pulu hali djala lobi dope naeng maup nasida, djala manang beha pe malona mordalan, ndang tarbahen nasida sahat be tu djambatan nangkin, na di lambung ni sirpang i. Djadi udjungna: moradian ma nasida di toru ni sada hau na metmet, paimahon torang ni ari. Dungi ala ni lodjanasida na mordalan i tarpodom ma nasida disi. Nandang pola sadia dao sian hapeahannasida, adong ma sada bagas bolon, na morgoar: «*Pandelea*.» Nampuna bagas i: sada halak *Enak* na morgoar: «*Na so mangkirin*;» asa di tano ni Si *Enak* i do nasida na tarpodom i. Asa, dung ngot manogotna i Si *Enak* i, laho ma ibana maningkir ladangna i, gabe djumpangsa ma nasida disi. Dungi muruk ma ibana huhut patungoripon, dingoti ma nasida, huhut manungkun: «Aha do ulaonmu ro tuson?» Alusnasida: «Sipordalan do hami, na lilu do hami di dalan i, umbahen sahat hami tuson.» Ninna Si *Enak* i ma: «Saborngin on do dileai hamu ahu, ala na ro i hamu tuson djala modom di ingananku, ala ni ndang tarbahen so ihuthononmuna ahu nuaeng.» Dungi ala na ginogoan ni Si *Enak* i nasida, diihuthon nasida ma, ai gumogoan do Si *Enak* i sian nasida. Sip ma nasida, ai diboto, naung morsala do nasida. Dungi dilelei Si *Enak* i ma nasida, dipabongot ma nasida tu sada bilut na holom i na ronsam djala na bau situtu.

Dísi ma nasida sian manogot ni ari Rebo ro di borngin ni ari Sabtu. Nandang mangan manang minum aek santetek nasida, palito pe soada; djala ndang djadi agia ise na bongot tusi mangalehon manang aha. Ala ni gabe ganda situtu susana, ai so adong manang ise na tinandanasida. (Ps. 88, 16). Di inganan on dua hali ganda susana dihilala Si *Kristen*, ala nasida tarhurung binahen ni liluna.

Ninna nampuna djamita on: Adong do djolma ni Si *Enak* i sada. na morgoar: «*Nasomorphosniroha*.» Molo laho modom Si *Enak* i, dipaboaboa do tu djolmana sude na binahenna; ninna ma: «Nunga adong hutangkup dua halak, angka na mangalaosi di gomgomanku, djala nunga hupabongot nasida tu bagasan hurungan.» Disungkun muse ma djolmana i: «Aha do na tama bahenonta tu nasida?» Dialusi djolmana i: «Ise do i? sian dia haroroan ni? djala naeng tudia do i?» Dungi dipaboaboa ma sudena i tu djolmana i. Du-

ngi didok djolmana i ma: «Manogot, disi ngot ho, lombuti ma nasida, unang moralangalang ho.» Asa, dung ngot Si *Enak* sian podomanna i, dibuat ma sada tungkot na djongdjong disi; dungi laho ma ibana bongot tu hurungan i, disonggahi, djala dilombuti ma nasida, songon na mangalombuti biang, atik pe sip nasida, ndang mangalusi nian nanggo sahata, na tau pahansit roha ni Si *Enak* i. Alai sai didatdati do mangalombuti nasida, pola so tarbahren nasida be humor di ingananna. Asa songon i morporsuk nasida, ditadingkon. Sadarina i, ndang adong ulaon di nasida, nda holan morhoihoi dohot morhosa godang.

Di borngin na paduahon i, morsipaingot ma tu Si *Enak* djolmana, ninna ma: «Laho ma ho tu nasida, dokkon ma: Bolongkon hamu ma hosamuna, ai ndang be malua hamu sian on.» Asa dung manogot i, laho ma Si *Enak* i tu nasida, djala dung diida panaonannasida i, morsipal, gale djala mabugang dagingnasida i, didok ma tu nasida: «Lului hamu ma nuaeng paningkotanmu, asa mate hamu, manang minum rasun, manang lombutlombut, manang hudjur; ai aha ma gunana mangolu hamu morsingkorsingkor dison.» Alai ndang ditangihon nasida, malua ma nian anggo pangidoannasida; balik ni, murhing ma bohina, djala dilombuti ma nasida muse, naeng putusonna ma ngolunasida i. Alai tongkin i gonggong ma Si *Enak* i, gabe tinggang, (ai djotdjot do ibana gonggong) djala mate ma tanganna satongkin. Ala ni mulak ma ibana, dipasambu ma nasida, manang tudia lomo ni rohana.

Dungi mortuptup ma sipordalan i, ninna ma: «Beha, tama do oloanta hata ni Si *Enak* i manang ndang?» Dungi mornonang ma nasida songon on:

Si *Kristen*: «E! ale ampara! aha nama bahenonta? mangolu hita morporsuk do; anggo ahu ndang tartahan ahu be on, dos mate dohot mangolu, ndang na tarhatahon. Anggo di rohangku, huso adahon nama diringku tu hamatean, asa unang mangolu ahu songon on. Sumonang do di tanoman i hilalaon sian di tano on. Tung tama ma hita uhuman ni Si *Enak*.» (Hiob 7, 15).

Si *Hirim*: «Sintong dol pangalahonta nuaeng, tung na mansai dangol do, hira dumenggan mate asa mangolu. Alai nuaeng tatimbangtimbang ma djolo: Tuhan nampuna luat na naeng topontonta i mandok: «Unang hamu mamunu.» Gari halak na asing, ndang djadi bunuonta, nda lam so djadi ma bunuonta dirinta? dibahren i unang ma taoloi adjar ni Si *Enak* na mandokkon hita mamunu dirinta. Na mamunu halak na asing, holan dagingna i do dibunu, alai halak na laho maningkot, i do na mamunu dagingna dohot tondina handiri. Dungi muse, ale ampara, na nidokmi: Tanoman i sumonang nimmu, sian tanoman on, ndang diingot ho, djala ndang diboto ho huroha: *Naroko* 1, i do inganan ni angka pamunu, ai ndang di angka pamunu i hangoluan saleleng ni leleng-

na (1. Joh. 3, 15). Sai tatimbang muse ma: Ai apala sude uhum i sahat tu tangan ni Si *Enak*. Nunga dung hubege barita: lan do malua muse di udjungna, angka naung tinangkup ni Si *Enak* i. Ise umboto, manang na buaton ni Debata, sitompa hasiangan on, hosana i, manang na lupa ibana mangkinsu hita di hurungan on, manang gonggong ibana muse, mate pat dohot tanganna! Tung mansai maoto do ahu, tung so laho ahu djumpa i, di na gonggong i ibana. Dibahen i ale ampara, dumenggan tapabenget rohanta, manaon hasusaan on, paima ro tingki haluluanta, alai unang ma tabunu dirinta.»

Ninna nampuna djamita on: Si *Pangkirimon* i do mangalam-bohi roha ni Si *Kristen*; songon i ma pangalahonasida sadarina i, hundul di hurungan na holom i, marsak huhut tumatangis.

Di bot ni ari ro ma Si *Enak* i muse tu hurungan i, naeng mornida, manang na dioloi nasida adjarna i manang ndang. Hape diida, mangolu dope nasida morsingkor djala gale, ala na so mangan dohot minum i; angkup ni, dagingnasida sude do mabugang, hira na so morhosa be i. Muruk ma ibana huhut mandok: «Ndang olo hamu mangihuthon songon na hudok! ala ni sai aeonmu do na bernit; dumenggan do aut unang tubu hamu!»

Asa dung dibege nasida songon i, humitir ma holiholinasida. Ninna rohangku: gonggong do Si *Kristen*, alai tongkini tardjolma ibana; dung masisungkunan ma nasida, manang na tama ihuthon nasida adjar ni Si *Enak* i. Alai Si *Hirim* mangalusi songon on:

Si *Hirim*: «Ale ampara, diingot ho do gogomi na djolo. Ai Si *Apollion* pe so tarbahensa mangaropukhon ho nang pe dihilala djala diida ho angka haporsuhon dohot hadokdohon di rura linggoman ni hamatean. Boasa ia tung nuaeng gok habiaran roham? Ida ma! pangalahongku gumale do sian ho, djala ahu pe dilombuti Si *Enak* do, songon na tu ho; djala ndada dilehon ahu mangan dohot minum songon ho. Nuaeng marsak morroha do ahu songon ho, na di bagasan hurungan na holom on. Alai dumenggan tapabenget rohanta otik. Sai ingot ma panuduhonmu di pangalahom bawa udju di onan hatuiton (na so morguna). Ndang dihabiar ho rante, manang hurungan, manang hamatean; ala ni sai tapabenget ma rohanta sian nasa gogonta, manaon hailaon on.»

Bot ma dohot ari, modom ma muse Si *Enak* i rap dohot djolmana. Disungkun djolmana i ma ibana taringot tu sidua halak na tarhurung i, ninna ma: «Nunga diihuthon nasida songon adjarta?» Alus ni sinondukna i: «Pel sipanangko na djogal do i, na so olo mubauba. Lumas do rohana, manaon haporsuhon i, sian na laho maningkot. Dung didok djolmana i ma: «Morsogot, dumenggan ma togihon nasida tu djolo ni alamanta on, tuduhon ma tu nasida angka tangkurak dohot holiholi ni naung binunum,

asa porsea nasida, hilalaonnasida songon i, andorang so salpu minggu on dope.»

Manogot i, ro ma muse Si *Enak* tu nasida; ditogihon ma nasida tu djolo ni alaman ni djabuna i, dipatuduhon ma tu nasida songon nidokkon ni djolmana i, huhut ma didok: «Sude tangkurak na niidamu on, laos sisongon hamu do i silului hangoluan; alai ala na mangalaosi do nasida di tano gomgomanku, ida ma songon on do udjungna. Hugopugopu do nasida; ba hamu pe nuaeng, songon i do bahenonku. Nuaeng pe, mulak ma hamu tu hurunganmu i.» Dungi dilele ma nasida djala dilinsingi ro di hurungan i. Morsiak situtu ma nasida sadarina i ro di bodari ni ari Sabtu, suang songon na sailaon morporsuk.

Asa, dung bot ari, mangulahi mangkatai ma Si *Enak* rap dohot djolmana i, taringot tu pangalaho ni na tarhurung i. Didok Si *Enak* ma: Mansai longang rohangku, ai atik pe djotdjot hulinsingi nasida, djala godang dohot sipaingothu, ndang ditangihon nasida.»

Alus ni djolmana i: «Mabiar do ahu, aek morpangkirimon do nasida djuguk disi, aut tung beha adong ro paluahon nasida, manang na paima tingkina nasida tu haluaanna. Aut tung beha malua nasida morhitehite anakhinsu panuman (na so ture).» Dungi ninna Si *Enak* ma: «Ale haholongan, morsogot ma husungkapi nasida.»

Di tonga borngin tongon di ari Sabtu mortangiang ma Si *Kristen* dohot Si *Hirim* saborngin i (Ul. Apost. 16, 25), ro di buha siang ari. Dungi andorang hundul dope Si *Kristen* disi, longang ma rohana huhut didok: «Na oto do ahu, sai djuguk ahu di hurungan na roa on, atik pe tarbahen ahu nian malua, ai adong do anakhinsu di bagasan hadjuthu, na morgoar: «Bagabaga;» i do na tau mangungkap bagas bolon on.

Alus ni Si *Hirim*: «I ma barita na denggan ale ampara, paruar ma i sian hadjutmu, undjuni ma unkap!»

Dungi diparuar Si *Kristen* ma anakhinsu i; dung dipamasuk, diputor ma, djadi mamintor menet ma sordak i. Dungi mungkap ma pintu i, djala mura. Dungi rap ruar ma Si *Kristen* dohot Si *Hirim* sian bagasan hurungan i; ditondong nasida ma dompak pintu porruar, na dompak alaman ni djabu bolon i, diungkap ma dohot i. Dungi sahat ma nasida ro di harbangan bosi, alai mansai maol do i diungkap, ai dokdok djala balga do i tongkin i do mungkap nang i. Dungi gogo ma ditait hinsuhinsu i laho ruar; dungi mangkuling ma hinsuhinsu i mansai gogo, ala ni tarsonggot ma Si *Enak* i sian podomanna; dungi hatop ma ibana ro mangalodjongi nasida, alai dauk djala gale ma patna, tinggang ma ibana, umbahen so tarbahensa be mangeahi (Ul. Apost. 16, 27). Asa songon i ma pangalaho ni haluluanasida. Morlodjong ma nasida ro di pintu ni sirpang i. Dungi satahi ma nasida dung ro disi, mambahen tanda di dalan i, asa unang

lilu be angka pordalan, na ro muse di dalan on. Djadi, dung putus sangkap i, dibahen nasida ma sada tiang disi, na morsurat songon on: Sirpang na di bariba ni dalan on, i do mamboan tu bagas Pandlean na niinganen ni Si *Enak*, *Nasomorpangkirimon*, na mansogohon Radja ni banuagindjang i; sai naeng do agohonnonna angka pordalan na mangalului hasonangan.»

Asa torop do halak na mamolus manalpui inganan i, maluasian hamagoan, hinorhon ni tanda i. Dungi morendecende ma nasida songon on:

Ala manirpang hami sian dalan na sintong,
Gabe hona uhum hami djala tarompong.
Bereng tangkas, ho, na mangihuthon hita,
Unang ho madabu tu djca. Molo ho mordosa,
Si *Nasomangkirin* mangarante ho, djala
Tu bagas pandelecan dihurungkon!

16. Si pordalan di lambung pormahan di dolok na djagar.

Dungi mordalan ma nasida, djala sahat tu dolokdolok na djagar. Tuhan i do nampuna dolok na ginöar i. Dungi nangkok ma nasida tu dolok i, naeng mornida angka porlak anggur dohot mual aek, dohot angka na asing na djagar na disi. Dinum djala dipariði nasida ma aek na disini, huhut dipangan porbuwe ni hau anggur na tubu di porlak i. Adong do angka pormahan di punsu ni dolok i, na mormahani birubirunasida. Ngernger ma laho sipordalan i tu lambung ni pormahan i, ditungkolhon nasida huhut uluna tu tungkotna, ala naung lodja nasida. Dungi disungkun sidua halak i ma pormahan i, ninna ma: «Ise do nampuna dolok na djagar on; djala ise nampuna birubiru on?» Alus ni pormahan: «*Immanuel* do nampunasa dolok on, djala ndang be sadia dao luatna sian on; angka birubiru i pc, laos Ibana do nampunasa. Naung dituhor do i morhitehite mudarna» (Joh. 10, 11. 15).

Si *Kristen*: «Beha, on do dalan dompak banuagindjang?»

Si *Pormahan*: «Tigor do, i do dalanmi!»

Si *Kristen*: «Sadia daonari sian on asa sahat tusi?»

Si *Pormahan*: «Mansai dao do i di angka halak na asing, djonok do i di angka na malungun tusi.»

Si *Kristen*: «Beha, morhasusaan do dalan i, manang morhasonangan do?»

Si *Pormahan*: «Sonang do di angka na tigor, alai anggo angka pordosa tarsulandit do disi.» (Hos. 14, 10).

Si *Kristen*: «Adong do dison inganan poradianan di ang-

ka naung lodja mordalan?»

Si *Pormahan*: «Nunga didok Tuhan nampuna dolok on tu hami: Unang lupa hamu mangalehon inganan poradianan di angka pordagang! Ala ni guru di hamu sude angka na niidamu dison.» (Heber 13, 2)

Ninna nampuna djamita on; huida ma di bagasan nippingku: dung djumpang angka pormahan i hatorangan, Sipordalan do i si dua halak i, mangkatai ma nasida dohot pordalan i, songon on:

Si *Pormahan*: «Sian dia do hamu ro, djala beha do pahanmu mandalani songon on dao? Ai otik do halak na borhat tutu, alai umotik dope ianggo tung pataridahon bohina di dolok on?»

Asa dung dibege pormahan i alusnasida, las ma rohanasida; dibereng ma nasida sian las ni rohana, huhut ma didok: «Hiipas ma hamu! Hudjangkon hami ma hamu moradian di dolok na djagar on.» Goar ni angka pormahan i: «Si *Porbinotoan*» «Si *Pangantusi*,» «Si *Pordjaga*,» dohot «Si *Tigor*.» Didjangkon ma *Sipordalan* i, djala diboan ma tu sopesoponasida. Asa dung dilehon nasida mangan, songon somalna udju i, ninna ma muse: «Moradian ma hamu djolo satongkin, asa masitandaan hita, djala tarapul rohamu na morhitehite angka na denggan, na ro sian dolok na djagar on.» Dungi didok nasida ma: «Denggan!» Djadi moradian ma nasida disi borngin i.

Huida ma di bagasan nippingku: Dung manogot i, disungguli pormahan i ma nasida, naeng laho nangkok tu punsu ni dolok i. Dungi rap mordalan ma nasida, huhut mamerengi angka siidaon, na arga situtu disi humaliang. Dungi muse masipandohan ma angka pormahan i: «Tama do tapatuduhon tu nasida angka halangan.» Asa dung dos tahinasida, ditogihon ma nasida nangkok djumo'o tu punsu ni sada dolok, na morgoar: «Haliluon.» Dungi didokkon pormahan i ma nasida mamereng dompak toru situtu. Asa dung dibereng Si *Kristen* dohot Si *Hirim* tu toru, diida ma torop halak; angka naung madabu tu toru ni dolok i, nunga malantuk sude holiholina. Ninna Si *Kristen* ma: «Dia ma astuan ni?» Alus ni pormahan i: «Nda nunga dung dibege hamu, taringot tu angka naung lilu, angka naung mangihuthon hata ni Si *Philetus* dohot Si *Himeneus*, (2 Tim. 2, 17. 18) taringot tu haheon ni halak naung mate?» Alusnasida: «Olo!» Asa didok pormahan i muse ma: «Bangke naung magopu i, i ma bangke ni angka naung lilu i. Ro di saonari dope, ndang tartanom dope bangkena i, asa adong bahen sipaingot lumbalumba tu halak na asing, asa unang digogohon nangkok tu dolok on.»

Didok nampuna djamita on: Ditogihon muse ma Si *Kristen* dohot Si *Hirim*, nangkok tu punsu ni dolok na asing na morgoar: «Dolok Djaga,» huhut ma disuru mamereng tu na dao. Asa

dung dibereng Si *Kristen* dohot Si *Hirim*, songon na diida ma, di rohana, mordalan di tongatonga ni porbandaan djala diida angka na mordalan i, mapitung do, ai sai tartuktuk do di angka tanoman i; ndang tarbahensa be mangalului dalan haluaan sian inganan i.

Disi ma didok Si *Kristen*: «Dia ma astuan ni?» Dialusi pormahan i ma: «Ndang diida hamu, di toru ni dolok on adong sada sirpang tungkan hambirang, na dompak sada adaran?» Alus ni Si *Kristen*: «Olo! huida hami.» Ima sirpang i na mamboandjolma tu sada bagas bolon na morgoar: «Bagas Pandelea,» na niinganan ni Si *Enak* Sipandele. Angka na mordalandalan di tongatonga ni tanoman i, na niidamuna, halak naung mordalan do i, di dalan on songon hamu, sahat ro di sirpang i. Alai dung diida nasida maol ni dalan na sintong i, mameol ma nasida tu sirpang i; dungi muse ditangkap Si *Enak* ma nasida, djala dipahongot tu Bagas Pandelea. Ndang sadia lelang nasida di bagasan i, dipulsikhon ma duansa matanasida i, djala ditogu ma nasida tu tongatonga ni angka tanoman, djala dipasombu ma nasida disi, lilu djamporon ro di saonari. Asa sintong do na nidok ni halak na bisuk: «Halak na manirpang sian dalan hasintongan, moringanan di tongatonga ni angka na mate.» (Spr. 21, 16) Asa dung songon i dipaboa pormahan i, masibereangan ma Si *Kristen* dohot Si *Hirim*, huhut moriluilu matana, manunungiri haliluonnasida udju i. Alai ndang olo nasida paboahon manang aha tu pormahan i, taringot tu haliluonnasida i.

Didok nampuna djamita on: Huida di bagasan nippingku, di boan pormahan i ma nasida tu inganan na asing, tartungkan toru; adong ma disi sada pintu di bariba ni sada dolok; dungi diungkap nasida ma pintu i, disuru ma nasida mamereng tu bagasan. Dungi diida nasida ma di bagasan i mansai holom, djala mortimus, djala morsaringar ma dibege suara, songon suara ni api dohot suara tangis morsidangolon, huhut muap barerang dianggo nasida. Dungi didok Si *Kristen* ma: «Dia ma astuan ni?»

Alus ni pormahan i: «I ma sada dalan sirpang tu na roko. Udjung ni dalan ni angka pangansi do i, angka na manggadis sahala hadjuaroonna songon Si *Esau* dohot Si *Judas Iskariot* naung manggadis Tuhanna i, dohot halak angka na mangaleai barita na uli, songon Si *Aleksander* dohot halak porgabus, angka na satahi dohot Si *Ananias* dohot Si *Sapphira* djolmana i.»

Didok Si *Hirim* ma tu pormahan i: «Ganup nasida, di rohangku, hira na mangalului dalan hangoluan do, songon hami, nda tutu?»

Si *Pormahan*: «I ma tutu, lelung do nasida mambahen songon i.»

Si *Hirim*: «Sadia dao dalanan halak sisongn i, paima tar tulak djala mordjea?»

Si *Pormahan*: «Adong do na dumaŋ nuaeng dolok on, adong do na so sahat tuson.»

Asa dung i, didok *Si Kristen* dohot *Si Hirim* ma: «Tama situtu mortangiang hami tu porgogo na so hatudosan i, asa dapotan gogo hami.»

Si Pormahan: «I ma tutu! Alai molo dung morgogo ho, porhaseang gogomi.» (Luk. 19, 18. ff)

Dungi naeng mordalan ma *Si Kristen* dohot *Si Hirim*, djala angka pormahan i pe, diporhatulut rohana do i. Dungi mordalan ma sidua halak i ro di bona ni dolok i. Alai masipandohan ma angka pormahan i: «Denggan dope tapatuduhon tu nasida pintu ni banuagindjang, atik na malo do nasida mamereng sian taropongta on! Dung mordos ni roha nasida, ditogihon muse ma *Si pordalan* i tu punsu ni sada dolok na timbo, na targoar: «Torang» (Tiur). Dilehon ma tu nasida sada taropong mamereng tusi (Deutr. 34, 1). Djadi, di na mamereng i nasida, diingot nasida ma angka hata ni pormahan i, djadi angka hitir ma tangannasida muse; ala ni, ndang tangkas idaonnasida sian galas i, holan hirdopna do diida, songon sada pintu; djala diida nasida do otik sian hadjagaron ni luat i. Songon i ma pangalahona, mordalan ma nasida huhut morendeende:

«Na buni i dipapatar angka pormahan,

Na buni djala holom di roha ni torop djolma.

Ala ni ro ma ho manopot pormahan i

Asa torang na simuk, bagus djala buni i.

Dungi mordalan ma nasida; djadi dilehon pormahan na sada i ma tu nasida sada surat portogi di dalan. Na sada paingotthon nasida ninna ma: «Djaga ma hamu di *Sipangelekelek*.» Na sadanari mandok: «Djaga ma hamu! unang modom hamu di tano na lambok i.» Na paopathon i mandok: «Debata ma mamasumasu hamu.» Dungi tarsunggul ma ahu sian na mornipi i.

17. Pambahen dohot pangalaho ni *Si Haporseaon metmet.*

Dungi modom ma ahu muse, djadi mornipi muse ma ahu. Huida ma sidua halak silului hasonangan i, mordalan di dalan na dompak tano hasonangan i. Tar dao otik sian bona ni dolok i, adong sada huta, na morgoar: «Panenganengaon.» Sian huta i adong sada dalan na bengkok, na mordomu tu dalan hangoluan i. Disi ma nasida padjumpang dohot sada dolidoli, na las roha, na morgoar: «*Si Bodo*,» na ro sian luat Panenganengaon. Disungkun *Si Kristen* ma ibana, ninna ma: «Sian dia do ho ro, djala naeng laho tudia do ho?»

Si Bodo: «Tuan! ahu, na tubu di luat na tungkan habinsa-

ran i; na naeng laho tu tano hasonangan do ahu.»

Si *Kristen*: «Beha do pambahenmu di roham, laho bongot ho tu pintu na di surgo i? ra susa ho muse disi!»

Si *Bodo*: «Manang beha dibahen halak portigor, songon i ma bahenonku.»

Si *Kristen*: «Aha do sipatuduhononmu disi, asa unkap pintu i di ho?»

Si *Bodo*: «Huboto do lomo ni roha ni Tuhanki, djala nunga huulahon na denggan i nunga huulahon na tama tu djolma, mortangiang do ahu morpuasa do; hulehon do sapersampulu sian ugasanku bahen guguan, mangalehon asiasi do ahu, angkup ni, nunga pola hutadingkon hutangku, naeng mandjalahi hangoluan i, mordalan di dalan on.»

Si *Kristen*: «Alai ndang bongot sian pintu na sompit i ho, sian dalan na bengkok do ho sahat tuson; ala ni mabiar ahu di ho, ai ndang dipingkir ho pangalahom, di ari porpudi hona uhum ho songon halak panangko dohot pandobo. Ra ndang tarbahen ho bongot tu luat i.»

Si *Bodo*: «Halak dagang na so hutanda do ho, Tuan. Mordalan ma ho, songon ugama ni luatmu, mordalan ma ahu songon ugama ni hutangku. Huarop hian, sude tarbahen denggan di udjung. Taringot tu pintu na nidokmu nangkin, sude halak na di tano on, nunga umboto i, mansai dao do i sian hutanami. Nandang adong huboto nanggo sahalak isi ni hutanami, na umboto dalan tusi. Alai nang diboto, nang so diboto, ndang pola mahua i, ai tangkas do diida ho, adong sada dalan na ribur djala na lehet, i do dalan na tu hutanami, i ma sirpang i, na di bariba hambirang on.»

Asa dung diboto Si *Kristen* malona manenganenga, dihusiphon ma tu pinggol ni Si *Hirim*, ninna ma: «Dumenggan do pangkirimanta tu halak na oto sian halak on» (Spr. 26, 12). Dungi ninna muse ma: Sai dirimpu halak na oto i do umbisuk ibana sian sude djolma (Pred. 10, 13). Dia ma bahenonta, tatadingkon ma ibana djolo, asa dipinghiri naung binegena sian hita; dungi tapaima ibana muse, asa tarpadenggan hita ibana. Ninna Si *Hirim* ma: «Nandang denggan molo sahali paboahon sude tu ibana bahe-nonta, ala ni, tasalpui ma ibana djolo. Tarhatai hita do ibana sipatasipata morguru tu na tarboansa.»

Dungi mordalan ma Si *Kristen* dohot Si *Hirim*. Si *Bodo* i mangihuthon sian pudi. Asa dung dumaotik nasida, sahat ma nasida tu sada adaran na holom situtu, djala padjumpang ma nasida dohot sada halak, naung binalbal ni pitu begu; dirahuti ma togu dohot pitu tali, naeng mamboan mulak, tu pintu naung nidanasida, di bariba ni dolok i (Matth. 12, 45; Spr. 5, 22).

Si *Kriszen*, na denggan i pe, mamugka humitir ma, songon i do dohot Si *Hirim*. Djala andorang diboan begu halak i, dipanot-

noti Si *Kristen* ma, aut tung beha ditanda ibana halak i. Dungi diida ma: i do sada «Si *Morbak*,» na sian huta «hadjungkaton;» alai ndang dapot tangkas diida bohina na tungki i, songon panangko na tartangkap. Alai dung salpu, diida Si *Hirim* ma adong tarsurat di pudina, songon on: «Halak na so tong burdju di bagasan ugama, dapotan api na roko na umbagas!»

Mangkuling muse ma Si *Kristen* tu alcalena i, ninna ma: Nuaeng pe, asa huingot muse naung masa na djolo, tu sada halak na djonok dison na morgoar Si *Haporseaonmetmet*. Na moringan na di huta *Burdju* ibana, djala, halak na ture do nian. Songon on djamitana: «Adong do di mula ni dalan na sian huta *Burnang*, sada sirpang sian dalan na lambas i, na morgoar: «*Sirpang hamatean*,» alana umbahen digoari songon i, on do: Nunga lan disi mate tarbunu. Djadi andorang mordalan Si *Haporseaonmetmet* songon hita on, tarpodom ma ibana disi. Djadi ro ma sirpang i tolu halak panangko bolon. Goar ni na sada: Si *Rohadauk*; na sadanari: Si *Rohametmet*, djala sadanari Si *Pangalaosion*; na morhamoranggi do nasida na tolu. Djadi ditahopi ma Si *Haporseaonmetmet*, hatop ma nasida laho tu ibana. Dungi di na naeng hehe djala mordalan Si *Haporseaonmetmet*, ro ma nasida manonggak ibana mandokkon moradian! Tarsonggot ma Si *Haporseaonmetmet* djala tarhatotong; mago ma pingkiran ni rohana; ndang diboto be sibahenonna, manang na mangalo, manang maporus.

Ninna Si *Rohadauk* ma: «Lehon tu ahu nuaeng puro i, inganan ni hepengmi.» Alai ndang mamintor dilehon sian mogapna, ai holong do rohana disi. Alai ro ma Si *Rohametmet*, hatop ma diroro saku ni Si *Haporseaonmetmet*, dibuat ma puro i, inganan ni hepeng i. Dangi dipangiar Si *Haporseaonmetmet* ma soarana mandok: «Panangko! panangko!» Alai Si *Pangalaosion* i mangalombuti ibana dohot tungkotna. Djadi sahali mangalambut, tinggang ma Si *Haporseaonmetmet* tu tano mormudar, songon djolma na naeng mate. Alai andorang djongdjong panangko i dope di lambungna, dibege nasida ma soara sada, songon haroro ni djolma; djala dirimpu nasida ma: I do Si *Asinirohabolon*, na moringan na di huta Pangkirimon na denggan, i do ro nuaeng, djadi morlojong ma nasida maporus. Tading ma Si *Haporseaonmetmet*. Alai dipingkiri Si *Haporseaonmetmet* ma dalan, asa malua ibana nuaeng. Songon i ma djamitanal»

Didok Si *Hirim* ma: «Beha, sude do ugasanna dibuat Si *Panangko* i sian ibana?»

Si *Kristen*: «Ndang! ai inganan ni angka mutiha i ndang djumpang nasida, ala ni adong dope di ibana. Alai hubege, dibaritahon halak, tung mansai marsak do Si *Haporseaonmetmet*, ala naung suda hepengna i dibuat panangko i. Alai ndada holan mutiha na hudok i ditadingkon di ibana, adong dope saotik hepeng-

na i tading dohot surat portanda sada. Alai ia hepeng i ndada sae be i bahen balandjona. Tutu do, molo tung so sala porni-ngotanku, mangido asiasi nama ibana, asa adong hangoluanna di-pordalananna i; ai ndang targadissa ianggo mutihana i. Ala ni, ndang tardjua so mangido asiasi ibana, ai nunga djotdjot ibana rapar.» (1 Petr. 4, 18)

Si *Hirim*: «Halongangan situtu do i, ala so dibuat panangko i surat portanda i, hamasuhanna di pintu ni surgo i!»

Si *Kristen*: «Halongangan tutu! ai na oto do panangko i, di na tarsonggot Si *Haporseaonmetmet*, ndada diingot ibana nian manabunihon surat portanda i; sian pangurupion ni Debata do i di ibana.»

Si *Hirim*: «Apulapul dope di ibana, ala so mago dope suratna i.»

Si *Kristen*: «Apulapul situtu do i di ibana, aut diboto morhaseahon surat i na tama, alai didok halak: Nandang piga hali di-porhaseahon surat i di tongandalan, ala ni do umbahen mura ibana mabiar, di na ro i panangko i, mambuat hepengna. Djotdjot lupa ibana di surat i di na mordalan i ibana; djala sadanari, molo tung diingot ibana surat i, tarsingot ma dohot hepeng na mago i, gabe ganda arsakna, djadi dihalupahon dohot surat i.»

Si *Hirim*: «Asi roha tutu, molo i parohon arsak ni rohana.»

Si *Kristen*: «Arsak ni roha situtu do. Nda songon i do pangalahonta molo tung disamun panangko i hita, djala mabugang songon i ibana di inganan halongonan on? Longang tutu roha, ala so mate marsak ibana. Nunga hubege, sai morhoihoi do ibana saleleng mordalan, djala sai dipaboaboa do tu sude halak, na padjumpang dohot ibana, barita i, dohot pangalaho ni panangkonnasida i, dohot goar ni *Sipanangko i* dohot taringot tu bugangna na posi i, pola naeng tos hosana dipaboa.»

Si *Hirim*: «Longang rohangku di ibana; ai di na di bagasan haraparon ibana, ndang olo ibana manggadis mutihana i deba, asa mangolu ibana di pordalananna i?»

Si *Kristen*: «Hatami, songon hata ni halak na oto i, ai tung ise ma gadissona? ai, di inganan na tarsamun i ibana, ndang morguna mutiha i, djala aut tung sura digadehon, ndada pola sonang rohana bahenon ni, ala so dapot situhoron disi; angkup ni muse, aut tung tading mutiha i, diboto ibana hian do, sai na tulakkonna do ibana sian pintu ni surgo i, di na sahat ibana tusi; djadi umbalga ma djeana disi, sian djea ni halak na manangko sampulu ribu.»

Si *Hirim*: «Boasa songon i muruk ho ale ampara? Inda digadis Si *Esau* do hasahalaonna i, manuhor sipanganon saotik; ai songon mutiha do hasahalaon hadjuaroon. Molo dibahen Si *Esau*

songon i, boasa so tarbahren dohot Si *Haporseaonmetmet* songon i?» (Heber 12, 16).

Si *Kristen*: «Sintong do, Si *Esau* manggadis hasahalaonna i, djala lan dope dohot halak na asing na mambahren songon i, ala ni do umbahren dipadao nasida sian bona ni hangoluan. Nu-aeng pe, unang pados Si *Esau* dohot Si *Haporseaonmetmet*; djala sadanari: hasahalaon i, holan tudosan sambing do i, alai anggo mutiha ni Si *Haporseaonmetmet* ndang songon i. Si *Esau* holan mangoloi hisaphisap ni rohana do, alai Si *Haporseaonmetmet* ndang songon i; Debata ni Si *Esau* i: butuhana do. Si *Haporseaonmetmet* ndang songon i. Angkup ni, ndada manatap tu na dao, tu ari na ro sogot Si *Esau* i, holan mangololoi hisaphisap ni rohana do ibana, songon na nidokna i: «Na laho mate nama ahu, tudia be hasea ni hasahalaonki?» Si *Haporseaonmetmet* ndang songon i, nang pe metmet haporseaonna, tong adong haporseaon di ibana; ndang olo ibana manggadis hasahalaonna i, dohot mutihana i, songon halak naung manggadis, songon Si *Esau* i.

Ndang dung didjaha ho na tarsurat di pustaha i: Ndang adong di Si *Esau* nanggo haporseaon metmet; ala ni, ndang pola longang roha, molo hisaphisap i mangaradjaisa, djala digadis sahalana dohot tondina tu *Sibolis*, radja ni banuatoru. Halak sisongon i, tudos ma nasida tu halode na solo roha, songon na tarsurat di pustaha i, songon on: Halode harangan na solo roha mida dongan, ise ma tarbahren paulakkon rohana (Jer. 2, 24). Molo dung solo roha ni djolma sisongon i mangoloi hisaphisap ni dagingna, sai dilului do i, nang pe manang beha argana. Alai anggo Si *Haporseaonmetmet* ndang songon i, ai mangaringkoti angka na di banuagindjang do rohana, djala boasa tung gadisonna mutihana i, laho manggoi rohana dohot angka na so hasea? ai adong do halak na olo mangalehon hepengna nanggo saduit, manuhor rumput naung malos, laho manggoi butuhana? manang tarbahren ho do manggogoi pidong anduhur mangan bangke, songon pidong sigak? Nang pe olo angka na so porsea i manggadis sude artana mangoloi hisaphisapna, mangalului untungna do nian diping-kiri; alai anggo halak na porsea, ndang olo songon i. Dibahen i, hatami patandahon, hurang mamingkir ho.»

Si *Hirim*: «Tutu do i, alai binahen ni posi ni hatam, naeng tubu rimas di bagasan rohanku.»

Si *Kristen*: «Boasa ale? Dibahen na hupatudos i ho tu pidong na naeng hatop habang tusan—tusan, songon naung matua, atik pe na imbaru diporpöri? Alai loas ma taringot tusi; pabongot ma tu roham simo ni pangadjarion i, djala ndang pola be mortongkar hita.»

Si *Hirim*: «Anggo di rohanku sitolu halak i, rap porbiar do sude, ai mamintor maporus do sudena, dung dibege soara ni

pat ni djolma di dalam i. Boasa so pabaranion ni Si *Haporseaonmetmet* rohana saotik, atik tung beha taralosa do satongkin, djala molo so taralosa nian, ipe asa sumurut ibana?»

Si *Kristen*: «Olo tangkas do nian diboto sude djolma, por-biar do nasida, alai saotik sambing do djolma umbotosa tangkas molo dung diundjuni; ianggo songon habeguon ni roham tutu, ndang adong nanggo saotik di Si *Haporseaonmetmet*. Tar songon ahu on do ibana, ale ampara, alai aut ho padjumpang dohot nasida, ra barani do ho mangalo, alai talu do ho di udjungna i.

Tutu anggo nuaeng barani situtu do ho, andorang dao nasida sian ho, alai molo dung donok, sai na muba do roham bahenonna, suang songon Si *Haporseaonmetmet*. Ai pingkir ma: Si-panangko i, panamun di dalam na bolon i do i, djala naposo ni radja rampuna liang, na so tardodo do i. Molo tung diboto radjanasida i, hasea pangurupion di naposona i, ro ma ibana songon singa na morauang (1 Petr. 5, 8). Ai ahu pe, nunga huhilala, songon hinilala ni Si *Haporseaonmetmet*, tung mansai posi do. Ro ma na tolu halak na roa i manahopi ahu, djadi hubahen pangalahongku songon sada halak Kristen mangalo, alai dipangiar nasida ma soaranasida, djadi pintor ro ma radjanasida i; djadi songon sada halak na manggadis hosana ma ahu ala hepeng saduit. Ai sian pangurupion ni Debata do umbahen morbadju portahanan ahu disi. Alai atik pe hupangke i, mansai susa dope ahu paluahon diringku sian hamagoan, songon sada bawa. Dibahen i ndang adong na umboto hasusaan i, molo so djolo bongot ibana tu pormusuan i.»

Si *Hirim*: «Denggan, alai mamintor maporus do nasida dung diboto nasida, Si *Asinrohobolon* ro sian dalam i!»

Si *Kristen*: «I ma tutu. Ai sude nasida dohot Tuhanna, somal do nasida maporus, molo dung ro Si *Asi ni roha bolon* i; alai ndang pola halongangan ni roha i, ai Si *Asi ni roha bolon* i do sada sian *Ulu balang ni radja* i; ndada tarpatudos Si *Haporseaonmetmet* tu *Ulubalang* i, ai apala sude parripe ni *Radja* i tardok *Ulubalangna*, nang pe sude nasida olo mangalo. Ai tung beha do: tarbahen sada dakdanak ma manaluhon halak *Enak Si Goliath* i, songon na binahen ni Si *Daud* i? Adong do na gogo, adong do na so morgellok; adong na morhaporseaon metmet, adong morhaporseaon balga. Halak on do na morhaporseaon metmet, ala ni do umbahen talu ibana.»

Si *Hirim*: «Dipangido rohangku nian, aut ma moralo Si *Asi ni roha bolon* i dohot Si *Panangko* i, botoonta ma manang ise monang, manang isc talu.»

Si *Kristen*: «Nang pe Si *Asi ni roha bolon* i, sai na lodja do bahenonna, atik pe malo Ibana mamangke sindjata di pormusuan, djala nang pe malo ibana mangalo, huhut mangalele nasida morhite sian podangna, molo andorang morangkup musu i Ibana,

alai molo dung ditahopi Si *Rohadauk* dohot Si *Nasomangkirim* dohot donganna i ibana sian pudi, sai na lodja do ibana mangalo; ai molo dung tinggang djolo, maol do muse hehe, diboto ho do i. Dungi manang ise manotnoti bohi ni Si *Asi roha bolon* i, sai idaonna do iposipos ni bugang, bahen sitindangi ni hatangku. Tongon do dibege halak ibana sahali mandjoudjou di pormusuan, ninna ma: Pola tarsosak hami taringot tu hosa i (2 Kor. 1, 8). Si *Daul* pe, morhoi dohot mangangguk do, udju tinahopan ni musu na tolu i ibana. Songon i do Si *Heman* dohot Si *Hiskia*; nang pe nasida targoar *Ulubalang*, udju moralo nasida, morribahan do badjubadjunasida. Apostel *Petrus* pe, naeng moralo dohot musu i, djala atik pe sintua ni *Apostel* ibana, didok halak, mangilala do gogo ni tangannasida; pola mabiar ibana dibahen sada boruboru. Dungi muse taringot tu Sibolis, radjana i, sai na hobas do i; ndang olo dao ibana sian naposona i. Molo susa nasida, hatop do ibana ro mangurupi. Taringot tu radjanasida i, tarsurat do di buku ni Si *Hiob* (Hiob 41, 16—20). Pir do ateatena songon batu, pir tahe songon batu pandudaan portoru. Molo hehe ibana, raion ma halak angka na begu, laos maporus binahen ni songgotna. Molo ro ibana mandapothon ibana morpodang manang morhudjur manang mormundimundi manang morlombing, rap so belut do. Hira gala ni eme do anggo bosi dietong rohana, djala hira hau na ondapondapon do anggo tombaga. Nandang pola maporus ibana binahen ni anak ni sior, hira gabe durame do anggo batu ni ambalang di ibana. Antong aha ma sibahenon ni bawa molo songon i gogo ni radja i? Olo, aut ma adong sada bawa na morhodahon hoda ni Si *Hiob*, djala mangkunduli sian habeguonna, djala hipas, ra tarbahen ibana do mambahen angka halongangan, ai morsaput ronggur do rungkung ni hoda i, djala ndada mabiar i songon sihapor, poriheihena na djorbut i do manonggoti halak, tambirikna mangkaishais tano i, dihalashon rohana do gogona, djadi hehe ma ibana mandopang sude sindjata ni musu, eles do rohana mida habiaran, djala ndang diboto na angka dotdot, djala ndang olo sumurut bahenon ni podang, humaliang ibana mordarasdaras do angka ompongompong dohot hudjur, angka dotdot djala patungoripon huhut morhadjingdjanghadjingdjang, djala ndang olo moradian; molo dung dibege suara ni sarune, mangkuling ma ibana, ninna ma: Ha! Ha! dianggo ma uap ni pormusuan sian na dao, dibege dohot suraksurak ni angka ulubalang dohot na torop (Hiob 39, 21—28).

Alai anggo songon hita, soldadu na mordalan pat, sai unang ma nian dipadompak hita dohot musu i, djala unang ma diarop rohanta hita sumurung sian dongan; unang ma hita mamudji dirinta, molo dung tabege adong dongan tartangkap, atik tung beha gumale hita. Porrohahon ma pangalaho ni Si Petrus na tarsurat

di gindjang ni on taringot tu panuduhonna di habaranionna. Dirimpu do tarbahensa dumenggan djala tardopangsa, hape disi ma talu ibana. Dirimpu humolong rohana di Tuhan i, sian sude halak na asing, hape ise na tumalu songon hataluan ni Si Petrus? Asa, molo tabage adong muse songon i godang panangko di dalan bolon ni Radja i, itaporrohahon ma na dua on:

Pordjolo: Ingkon gopas hita morpahean, mamboan sada lombulumbu, unang so adong i, ai aut so morlombulumbu ahu, udju moralo ahu dohot Si *Apollion* i, ndang monang ahu. Na tutu situtu, molo songon i, ndang hapambibiaransa hita, songon na nidok ni halak na bisuk: «Di gindjang ni sude i, buat hamu ma lombulumbu haporseaon, ai morhite sian i do haintopan hamu sumbia api ni pordjahat i» (Eph. 6, 16).

Paduahon: Tama ma tapangidohon di hita sada portogi, na manogihon hita. Alai lam dumenggan do molo Tuhan i han-diri donganta. —

I do mangapuli roha ni Si Daud, udju dibolus ibana rura linggoman ni hamatean; djala songon i do pangidoan ni roha ni Si Musa: Dumenggan do ibana mate di inganan hadjongdjonganna, sian na mordalan, ia so moidonganhon Debatana ibana (Ex. 33, 15). Ale ampara *Hirim*, molo Tuhan i donganta, ise ma alonta? (Ps. 3, 5-9). Alai molo so morhite sian pangurupion ni Tuhan i, angka sipanenganenga na burnang i, mate do bunuonna» (Jes. 10, 4).

Ahu pe na djolo, nunga mangilala di hamagoan na hudok i, alai nunga leleng salpu i. Na tutu do, holan pangurupi na arga sian Debata, umbahen so talu ahu. Alai ndang barani ahu manengahon hagagoonku; mortua do ahu, molo so padjumpang be ahu dohot poraloan sisongon i. Alai, ra ndang dope malua hita, sian sude hasusaan i. Ba tung i pe, ala naung dipalua ahu sian singa dohot gompul na manahopi ahu udju i, porsea hian do ahu, paluaon ni Debata do ahu dohot sian tangan ni halak Pilistim si-hulup i.»

Ninna nampuna djamita on: Mordalan ma Si *Kristen* dohot Si *Hirim*, djala diihuthon Si *Bofo* i ma nasida sian pudi. Dungi sahat ma nasida tu sada dalan na mordomu dohot dalan, naung nidalanannasida i, djala tudos tu dalan na naeng dalanandasiida hian do dalan i. Djut ma rohanasida nuaeng, ai ndang diboto manang dalan dia nuaeng dalannasida, ai duansa do dompak djolo. Ala ni moradian ma nasida disi djolo, naeng mamingkiri. Djadi pintor adong ma diida nasida, sada halak na birong, na morabit na bontar, ro ibana mandapothon nasida, huhut mandok: «Boa-sa moradian hamu dison?» Alusnasida: «hami naeng laho tu banuagindjang do, alai ndang huboto hami manang dalan dia sidalanannami!» Djadi didok halak na birong i ma: «lhuthon hamu ma ahu! ai ahu pe na laho tusi do!» Dungi diihuthon nasida ma

ibana tu dalan na mordomu tusi, djadi mardalan ma nasida nger-
nger, ai lam peol do dalan i sian luat na naeng toptonnasida i;
djala lam leleng, lam tundal nasida sian luat i. Asa, atik pe so-
ngon i pangalahona, sai diihuthon do, djala andorang so tarsung-
gul nasida, diboan halak na birong i ma nasida tu bagasan sada
djaring. Dungi morbulutbulut ma nasida, mago ma pingkirannasi-
da disi, ndang be diboto sibahenonna. Djala diida nasida ma,
abit na bontar, na pinangke ni halak na birong i, tanggal ma si-
an dagingna, i pe asa dibotonasida manang ise i na paliluhonna-
sida sian dalan na tigor i, djadi tangis ma nasida, ai ndang dibo-
to nasida, manang tudia nasida mangido pangurupion.

Si *Kritsen*: «Nuaeng pe asa huboto, nunga mordosa ahu;
nda nunga didok pormahan i nian tu hita: «Unang porsea hamu
di hata ni halak pangelekelek i! Nunga songgop tu hita nuaeng
songon hata ni halak na bisuk: Halak na mangelekelek dongan-
na, na laho manaon djorgong tu pat ni do ibana» (Spr. 29, 5).

Si *Hirim*: «Nang surat situdu dalan, dilehon pormahan i
do tu hita, asa tangkas taboto dalan, sidalananta; alai lupa do hi-
ta mandjahasa, djala ndang tadjaga halak na pasusa hita. Disi
ummalo do Si *Daud* sian hita, ai ninna do: «Sai mordjaga do
ahu di langkalangka ni djolma sipangarupa, di angka pambahenan
ni djolma dompak hata ni pamanganmu.» (Ps. 17, 4)

Asa sai marsak do nasida di bagasan djorat i, huhut mor-
hosa godang. Dungi pintor adong ma diida nasida, ro sada ha-
lak, na morsinondang mandapothon nasida, adong sada di tangen-
na linsinglinsing na metmet. Asa dung sahat ibana tu inganan ha-
peahannasida i, disungkun ma: «Sian dia do hamu, aha do
niulamu tuson?» Djadi dialusi nasida ma: «Angka halak na pogos
do hami, na mangalului hatuaon, naeng laho tu luat Zion, alai
nunga dililuhon sada halak na birong i, na mamangke badju na
bontar i hami tuson, songon on pandokna tu hami: «Ihuthon ahu,
ai ahu pe, na laho tu luat Zion do. Djadi dung didok nasida so-
ngon i, ninna na morsinondang i ma: «I ma sipangelekelek i,
Apostel porgabus, na malo mangansi, na paubahon rupana songon
rupa ni surusuruan na badia i» (Dan. 11, 32; 2 Kor. 11, 13—15).
Dungi ninna muse ma: «Ihuthon ahul asa huboan hamu tu da-
lan na djolo il» Asa songon i ma pangalahona, diboan ma nasi-
da muse tn dalan i, di inganan na padjumpang i nasida dohot
Sipangelekelek i.

Dungi ninna muse ma: Didia do hamu morborngin di bor-
ngin na salpu nangkin? Alusnasida: «Rap dohot angka porma-
han i do, na di dolok na djagar na sonang i do hami.» Didok
ibana muse: Nandang dilehon pormahan i tu hamu sada surat si-
tuduhon dalan? Alusnasida: «Olo dilehon do.» Djadi didok ma:
didjaha hamu do surat i? Alus nasida: «Lupa do hami mandja-

ha i. Djadi didok muse ma: Ndang dipaingot pormahan i hamu mandjaga *Sipangelekelek* i? Alus nasida: «Dipaingot do, alai ndada hurimpu hami, porhata na lehet i: i do hape *Sipangelehelek* i.»

Dungi disuru ma nasida manungkap, djala dilingsi ma, huhut mandok: Sude na huhaholongi hupinsang do djala hulingsi; ala ni ringgas ma hamu, djala pauba hamu ma rohamuna (Pang. 3, 19). Dungi ninna ma: Mordalan ma hamu, alai ingot hamu ma mamareso surat na nilehon ni pormahan i. Dungi didok nasida ma mauiate ala ni pangurupionna i. Djadi mordalan ma nasida dompak siamun, huhut morendeende, ninna ma:

Ro ma hamu tuson na mordalan tu luat Zion.

Ida ma! silului hatuaon i dison do lilu.

Nunga tartangkap tu bagsan djorgong ni dosa.

Ala lupa nasida di sipaingot dohot poda ni pormahan.

Tutu malua nasida nuaeng ala ni pangurupion. Alai nunga hona linsing asa adong pangalumbaon.

18. Aha do bahenonku asa dapot ahu hangoluan saleleng ni lelengna.

Satongkinnari diida nasida muse ro ngernger sada halak sian dalan na bolon i, mandjumpangkon nasida. Ninna Si *Kristen* ma tu dongannna i: «Ida ma! ro sada halak na manundali dolok Zion, naeng padjumpang dohot hita.»

Alus ni Si *Hirim*: «Huida do, alai mordjaga ma hita, asa unang padjumpang muse hita dohot pangelekelek i.»

Asa songon i ma pangalahona, ro ma ibana djonok tu nasida, goarna: *Sisoadahon Debata*. Ninna ma: «Naeng tudia do hamu?»

Si *Kristen*: «Hami naeng laho tu luat Zion!» Asa dung dibege, mengkel ma ibana morgagak.

Si *Kristen*: «Boasa mengkel ho?»

Si *Alodebata*: «Mengkel ma ahu tutu, mornida hamu di por-dalananmuna na oto on, ai so adong djumpang hamu manang aha, dungkon ni halodjaon.»

Si *Kristen*: «Boasa! Dipingkir hamu ndang djaloonna hami?»

Si *Alodebata*: «Didjalo dol aut tung adong, alai ndang adong inganan sisongon i, songon na sinangkap ni roham di tano on.»

Si *Kristen*: «Molo so adong di tano on di surgo do i adong.»

Si *Alodebata*: «Nang ahu, udju di hutangku dope, hubege do songon nidokmi, djala borhat do ahu mangalului i, nunga arga dua pulu tuon lelengna, alai ndang djumpang ahu luat i ro di sa-

dari on, i ma umbahen mulak ahu nuaeng» (Jer. 17, 5).

Si *Kristen*: «Ianggo hami na dua, ndada holan hubege hami i, huhaporseai hami do adong do inganan sisongon i.»

Si *Alodebata*: «Nang ahu, andorang di hutangkū dope ahu, aut so huhaporseai, ndang borhat ahu songon on dao, djala nunga pola dumaο hudalani sian na nidalanamu, alai nang adong djumpang ahu. Dibahen i mulak ma ahu, asa hupasonang muse rohangku di angka pangalaho naung huambolongkon na djolo; ai na hurimpu udju i, ndang dapot ahu.»

Didok Si *Kristen* ma tu donganna i: «Tung sintong do na nidok ni halak on?»

Si *Hirim*: «Ingot ma! songon sada halak *Sipangelehelek* i do idaon; ingot muse ma angka na mangonai tu hita na djolo godang ni hasusaan, ala tatangihon hata ni halak na songon on. Dia ma! Nandang adong luat Zion? ninna. Nda nunga taida pintu ni luat i, sian punsu ni dolok na djagar i? Dibahen i ingkon tama mordalan hita huhut morhaporseaon (2 Kor. 5, 7). Sai mordalan ma hita, asa unang hita hona pinsang dohot pungkulpungkul songon djumpa i. Tama ho nian mandok tu ahu sipaingot on, alai nuaeng gabe ahu paingothon tu ho, songon na tarsurat di hata ni pustaha i: «Unang tangihon ale anaha hata ni angka na mangaliluhon ho (Spr. 19, 27).»

Si *Kristen*: «Ale ampara, ndada ala na so porsea ahu umbahen na husungkun ho, na mangundjuni ho do ahu, huhut mandiori porbuwe na denggan sian roham. Anggo pangalaho ni halak i, nunga huboto, naung dipapitung sintua ni portibion do matana; ala ni mordalan ma hita na dua; porsea ma hita di na sintong i, ai ndada na sintong anggo gabus» (1. Joh. 2, 21).

Si *Hirim*: «Morlas ni roha ma hita, huhut mangkirin di hasangapon ni Debata;» djadi ditundali nasida ma halak i. Alai diparengkeli halak i ma nasida huhut mandatdati pordalananna.

Didok nampuna djamita on, huida ma di bagasan nipingku: mordalan ma nasida manang sadia leleḡ, djadi sahat ma nasida tu sada luat, na moruap na lambok, na mambahen mondohondok angka na imbaru ro tusi. Di inganan i ma Si *Hirim* daukdauk, gabe mondokondok. Djadi ninna ma tu Si *Kristen*: «Mansai mondohondok situtu do ahu nuaeng, pola so tarantan ahu be ulungku, ala ni, uwa tung moradian ma hita satongkin papeakkon daḡingta nanggo sangkidop.»

Si *Kristen*: «Nandang djadi, molo peak hita, gabe laos tarpodom situtu nama, djala ndang be ngot.»

Si *Hirim*: «Beasa ale ampara? ai sialap hahipason do tarpodomon, i tu halak na mulaulaon; djadi lam hipas ma nang hita molo peak, nanggo satongkin.»

Si *Kristen*: «Nandang diingot ho be sipaingot ni pormahan i

tu hita na mandok: «Djaga ma hamu di tano na lambok i!» As-tuan ni poda i: Unang modom hita songon halak na asing; mor-djaga ma hita asa dungo hita.» (1 Thess. 5, 6).

Si *Hirim*: «Molo songon i, salangku ma i; ai aut tung su-ra. sasada ahu, binoto hian ma, sai na modom ahu ro di mate; nuaeng huingot hata ni sada halak na bisuk: Dumenggan do dua halak sian sada. (Pred. 4, 9). Sai taruli sahala na denggan ma ho!»

Si *Kristen*: «Nuaeng pe, asa unang be hita mondohondok di inganan on, masisungkunan ma hita saotik di angka hata na denggan.»

Si *Hirim*: «Denggan, las rohangku.»

Si *Kristen*: «Dia ma naeng hataonta?»

Si *Hirim*: «Taringot tu panungguli ni Debata di rohanta be. Ho ma pordjolo mornonang.»

Si *Kristen*: «Huendehon ma djolo ende on:

Naeng mondohondok ho, di inganan na tama dungo,

Bereng ma pordalan, masiurupan sama nasida.

Morhitehite pangkataion, mangalo halodjaon do.

Asa unang pitpit matam, di tano na lambok on.

Unang sasada ho di dalan hangoluan, ingkon saor ho tu do-ngan na burdju, mangintopi api ni banuatoru, hasasaor tu dongan Kristen na burdju.»

Dungi dipungka Si *Kristen* ma mangkatai, ninna ma: Ma-nungkun ma ahu di ho sada sungkunsungkun. Beha do mula ni pingkiranmu, umbahen mordalan ho songon on?

Si *Hirim*: «Naeng sungkunonmu do alana, umbahen hupung-ka mandalani dalan tu hangoluan i?»

Si *Kristen*: «Olo, ai i do lomo ni rohangku.»

Si *Hirim*: «Ianggo pangalahongku di mulana, morlas ni ro-ha do ahu di angka tigatiga di onan na so hasea i; djala aut tung huhalomohon tongtong angka i, ra lam leleng, lam lonong ahu di-si djala mago.»

Si *Kristen*: «Angka aha do i?»

Si *Hirim*: «I ma angka porugasananna dohot hamoraon di ta-no on djala lomo rohangku tuson tusan, huhut mabuk, manolon, ma-ngansi dohot morgappap djala so morbadiai ari minggu dohot ang-ka na tudos tusi. Sude angka i paro hamagoan tu tondingku. Alai muse, dung hubege djala huingot taringot tu angka na di banua-gindjang tarsunggul ma rohangku. Djala huboto angka na huh-a-lomohon na sailaon, parohon hamatean do (Rom 6, 21-23). Dja-la muse, ala ni angka i do ro rimas ni Debata, mangonai tu ang-ka anak na djahat.» (Eph. 5, 6).

Si *Kristen*: «Beha, morgogo do manigor porbinotoan i di bagasan roham?»

Si *Hirim*: «Ndang mamintor lomo rohangku, umboto hadja-

haton ni dosa i, dohot sude hamagoan hinorhon ni. Djala, di na tarsunggul rohangku binahen ni hata ni Debata, hupapitpit sam-bing do mata ni rohangku, mangalo hatiuron i.»

Si *Kristen*: «Ala ni aha umbahen olo ho mangalo angka i, udju disungguli Debata roham morhite Tondina na badia i?»

Si *Hirim*: «Pordjolo, ala ni na maoto do ahu, ai ndang huboto, Debata do na manungguli rohangku. Ndang huboto lbana patandaphon dosangku tu ahu, djala morhitehite i disungguli rohangku naeng paubaonna i.

Paduahon: Sian tabo ni dosa i tu pangidoan ni hisaphisaphu, ndang ringkot rohangku paluahon.

Patoluhon: Ndang lomo rohangku sirang sian angka alealengku na leleng i, ai pambahenannasida dohot rohanasida, hombar tu lomo ni rohangku do.

Paopathon: Molo dung tarpinsang rohangku djala tarsingot angka dosangku tu ahu, ndang tartahan ahu be biar ni rohangku, djadi hupadao pingkiran sisongon i sian ahu.»

Si *Kristen*: «Molo songon i, ra malua do ho sian arsak ni roham sipata?»

Si *Hirim*: «Olo! Alai tarsunggul muse, djala lam ganda do susana sian na djolo.»

Si *Kristen*: «Boasa, aha ma manunggul porningotan di dosa i muse?»

Si *Hirim*: «Lan do, songon on rupani: Molo padjumpang ahu dohot sada halak na burdju di tongandalan, manang umbege barita na djinaha ni halak sian buku i; molo morsahit ahu; molo hubege barita taringot tu hamamate ni halak, djala molo huingot hamamatengku, djala molo hubege taringot tu hamamate ni halak tompu. Angkup ni molo huingot ari hasasahathu tu ari uhumi.»

Si *Kristen*: «Beha! mura do dipalua ho roham sian porsalaan binahen ni dosam, molo diingot ho angka naung taringot i?»

Si *Hirim*: «Nandang mura, ai lam tarsingot i, lam didondoni dosa i rohangku; djala molo naeng sumuang ahu muse tu ulaon ni dosa, ndang olo rohangku, ala dihagigihon. Djadi ganda do dua hali lompit susa ni rohangku.»

Si *Kristen*: «Dung songon i, aha do dibahen ho?»

Si *Hirim*: «Hupingkir, tama padengganonku diringku, ai molo so i, sai na mago ma ahu.»

Si *Kristen*: «Beha, dipungka ho do padengganhon dirim?»

Si *Hirim*: «Olo! Ai ndada holan dosa i hutadingkon, dohot do angka alealengku; djadi hupungka ma mangulahon ugama i, songon on: Mortangiang djala mandjaha hata ni Debata, huhut moriluila matangku, ala ni dosa, dohot morhata na ture tu donganku dohot na suman tu angka i naung huulahon. Ndang sun sude hupaboa.»

Si *Kristen*: «Beha, nunga sonang roham disi, hinorhon ni?»

Si *Hirim*: «Olo! Alai satongkin do; ai ro do muse arsak ni roha i, naeng mandondoni ahu.»

Si *Kristen*: «Alai beha ma tarbahren songon i, ai nunga hira halak naung muba roha ho nuaeng?»

Si *Hirim*: «Lan do angka bingkasna, molo huingot hata na mandok songon on: Sude hatigorannami, tudoshon abit na rotak djala na maribak do; (Jes. 64, 6) dohot hata ni pustaha i, na mandok: Hinorhon ni hatigoran ni patik, ndang tarbahren sun dengen (Gal. 2, 16). Djala nang taulahon angka i, dohononta ma: Angka na so hasa do hami (Luk. 17, 10). Ala ni hupunga ma mamingkiri songon on: Molo tung sude hatigoran songon abit na rotak dohot hinorhon ni hatigoran sian patik, ndang sun dengen, djala nang taulahon sude i, na so hasa dope hita, ndang tarbahren ahu bongot tu surgo i. Dungi hupingkiri muse umpama on: Molo bongot ahu tu bagas portigatigaan, manuhor angka ugasan, arga 500 ringgit, djala hugarar ma utangki sude; hape adong dope utangku naung lelung, djadi dialuhon portigatiga i ma ahu, djadi gabe tarhurung ma ahu, paima hugarar sude utangki, ai ndang na malua ahu atik pe hugarar utangku na porpudi i.»

Si *Kristen*: «Sintong, alai songon dia diaithon ho umpama i tu ho?»

Si *Hirim*: «Hupingkir songon on do: ala ni dosangku do umbahren morutang godang ahu tu Debata, djala sude hatigoran dohot haubaon ni rohangku nuaeng, ndang sac dope manggarar utangki na sian na djolo; djala nang pe tutu songon i godang ni haubaon ni rohangku, hupingkir dope: Beha do pambahenku, asa malua ahu sian hamagoan ala ni dosangku na djolo i!»

Si *Kristen*: «Mansai dengen umpamami, dibahren i datdati ma padjodjor.»

Si *Hirim*: «Angkup ni; adong dope na parohon susa tu rohangku, on do i: Ai atik pe huula ulaon na dengen, sai saor dope dosa tusi huhilala. Ala ni hupingkiri on: tuk do dosa di sadari na huula nuaeng, mangalonongkon ahu tu banuatoru, lam beha ma dosa i na huula na djolo.»

Si *Kristen*: «Aha do dibahren ho muse disi?»

Si *Hirim*: «Na hubahren ndang tarbahren ahu paboahon sude tu ho di na satongkin on, alai tu Si *Burdju* i do hupaboa sibunian ni rohangku udju i, ai masitandaan do hami, djadi didok ma: «Saleleng so djumpang ahu hatigoran ni sada halak na so mordosa, ndang tarbahren ahu mangolu, ai nang hatigoranku dohot hatigoran ni sude hadjolmaon ro di portibion, ndang tarbahensa paluahon ahu.»

Kristen: «Beha, dihaporseai ho do hatana?»

Si *Hirim*: «Auj tung didok ibana hata i tu ahu andorang.

hulului dope hatigoranku handiri, ra hudok na lalaen ibana, alai ala naung hutanda hagaleonku dohot huhilala godang ni dosangku, ala ni huhaporseai!»

Si *Kristen*: «Alai beha, dihaporseai ho do, adong do djumpang sada halak sisongon i na so mordosa?»

Si *Hirim*: «Djolo longang rohangku umbege hata i, alai dung dipatorang tu ahu, diporhatutu rohangku ma.»

Si *Kristen*: «Disungkun ho do Si *Burdju* i, manang ise do halak na so mordosa i, djala beha pambahenna patigorhon roham?»

Si *Hirim*: Olo! Ai ninna do: I do Tuhan Jesus na hundul di siamun ni hatongamon ni Debata na badia i. (Heber 10, 12) Songon on do hatana muse: hatigoranna sambing ingkon pangasahononmu asa tigor ho, ai nunga diomo Ibana i udju di na tinaonna pordangolan udju gantung Ibana di hau i (Rom 4, 5). Dungi husungkun muse: Beha ma pambahen ni hatigoran ni Jesus i bahen ubat ni mata padjongdjong hatigoranku di djolo ni Debata. Djadi ninna ma: «Ianggo Jesus i, Debata na tumimbul do Ibana, Ibana do na mangulahon ulaonna sude so hasurahan, huhut mate Ibana, ndada ala ni dosana, holan ala ahu do, djadi hatigoranna dohot pambahenanna gabe ahu nampunasa, molo mangasahon Ibana ahu.»

Si *Kristen*: «Dungi muse beha pangalahom?»

Si *Hirim*: «Hira mabiar ahu mangkaporseai djolo, ai ninna rohangku do, ndang olo ibana mangurupi djala mandjangkon ahu.»

Si *Kristen*: «Aha do didok Si *Burdju* i tu ho muse?»

Si *Hirim*: «Didokkon do ahu laho mandapothon Ibana. Dja-di hudok: ndang tama ahu. Dungi didok ma muse tu ahu: «Ndang, ingkon laho do ho! ai didjou do ho» (Math. 11, 28). Dungi muse dilehon Si *Burdju* i ma tu ahu sada buku, na sinahap ni Jesus Kristus tu ibana; i ma umbahen barani rohangku mandapothon Tuhan i. Djala didok Si *Burdju* muse do: «Sanggurit manang sahata na tarsurat dison, tumogu do i sian langit dohot tano on.» (Math. 24, 35). Dungi husungkun muse tu ibana: «Molo laho ahu tu Ibana, aha do na tama sibahenonku? Ninna muse: «Tama pangidoonmu tu Amana na di banuagindjang i huhut morsinggang sian sada ni roham dohot tondim, asa dipatan-daphon tu ho Tuhan i.» (Ps. 95, 6; Jer. 29, 12. 13) Angkup ni husungkun muse tu ibana: «Songon dia tama pangidohononku tu Ibana?» Djadi ninna ma: «Laho ma ho, dungi djumpang ho ma Ibana hundul di bagas porasi ni rohaan na hinundulanna tongtong manipat ari, paimahon angka na ro mandapothon Ibana.» (Ex. 25, 22; Lev. 16, 2; Num. 7, 89; Heber 4, 16). Ningku: «Ndang huboto manang dia na ture sidohononku tu Ibana.» Ninna ma: «Dok ma songon on: Ale Debata! Ua tung asi ma roham di ahu pordosa i pauba ma rohangku, asa huboto djala huhaporseai Je-

sus Kristus, ai nunga huhilala, molo so morhitehite hatigoraonna i sai na ambolong do ahu. Ale Debata porholong roha, naung dilehon Ho Anakmu, i ma Jesus Kristus, gabe Sipangolu portibion, palambas ma roham mangasii sada pordosa songon ahu on. Ale Debata! Sai gok ma bahen asi ni roham paluahon ahu sian hamagoan, ala ni Anakmu Jesus Kristus Tuhanku. Amin!

Si *Kristen*: «Nunga dibahen ho songon na nidokna i?»

Si *Hirim*: «Olo! Djotdjot do huulahulahi mambahen songon i.»

Si *Kristen*: «Beha? Dipatuduhon Ama i do Anakna i tu ho?»

Si *Hirim*: «Ndang anggo di mulana, nang paduahalihon, patoluhalihon, nang paopathalihon, palimahalihon, nang paonomhalihon ndang dope.»

Si *Kristen*: «Dungi dia do dibahen ho?»

Si *Hirim*: «Ndang huboto manang dia sibahenonku.»

Si *Kristen*: «Ndang tubu roham pasohothon tangiang i?»

Si *Hirim*: «Olo. Adong do dua ratus hali ro roha songon i.»

Si *Kristen*: «Dia alana umbahen so diihuthon ho i?»

Si *Hirim*: «Porsea do ahu, sintong do i songon na nidok ni halak i tu ahu; i ma: Molo so morhitehite hatigoran ni Jesus Kristus, nang sude hatigoran ni portibion, ndang tarbahensa paluahon ahu. Ala ni on do pingkiranku: «Molo hutadingkon tangiang i, mate ma ahu. Dumenggan ma ahu mate di djolo ni habangsa porasirohaan asa diingan na asing. Djala huingot do hata ni barita na uli na mandok songon on: Molo tung lumambat pangurupion i so ro, paimaima ma (Hab. 2, 3). Sai songon i ma hubahen saleleng so dipatandaphon Ama i Anakna i tu ahu.»

Si *Kristen*: «Beha do pangalaho ni panuduhonna tu ho?»

Si *Hirim*: «Ndang huida Ibana ianggo morhite mata ni ulungku, alai morhite mata ni rohangku do (Eph. 1, 18. 19). Songon on ma pangalahona. Di na sada ari, mansai arsak rohangku, porningotanku di saleleng mangolu ahu; ndang dung songon i arsak ni rohangku, djala lam ganda do susana, ala huingot dosangku dohot hadjahatonku, angka na tama mandabuhon ahu tu na roko, tu haporsuhon na so mansadi. Djadi huhilala ma hira na dompak do Tuhan Jesus mamereng ahu sian surgo, ninna ma: Porsea ma ho di Tuhan Jesus Kristus asa mangolu ho.» Ul. Apost. 16, 31.

Dungi alushu: «Ale Tuhan! Sada pordosa bolon do ahu!» Dungi didok ma: «Asi ni rohangku do di ho!» (2 Kor. 12, 9) Ningku: «Ale Tuhan, dia do lapatan ni na porsea i?» Dungi muse huhilala sian barita na uli hata sisongon on: Manang ise na ro tu ahu, ndang be rapar djala na porsea di ahu, ndang mauas be ibana (Joh. 6, 35). Astuan ni na ro: Na ro dohot na porsea dos do i; ai morhitehite harorona manopot Kristus, dipaboa sihol ni rohana di Kristus, djala i do na porsea djala na mangalului hango-luan na sian Kristus i. Dung salpu i, manetehi ma ilungku, djala

hupangido muse ma: Ale Tuhan! tarbahen dō pāngoluonmū sada pordosa bolon songon ahu on, djala djaloonmu do? Dungi hubege ma didok: «Halak na ro tu Ahu: Na tutu situtu, ndang tula-honhu ibana!» (Joh. 6, 37) Dungi husungkun muse ma: «Ale Tuhan, molo ro ahu tu Ho, ise tama berengonku, asa porsea situtu ahu di Ho? Dungi dialusi ma: «Ahu berengonmu, ai Jesus Kristus naung ro tu portibion i do na mamboan hatuaon tu angka pordosa (1 Tim. 1, 15). Ai Jesus Kristus do hasimpulan ni patik, asa gabe hatigoran ni halak na porsea» (Rom 10, 4). I do Tuhan na mangasii hita djala mamuri hita sian angka dosanta morhitehite mudarna saming (Pangung. 1, 5) Ibana do pordomuan ni Debata dohot djolma (1 Tim. 2, 5). Na mangolu do Ibana ro di saleleng ni lelengna, huhut manangiangkon hita (Heber 7, 25).

Ipe asa digohi las ni roha rohangku, huhut moriluilu matangku, djala mansai malungun rohangku saor tu Ibana huhut tu huria dohot tu dalan ni Debata.»

Si *Kristen*: «I ma tutu hataridaon ni Jesus Kristus tu tondim. Alai nuaeng sintong ma hatahon tu ahu, aha ma laba ni tu tondim?»

Si *Hirim*: «Laba ni on do: Hutanda ma, sude isi ni portibion, na moringanan di hamagoan do, nang pe godang hatigoranna. Dungi muse: Taringot tu Debata Ama, nang pe portigor situtu Ibana, tarbahen Ibana do patigorhon halak pordosa. Dungi muse tubu dibahen i hilaon di bagasan rohangku, djala dipinsang ahu di bagasan haotoonku, ai ndang dung dope bongot tu rohangku pangkilalaan sisongon i na djolo. Naimbaru pe asa huboto hadengganon ni *Jesus Kristus*, na mangkaholongi ahu, djala na patongon ahu di pordalanan na badia on. Ala ni malungun ma rohangku mamudji Ibana dohot pararathon haradjaonna, asa timbul Goarna. Na tutu situtu; nang tung adong mudarhu saribu solup, olo do ahu mangusehon i ala ni Jesus Kristus Tuhanki.»

19. Si Bodo dohot Si Porbalik.

Ninna nampuna djamita on, huida ma di bagasan nipingku: Humusor ma Si *Hirim* dompak pudi, djadi diida ma Si *Bodo* na tinadingkonnasida nangkin, ro nuaeng mangihuthon nasida sian pudi.

Djadi didok Si *Hirim* ma tu Si *Kristen*: Ida ma Si *Bodo* i laos tading di pudi ala ni ngerngerna.

Si *Kristen*: «Huida do ibana, na so lomo do rohana huroha mordonganhon hita.»

Si *Hirim*: «Anggo di rohangku, aut tung sura rap dohot hita ibana, ra ndang na paro susa tu ibana nian, balik tahe mor-

laba ibana.»

Si *Kristen*: «I ma tutu, alai ndang songon i lomo ni rohana.»

Si *Hirim*: «Olo tutu, ale ampara, alai taudji ma djolo, atik na olo do ibana rap dohot hita. Dungi didjou nasida ma ibana.»

Didok Si *Kristen* ma tu Si *Bodo* i: «Ro ma ho, boasa sai tading ho?»

Si *Bodo*: «Ianggo ahu, lumomo do rohangku sasada ahu mordalan, sian na mordongan.»

Ninna Si *Kristen* ma tu Si *Hirim* ngernger: Nda nunga hudok, ndang lomo rohana rap dohot hita! Alai nang pe songon i tole ma, mangkatai ma hita rap dohot ibana di inganan na lungun on. Ninna Si *Kristen* ma tu Si *Bodo* i: «ro ma! hipas do ho? Beha do pangkilalaanmu di hasasaor ni tondim tu Debata?»

Si *Bodo*: «Anggo di rohangku, denggan do, ai nunga denggan pingkiranku; i ma pasabam rohangku di pordalanankon.»

Si *Kristen*: «Dia ma pingkiranmu na denggan i, paboa ma tu ahu?»

Si *Bodo*: «Adong do hupingkir taringot tu Debata dohot taringot tu banuagindjang.»

Si *Kristen*: «Nang Sibolis i, na naeng mangago tondim, songon i do pingkiranna; djala lan halak na so sahat tu surgo i na morpingkiran sisongon i. Sai ladjian mangapian do roha si-gurbak ulu, hape matua so sombu rohana» (Spr 13, 4).

Si *Bodo*: «Alai ndada holan hupingkiri taringot tu Debata, huhut do hutadingkon sudena ala Ibana.»

Si *Kristen*: «Ndang porsea ahu disi; ai taringot tu na manadingkon sudena i, tung na maol do i, nang pe gomos angka na mamingkir sisongon i. Djala sian dia diboto ho, naung ditinggalhon ho sudena i, ala ni Debata dohot banuagindjang?»

Si *Bodo*: «Dohot do rohangku mandok songon i.»

Si *Kristen*: «Didok halak na pistar: halak na morpos ni roha di rohana, i do halak na umoto» (Spr. 28, 26).

Si *Bodo*: «Taringot tu halak, angka na djahat roha do didok hata i, anggo ahu morroha na denggan do.»

Si *Kristen*: «Dia ma tanda ni na sintong hatami?»

Si *Bodo*: «Ala sonang rohangku dibahen, huhut mangkirim dompak banuagindjang.»

Si *Kristen*: «Alai pangkilalaanmi, atik tung ro sian roha na morpangansi do i. Tarbahen do roha ni djolma sonang, so adong tanda ni pangkirimonna?» (Jer. 37, 9)

Si *Bodo*: «Alai hombar do rohangku dohot pangalahongku; ala ni mortanda do pangkirimonkil»

Si *Kristen*: «Ise mandok tu ho; hombar tu pangalahom do dohot roham?»

Si *Bodo*: «Rohangku do mandok songon i!»

Si *Kristen*: «Sungkun ma angka donganku manang panangko ahu! Alai nang disoadahon rohana i, ndang morguna, ia so hata ni Debata panindangi disi; ndang hasea angka saksi na asing molo so disaksihon hata ni Debata.»

Si *Bodo*: «Nda roha na denggan do, na mamingkir angka na denggan, djala nda pambahenna na denggan do, na mangulahon hata ni Debata?»

Si *Kristen*: «Tutu, ai roha na denggan i do, na mamingkiri na denggan, djala pambahenan na denggan do na mangulahon hata ni Debata, alai asing do na mambahen i sian na mamingkiri sambing.»

Si *Bodo*: «Ai aha do pingkiran na denggan i dohot pambahenan na denggan i na mangihuthon hata ni Debata? paboa ma di ahu.»

Si *Kristen*: «Pingkiran na denggan i morragamragam do; adong do: holan taringot tu dirina sambing, adong do na taringot tu Debata, adong do na taringot tu Kristus, adong muse lan dohot taringot tu na asingasing.»

Si *Bodo*: «Dia ma pingkiran na denggan i holan tu diriniba sambing?»

Si *Kristen*: «I ma angka na hombar tu hata ni Debata?»

Si *Bodo*: «Beha ma pambahen ni, pingkiran holan taringot tu diriniba hombar tu hata ni Debata?»

Si *Kristen*: «Molo morpingkir hita taringot tu dirinta hombar tu poda sian hata ni Debata, ipe asa na hombar tu lomo ni roha ni Debata. Paima ma, asa tumorang hupatangkas hatangki. Hata ni Debata do na mandok songon on: Nandang adong nanggo sahalak na tigor, ndang adong na mangulahon na denggan. Dungi muse: Sai na djat do pingkiran ni djolma (Gen. 4, 5; Rom 3, 10—12). Dungi muse: «Sai na roa do sangkap ni sude djolma sian sietehetchonna» (Gen. 8, 21). Nuaeng pe, molo tahlala djala tapingkir, songon i do nang hita, i pe asa na hombar pingkiranta tu hata ni Debata.»

Si *Bodo*: «Tutu situtu, ndang porsea ahu, tung songon i djahat ni rohangku.»

Si *Kristen*: «Ala ni ma tung na soadong dope pingkiranmu na denggan taringot tu dirim saleleng ho mangolu.»

Si *Bodo*: «Dia ma ia pingkiran na denggan taringot tu Debata?»

Si *Kristen*: «Songon hatangki taringot tu pingkiran na denggan taringot tu iba handiri, molo dung hombar pingkiranta tu hata ni Debata, ingkon songon i pingkiranta nang taringot tu Debata. Ture do pingkiranta taringot tu Debata, molo songon on tapingkiri: umbotoan do Debata di pangalahonta sian hita, djala diida do sude na di bagasana rohanta na so taida dope. Dungi di-

boto Debata do dohot sibunian ni rohanta ro di sude pingkiranta. Angkup ni molo tapingkir taringot tu hatigoranta songon on: na rotak djala na roa do i di pamerengan ni Debata, djala ndang olo Ibana mandjangkon hita molo holan ulos ni hatigoranta mangulosi hita, nang pe godang situtu taulahon hatigoran.»

Si Bodo: «Beha pingkiranmu, songon i do otongku? diporhatutu rohanku situtu on: dumao pamerengan ni Debata sian pamerengan djala ndang tarbahren ahu djongdjong moruloshon holan hatigoranku di adopan ni Debata!»

Si Kristen: «Beha do pingkiranmu taringot tu angka i?»

Si Bodo: «Olo. Hurimpas ma alushu, on ma: Tama do iba morhaporseaon di Tuhan Jesus, asa diportigori ahu, ai ndang tuk hatigoranku handiri.»

Si Kristen: «Beha ma pambahenmu morsigantung tu Tuhan Jesus, molo so dihilala ho di bagasan ateatem: Tuhan Jesus hangoluanmu, ai ndang diboto ho urat ni angka dosam, dohot dosa na niulahonmu, laos so ditanda ho ro di saonari, holan pingkiran ni roham do dipangasahon ho taringot tu dirim dohot pambahenanmu, tandap ma: Ianggo pangalahom nuaeng tudos tu sada halak na so olo paubahon pangalahona dohot rohana, djala na so olo mangasahon hatigoran ni Tuhan Jesus sambing, ai holan i do na tuk patigorhon djolma di djolo ni Debata.»

Si Bodo: «Nang songon i, sac do haporseaonki!»

Si Kristen: «Dia ma haporseaonmu?»

Si Bodo: «Porsea do ahu, Kristus i naung mate ala ni pordosa, djala nunga diportigori ahu di djolo ni Debata, huhut dipalua ahu sian djea, ala pangaradotingku di patikna. Manang songon on: Diboan Tuhan Jesus do sude hatigoranku naung hula di bagasan ugama i, tu djolo ni Amana, asa dihalomohon Ama i ahu, hinorhon ni pasupasu ni hatigoranna; songon i ma pangalahona, dipabontor ahu morhite sian i.»

Si Kristen: «Loas ma hualusi djolo nuaeng taringot tu haporseaonmi.

Pordjolo: Haporseaonmi sian atrop ni roham sambing, ai haporseaon sisongon i ndang tarsurat di barita na uli i.

Paduahon: Porsea do ho di bagasan haporseaon pangansi, ala dirimpu ho hatigoran ni Jesus Kristus padengganhon hatigoranmu sambing.

Patuluhon: Haporseaon sisongon i, ndada i na mangaithon tu ho hapintoron sian Jesus Kristus, holan pambahenanmu sambing do dipintori. Dungi muse: Dipabontor ho do ho morhitehite hatigoranmu, ala ni: haporseaon porgabus do i.

Paopathon: Haporseaonmu pangansi i, i do na mandabuhon ho tu banuatoru, tu bagasan rimas ni Debata di ari porpu-di, ai anggo haporseaon na sintong i na tau padengganhon, on do:

molo dipatandap tu roham: na mago do ho hinorhon ni patik, djala ala ni dilului ho pangondingan holan tu hatigoran ni Jesus Kristus. Ai apala dilehon hatigoranna i laho padengganhon hatigoranmu handiri, asa didjalo Debata ho. Holan hatigoran ni Kristus i do manggohi patik. Ibana manaon haporsuhon singkatta; asa hatigoran ni Kristus i sidjaloon ni haporseaonta na sintong i. Morhite sian pangondingi ni Tuhan Jesus do, umbahen so mortihastondinta dapotan hangoluan di djolo ni Debata; didjalo djala dipalua ma hita sian hamagoan.»

Si *Bodo*: «Aha? Holan tu hatigoran ni Kristus nama hita morsigantung, ndang pola be hita patupahon hatigoranta, di roham? Asa songon porhapandean do Ibana, na pasombusombu hita di hisaphisap ni sibukta dohot hadjahatonta, huhut pasombuhon hita manang tudia taambolongkon dirinta? molo holan hatigoran ni Jesus Kristus pangasahononta, asa porsea hita di Ibana?»

Si *Kristen*: «Si *Bodo* situtu do goarmu, mangihuthon goarmi do pangalahom dohot roham, ai angka alusmi do pasintongkon hatangku Si *Bodo* do ho, ai na oto do ho taringot tu hatigoran na padenggahon i; angkup ni oto do ho muse taringot tu dalan mangalului haluaon ni tondim sian rinas ni Debata, morhitehite pangkaporseai di hatigoran ni Kristus. Na oto do ho muse taringot tu pangkorhon dohot gogo ni haporseaon na mangol: di hatigoran ni Kristus; ai on do pangkorhon i: Paserephon rohanta, huhut mangoloi roha ni Debata ala ni Kristus. Dungi muse mangkaholongi Goarna dohot hatana dohot dalanna dohot bangsona; alai ndada asa manongtong mangulahon dosa songon na nirimpu ni otom.»

Si *Hirim*: «Sungkun ma Si *Bodo* i manang naung, dapotsa panandaon dohot pangungkapon di Jesus Kristus di bagasan rohana!»

Si *Bodo*: «Aha! Ho do sahalak na porsea dope di pangungkapon dohot halongangan? Ninna rohangku do: hinaporseaan ni hamu na dua do hinaporseaan ni halak na asing na naeng morsahit di uluna; sude hatami, i do tanda ni porbue dohot pingkiran ni roha na hurang ture.»

Si *Hirim*: «Boasa dongan! Nandang diboto ho ianggo Kristus i, songon na buni do di bagasan Debata, ndang tarbahen be patar tarida Ibana tu hita angka na sian tano on, molo so Ama i pataridahonsa tu hita.»

Si *Bodo*: «Ho do morhaporseaon sisongon i; anggo ahu ndang. Alai dos do haporseaonmu dohot haporseaonku di rohangku, atik pe so songon bodomi bodongku.»

Si *Kristen*: «Tangihon ma sahatanari sian ahu. Nandang tama ho mangkatai taringot tu na so diboto ho, ai na badia do i. Na barani do ahu mandok: nanggo sahalak ndang tarbahensa ma-

nanda Jesus Kristus molo so morhitehite panuduhon ni Debata Ama na di banuagindjang i. Morhite sian haporseaon do tarbahen tondinta mangkaol Jesus Kristus alai holan morhitehite gogo ni Debata Ama na sumurung i do (Matth. 11, 27; 1 Kor. 12, 3; Eph. 1, 17—19). Oe! Si *Bodo* na hinaholongan, huboto do, na so ditanda ho dope haporseaon i. Dibahen i, ngot ma ho sian pingkiran ni roham na lilu i, tanda ma porsuk dohot djeami, djala hatop ma ho laho tu Kristus Jesus, asa dapotan haluaon ho sian uhum bolon, morhitehite hatigoran ni Jesus Kristus, ai hatigoran-na i do hatigoran ni Debata.»

Si *Bodo*: «Hamu do tarbahen songon i hatop mordalan, anggo ahu ndang tarbahen mangihuthon hamu. Molo songon i, mordalan ma hamu djumolo, tading di pudi pe ahu.» Djadi mordalan ma na dua i huhut morende:

«Na oto naeng laos tong maoto

Nang pe ro adjar na denggan tu ho.

Alai di udjung tandaonmu pangalahona,

Dapotonna sambing hamagoanna.»

Asa dung i, didok Si *Kristen* ma tu donganna i: «Beta ma ale pedan, pos do rohangku rap dohot ho, alai tampaktampak ma hita mordalan.»

Ninna nampuna djamita on: huida ma di bagasan nipingku, djumolo ma nasida mordalan hudus otik. Si *Bodo* i mangihuthon ngernger sian pudi. Djadi didok Si *Kristen* ma tu donganna i: «Mansai marsak rohangku mornida Si *Bodo* i, ai tangkas taboto, sai na susa do ibana mase.»

Si *Hirim*: «Oe! songon i ma lan halak di hutanta, hira di bagasan sude bagas dohot alaman dohot sosor, nang di tongatonga ni angka na mangalului hangoluan; alai molo songon i torop ni djolma na oto udur dohot hita, lam beha ma di huta hatubuan ni Si *Bodo* i.»

Si *Kristen*: «Sintong do na tarsurat di bagasan pustaha i: Dipapitpit ibana do matanasida asa unang mornida (Joh. 12, 40; Jes 6, 10). Alai nuaeng rap ma hita; dia do di roham taringot tu halak sisongon i, dihilala ibana do ulaning sipata dosana? Ma-biar do ibana di hamagoanna?»

Si *Hirim*: «Ndang huboto i dumenggan do ho patorangkon, ai nunga tumua ho!»

Si *Kristen*: «Anggo di rohangku, dung do sipata dihilala ibana dosana, alai ala otona hian, ndang hapingkiransa siparo labana, djadi muba ma gomosna mangalului dalan mangagohon pangkilalaan habiaran sisongon i; djadi timbo ma rohana mangasahon pingkiranna sambing.»

Si *Hirim*: «Porsea do ahu di hatami, sintong do i. Biar i do mandasdas roha mangalului hatuaon; biar i do pature roha-

na laho mordalan tu tano *Zion*.»

Si *Kristen*: «Sintong do, biar i molo tung ture tubu sian hata ni Debata: «Biar mida Tuhan Jahowa do pormulaan ni habisuhon» (Job 28, 28; Spr. 1, 7).

Si *Hirim*: «Beha tarbahen ho do patorangkon taringot tu biar na ture na paro pangkalungunhon di hangoluan?»

Si *Kristen*: «Biar na sintong di bagasan tolu ragam do tarpatorang.

Pordjolo: Biar sisongon i, tubu sian roha naung mananda dosana.

Paduahon: Biar i do na manungguli roha ni djolma mangalului haluaon morhite sian Jesus Kristus sambing.

Patoluhon: Huhut dipatubu di bagasan roha ni djolma: unduk dohot holong ni roha tu Debata dohot tu hatana dohot patikna, dohot tu pangoloion tu Debata. Angkup ni biar i do na padjaga roha ni djolma, unang manirpang tu siamun manang tu hambirang, djala mabiar ibana paro rimas ni Debata; mabiar: mago hasonangan ni rohana; mabiar: mangarsahi Tondi ni Debata; mabiar: mambahen hailaon tu dirina.»

Si *Hirim*: «Sintong do hatami, porsea do ahu dihatahon ho do i di hasintongan. Nuaeng pe, beha ndang salpu dope tano na lambok i?»

Si *Kristen*: «Boasa disungkun ho i? lodja do ho di pangkataionta i?»

Si *Hirim*: «Nandang, situtu ndang, alai naeng ma nian botoonku, manang didia hita nuaeng.»

Si *Kristen*: «Adong dope hirahira dua meilnari sian on; ala ni tole ma tataddati mangkatai. Nandang olo na oto i umboto: pangkilalaan ni rohana i, na mauubuhon biar i, i do na manumpak tu na denggan di nasida. I do alana umbahen dialo nasida biar i.»

Si *Hirim*: «Asa ala ni aha umbahen dialo nasida i. Patorang ma, molo lomo roham.»

Si *Kristen*: «Denggan! Pordjolo, ala didok nasida sian *Sibolis* haroro ni biar sisongon i; hape sian Debata do. Dirimpu hamagoannasida do biar i, hape i do situdu dalan tu hangoluan (Ps. 111, 10).

Paduahon: Ala dirimpu, diagohon biar i do haporseaon-nasida; hape so adong haporseaon di roha ni halak sisongon i. Ala ni umbahen girgir djala mutu rohanasida papirhon nasida mida biar i.

Patoluhon: Ala maila nasida mida djolma, aek beha diida do nasida mabiar, ai ndang tama djolma mabiar ala ugama, ninna rohana.

Paopathon: Ala diboto, biar i mangagohon hatigoran han-

diriannasida, djala ndang olo nasida i mago.»

Si *Hirim*: «Olo! sintong na nidokmi, ai nunga dihilala rohangku i na djolo. Laos songon i pangalahongku tagan so muba dope rohangku.»

Si *Kristen*: «Antong tatadingkon ma nuaeng Si *Bodo* i, djala mangkatai ma hita taringot tu sungkunsungkun na asing.»

Si *Hirim*: «Denggan, ho ma pordjolo mangkatai.»

Si *Kristen*: «Ditanda ho do sada halak na morgoar Si *Nasotongtong* di hutanta? Sampulu taon ma dung salpu. Ianggo ibana tung na gogo do, pola mangalobi i taringot tu ugama i.»

Si *Hirim*: «Olo, hutanda do; moringanana di huta *Nasoadasiniroha*, hirahira duaratus meil daona sian huta *Burdju*. Moringanana ibana di lambung djabu ni Si *Porbakk*.»

Si *Kristen*: «Di bagasan sada djabu do nasida; ai sahali, djumpangan di panandaon di dosana do ibana. Nang ahu, porsea do ahu, di na sahali i sintong do i.»

Si *Hirim*: «Ahu pe mamingkir songon i do, ai ndang sadia dao bagasna sian bagashu, djala djotdjot do mabakbak iluna hutatap, djala asi situtu rohangku di ibana. Angkup ni huhirim, ture do ibana muse; alai djumpang muse ma hata na tarsurat di pustaha i: Apala sude halak na mandok: 'Tuhan, Tuhan! tarbahren bongot sogot tu haradjaon ni Debata (Matth. 7, 24).»

Si *Kristen*: «Dipaboa ibana sahali tu ahu: naeng laho do ibana mangalului hatuaon songon pordalananta on; alai disi ma ibana masitandaan dohot sada halak na morgoar: Si *Pangurufiondiri*, djadi dipadao ibana ma dirina sian ahu.»

Si *Hirim*: «Nuaeng mangkatai hita taringot tu halak i, ala ni denggan ma tapareso manang dia alana, umbahren songon i hatop halak sisongon i manundalhon hangoluan?»

Si *Kristen*: «Denggan, ai gabe sipaingot tu hita do i. Ho ma pordjolo mangkatai.»

Si *Hirim*: «Denggan! Anggo dirohangku adong do opat ragam alana.

Pordjolo: Nang pe djotdjot nasida tarsunggul, rohana ndang dipauba; djadi molo dung salpu gogo ni pinsangpinsang i, angka na manungguli roha morparange na ture, gabe mansohot ma. Alai ndang tarbahren so mulak halak sisongon i tu haroroanna, songon na tarsurat di barita na uli: Mulak do muse biang i tu utautana (2. Petr. 2, 22).

Paduahon: Ala dihabiari nasida djolma, angka na tongtong ditaluhon biar, ai tarsurat do di pustaha i songon on: angka na tongtong mangkabiari djolma, i do na bongot tu bagasan djorgong; (Spr. 29, 25). Nang pe ringgas nasida mangalului hangoluan, ala ni biarna mida uhum do. Alai molo dung salpu biar i, asing ma muse pingkiranna, songon on: dumenggan nuaeng mandjaga, unang ma-

go sude na di ibana, djadi balik ibana muse mangihuthon portibion.

Patoluhon: Ala dielesi halak ugama i djadi haleaon i gabe batu portuktuhan di nasida, ai sogo do rohanasida djala gindjang, gabe lea ugama i dipandang rohanasida; ala ni, molo dung lupa rohanasida di api na roko i dohot di uhum ni Debata, mulak ma muse tu porheheanna hian.

Paopathon: Molo morsala nasida, djala morningot di hama-goan i, gabe bugang bolon do i di bagasan rohanasida, ala ni ndang olo nasida mananda djeanasida andorang so hona dope nasida.

Si *Kristen*: «Anggo ninna rohangku ra nunga sintong hata-mi; alai dia do urat ni ulaon i? ala rohana dohot sangkapna ndang dope muba situtu. Ala ni tudos tu halak na morsala, na di djolo ni panguhum do. Tarsonggot djala angka dotdot hira na muba rohana idaon saleleng ibana disi; alai muba manigor pangkilalaan ni dung malua. Mabiari ibana mida hurungan dohot ran-te, alai ndada ala na sogo rohana di dosa i. Aut tung sura di-palua ibana, manigor datdatanna do mambahen dosa i. Alai aut sura na muba situtu rohana ndang tarbahen songon i udjungna.»

Si *Hirim*: «Nunga hupatorang tu ho taringot tu pangalaho-nasida manundalhon hasintongan; alai ulahi muse ma manimbangi dalan na nidalanannasida tusi.»

Si *Kristen*: «Denggan!»

Pordjolo: Diambolongkon nasida roha porningotan di De-bata, di hamatean dohot di ari porpudi.

Paduahon: Ditulakkon nasida ngernger adat dohot ulaon mortangiang di sihabunian, dungi diulakkon nasida pangaloon di hisaphisap ni roha; angkup ni ndang olo nasida mordjaga huhut manolsoli dosanasida dohot angka na asing i.

Patoluhon: Nandang olo nasida saor tu dongan *Kristen* na burdju.

Paopathon: Dungi muse: Losok ma rohanasida laho tu Ga-redja dohot mandjaha hata ni Debata dohot manaringoti ugama i.

Palimahon: Mangalului dosa ni angka na burdju morhitehite sogo ni roha, mangihuthon roha *Sibolis*, asa dibolongkon nasida ugama i morhite panihasion dohot hagaleon ni angka na burdju.

Paonomhon: Dipungka nasida ma saor dohot halak porroha portibion, huhut morpangalaho hadjahaton.

Papituhon: Dipungka ma mangkatahatai taringot tu angka na roa di sihabunian, djala las rohana mornida molo hona sisongon i halak na burdju, asa tarbahensa mambuat tiruan na djat.

Pauluhon: Dungi dipungka ma mormeammeam dohot dosa na metmet di sihapataron.

Pasiahon: Dungi dipapatar ma sian djogal ni rohana tari-

ngot tu dirina manang songon dia pangalahona nuaeng. Alai di na morpangalaho sisongon i, madabu ma nasida tu godung hama-goan. Molo so morhite sian pangurupion ni Debata sai mago do nasida ala ni. Pangansionna i do hamagoanna.»

20. Masasahat ni pordalan tu Jerusa- lem na di banuagindjang.

Asa dung i, huida ma di bagasan nippingku, disalpuai sipordalan i ma tano na lambok i, djadi sahat ma nasida tu sada luat na morgoar: *Hasoloanniroha* na niolina (Jes. 2, 3—12). Iango uap ni tano i, mansai denggan djala tau pahipashon tu angka pordalan tusi. Djadi hundul ma disi Si *Kristen* dohot Si *Hirim*; pasonangkon dagingna. Disi ma dibege nasida angka suara ni pidong, djala angka bungabunga godang diida nasida manipat ari, angka na mangerbang di angka porlak. Djala dibege nasida do dohot suara ni anduhur di tano na sonang i. Angkup ni, mata ni ari pe ndang dung sundut be disi, ai tung mansai dao do i sian rura linggoman ni hamatean, djala dao do i sian inganan ni halak *Enak* Si *Pandelea*, gari bagas bolon *Pandelea*, ndang be tatapon disi. Sian i ma ditatap Si *Kristen* dohot Si *Hirim* luat sitopotonna i; disi ma nasida padjumpang dohot pangisi ni luat i deba, ai di tano *Hasoloanniroha* i somal do angka halak na morsinondang morlaho ro, ai ndang sadia dao be luat i sian topi ni banuagindjang. Disi ma pangoli dohot oroan parataratahon padanna. Sintong do disi: «Rap morlas ni roha Pangoli dohot Oroan, songon i do Debata morlas ni roha di nasida.» Nandang hurang be eme dohot anggur disi, ai djumpang nasida ma suksuk disi, angka na pinorbaga tu nasida, andorang di pordalanan i nasida.

Disi ma dibege nasida angka suara na gogo, na mandok songon on: «Paboa ma tu boru Zion na donok nama tuaml' ida mal upana rap dohot Tuhan i.» Dohot sude pangisi ni luat i manggoari nasida be: Angka halak na badia dohot na tinobus ni Tuhan i djala na pinillitna.

Asa dung i huida ma di bagasan nippingku, morlas ni roha ma *Sipordalan* i disi, lobi sian na sailaon. Dungi di na lam djonok nasida tu huta i, lam tangkas ma diida nasida hasangaponna. Sian batu intan dohot sian mutiha dipauli huta i, djala sere na ias do alamanna; morsinondang na tiur do huta i djala sonang: pola songon na morsahit Si *Kristen* dibahen lungun ni rohana tusi, Si *Hirim* pe songon i do: Sipata sai peak do nasida satongkin mandjouhon: «Molo tung diida ho alealengku sai

paboa ma tu ibana, pola do songon na morsahit huhilala sian sihol ni rohangu.» (Hohelid. 5, 8).

Alai dung morgogo nasida muse binahen ni sipanganon, mordalan ma nasida muse, lam djonok tu huta i. Lan do angka hau na morporbue dohot porlak anggur dohot porlak na asing, na lehet idaon, diida nasida disi. Djala dung sahat nasida tu lambung ni angka porlak i, diida nasida ma tukang porlak di lambung ni dalan i, djadi disungkun nasida ma ibana: «Ise do nampuna angka porlak na lehet on?» Dungi dialusi tukang porlak i ma: «Radja i do nampunasa, ala Ibana dohot ala ni angka pordalan umbahen dipauli, asa dapotan sipanganon nasida, djala asa sabam rohana. Dungi ditogihon tukang porlak i ma nasida tu bagasan angka porlak i; dipangan nasida ma angka porbue ni hau na disini djala sabam ma rohanasida (Deutr. 23, 24). Dungi dituduhon tukang porlak i ma tu nasida angka dalan na nidalanan ni Radja i dohot angka inganan porlapelapean na disi (Ps. 84, 2 - 13). Disi ma nasida moradian djala modom.

Dungi huida muse, ninna nampuna djamita on, lumobi dope dihatahon nasida di na modom, sian udju sude pordalanannasida. Djala ala hupingkiri i, didok tukang porlak i ma tu ahu: Boasa dipingkiri ho i? bangko ni porbue ni hau anggur on do i; tabo do i bongot tu butuha, alai gabe muba do bibir ni halak di porpodomonna mangkatai dibahen.

Huida muse ma: dung modom nasida, hehe ma nasida, naeng laho bongot tu luat i; alai ala las ni sondang ni mata ni ari di bagasan huta i (ai sian sere na tio djala na ias do huta i Pangung: 21, 18), djadi ndang tardompakkon nasida tangkas huta i, djadi morhitehite tarcpong ma dibereng nasida, na pinauli ala ni (2 Kor. 3, 18). Dungi huida ma nasida padjumpang dohot dua halak na morsinondang, na morabithon mas, tiur songon mata ni ari.

Manungkun ma sidua halak na ro i tu Si *Kristen* dohot tu Si *Hirim*: manang sian dia nasida ro. Dungi dipaboa nasida ma i. Disungkun muse: Didia do hamu morborngin djala angka aha do hasusaan dohot pordangolan, manang las ni roha dohot apulapul na djumpang hamu di pordalananmuna i. Dungi dipaboa nasida ma sudena i tu sidua halak i. Dungi didok muse ma: Adong dope duanari hasusaan na padjumpang dohot hamu; dung pe salpu i, asa tarbahen hamu bongot tu huta i.

Djadi dipangido Si *Kristen* dohot donganna i ma asa diloas nasida mangihuthon, djadi didok ma: «Denggan! alai holan morhitehite haporseaonmu sambing do tarbahen ho bongot tu huta i.»

Djadi huida, rap mordalan ma nasida, djadi djonok ma nasida tu pintu ni huta i.

Angkup ni huida ma di holangkolangnasida dohot huta i,

adong sada batang aek na so mordjambatan tu bariba i, djala mansai bagus do aek i. Djadi dung diida nasida batang aek i, tarsonggot ma nasida. Alai didok halak porsinondang i ma: Mo-lo so sian i, ndang tarbahen hamu sahat tu harbangan ni huta i.»

Dungi disungkun nasida ma: Nandang adong dalan na asing, asa tarbahen bongot tu huta i? Alusna: Adong! alai ndang adong manang ise na tarbahen sian i nda holan dua halak, i ma Si *Elias* dohot Si *Henok*, naung malua sian hadjahaton di tano on. Nandang adong manang ise dungkon ni, paima pangkuling ni sarune na por-pudi i» (1. Kor. 15, 51. 52).

Asa dung i, mamungka ganggu ma rohanasida; alai Si *Kristen* ma na gumangu, huhut mamerengi tuson tusan, mandiori dalan paluahon dirina laho manalpui batang aek i. Djadi disungkun nasida ma tu halak i: «Beha dosdos. do bagus ni aek on?» Alusna: «Nandang, alai ndang adong manang ise mangurupi, ai djumpang ho do i bagus manang pedjet, morguru tu haporseaonmu di Radja nampuna huta i.»

Dungi mordalan ma nasida, bongot tu batang aek i, djadi mamungka naeng lonong ma Si *Kristen*, dungi djoudjou ma ibana tu donganna Si *Hirim*, ninna ma: «Lonong do ahu di aek na bagus on, ai disalpui angka portimburna do ulungku, djala galumbangna mangkuphupi ahu pola so tartahan ahu!»

Alus ni Si *Hirim*: «Pasabam ma roham, ale ampara, ai nunga huhilala adong do odjahan ni pathu di toru.» Ninna Si *Kristen* ma: «Ale pedan, arsak ni hamatean i do mangkaliangi ahu, ndang dung idaonku tano, na mabaor susu dohot situak ni loba! Dungi ro ma tompu na holom situtu, manipa Si *Kristen*, pola so tarbahensa be manereng dompak djolo. Djala didok halak do: naengnaeng mago do pingkiran ni Si *Kristen* disi, ndang dipaingot-ingot be angka taringot tu banuagindjang. Djadi mansai lodja do Si *Hirim* mangkindat ulu ni Si *Kristen* tu gindjang, asa unang lonong. Sipata lonong ibana ro di toru, sipata mumbang muse tu gindjang, songon halak na mogapogap, naeng mate. Alai anggo Si *Hirim*, sai tongtong do diapuli roha ni Si *Kristen*, ninna ma: «Dapot huida do pin-tu i, adong do disi huida na djongdjong mandjangkon hita.»

Dungi dialusi Si *Kristen* ma: «Ho do na pinaimaima, ho Si *Pangkirimon* na sintong, naung leleng hutanda!» Alus ni Si *Hirim*: «dohot do nang hol!»

Si *Kristen*: «Oe! ale ampara, aut ni so sipordosa ahu, ro do Tuhan i mangurupi ahu, alai ala ni dosangki, ditogihon do ahu tu djorat on, djala ditadingkon ahu.»

Si *Hirim*: «Ale ampara! ndang diingot ho be hata ni surat i, na mandok taringot tu halak na djahat i: «Nandang porsuk hamamatena, djala morhagagoon situtu do ngoluna» (Ps. 73, 4). Janggo habiaran dohot hasusaan na djumpang ho di aek on, nda-

da panadingkon ni Debata i di ho, alai dibahen do i mangundju: ni ho, manang na ingotonmu hadengganon ni Tuhan i, djala morhaposan tu ibana ho di hasusaan on.»

Dungi huida ma di bagasan nippingku, sonang ma satongkin pingkiran ni Si *Kristen*. Djadi didok Si *Hirim* ma tu ibana: «Pasabam ma roham, Jesus Kristus do mandjou ho.» Dungi mamin-tor morsurak ma Si *Kristen*, ninna ma: «Nunga huida Ibana, na mandok tu ahu: «Molo dibolus ho aek, Ahu do donganmu, djala nang ditaripari ho batang aek, ndang huphupanna ho» (Jes. 43, 2). Dungi pir ma roha ni Si *Kristen* dohot donganna i, djadi maporus ma biar ni hamatean sian nasida djadi saut ma nasida taripar djala horas.

Alai dung di tobing bariba i, diida nasida muse ma na dua halak porsinondang i, paimaimahon nasida. Djadi dung sahat taripar nasida, ro ma sidua halak na morsinondang i manabei nasida, ninna ma: «Ia hami suruan do hami, Tondi porhobas, na sinuru mangkobasi ala ni angka sitean hangoluan salelelenglelengna» (Heber 1, 14). Djadi mordalan ma nasida mandapothon huta i. Ia hapeahani ni huta i, di punsu ni dolok na timbo sahali do i. Alai atik pe dompak gindjang nasida mordalan, mura djala sonang do pordalanannasida i, ai diiringiring sidua halak porsinondang i nasida, djala diusung: Huhut, ndang be morabit hamatean, na olo busuk, sipordalan i, dung haruar nasida sian batang aek i, ai di bagasan aek i peut i sian nasida. Ala ni umbahen mansai hatop nasida mordalan, djala sonang, atik pe tumimbo huta i sian ombun.— Angka sungkun alus do masa di tonga-tonga ni sidua halak porsinondang dohot sidua halak pordalan i taringot tu hamuliaon ni luat i, djala dibaritahon sidua halak na morsinondang i do tu nasida: hamuliaon dohot denggan ni luat i dohot rumang-na na sumurung i hira so tarhatahon. Ninna ma: «I ma dolok Zion, Jerusalem na di gindjang, inganan ni morloksaloksa surusuran dohot tondi ni halak na badia i, naung niurasan mauiutus (Heber 12, 22. 24). Didok halak porsinondang i muse: «Nuaeng laho ma ho tu Paradis ni Debata, inganan ni hau hangoluan i, naung djadi parganonmu, djala molo dung sahat ho disi, porabitanna do ho dohot abit na bontar, djala mangkatai ho dohot Tuhan i manipat ari. Nandang adong be sahiti disi dohot arsak ni roha dohot hamatean, ai nunga salpu angka na pordjolo i» (Jes. 65, 16. 17). Disi ma idaonmu Si *Abraham*, Si *Isaak* dohot Si *Jakob* dohot angka panurirang na badia i, na nialap ni Debata paluahon nasida hian sian djea i, na masa di tano i dope.»

Djadi disungkun sidua halak pordalan i ma: «Aha do na tama siulahononnamu di inganan na badia i?» Alusna: «Disi ma hamu moruli apulapul, hasonangan singkat ni halodjaon, las ni roha singkat ni arsak ni roha sude, sai na gotilonmuna do naung sinuanmuna, angka porbue ni tangiangmuna dohot haporsuhan naung niahapmuna, di pordalanamuna, ala ni Radja nampuna dalan on (Gal. 6, 7. 8). Di huta i ampchononna tu hamu tumpal mas, huhut berengonmuna tongtong bohi

Na badia i. Disi ma idaonmu situtu pangalahona (1 Joh. 3, 2) huhut mor-
ende, mamudjimudji Ibana. Disi ma sabam mata dohot pinggolmuna,
mamereng djala umbege angka na masa di huta na badia i. Djala di-
si ma hamu morlas ni roha rap dohot angka na hinaholonganmuna,
angka na solhot tu hamu djala na djumolo sahat tusi. Hasangapon,
hamuliaon, dohot hatongamon mangkaliangi hamu disi, djala rap do-
hot Radja i tuat hamu, molo laho Ibana morhitchite ombun mangu-
humi angka bangso; dohot do hamu huadul di karosimuna manguhu-
mi (Juda 15; Dan. 7, 9. 10; 1 Kor. 6, 2. 3; 1 Thes. 4, 13 - 17).

Asa di na lam donok nasida tu pintu i ro ma tutu sapunguan
parangan sian banuagindjang manomu nasida. Dungi ninna porsin-
ondang sidua halak i ma tu na ro i: «On do halak na mangkaholo-
ngi Tuhanta i, andorang nasida di tano i! Asa nunga ditadingkon
nasida saluhut ala ni Tuhanta i, djala naung disuru Tuhan i do hami
mandjangkon nasida, djala nunga huiiringiring hami nasida na saidao
di pordalananna, asa tarbahensa mamereng bohi ni Siportobusna hu-
hut morlas ni roha.» Djadi mamintor mandjou ma parangan i go-
go situtu, ninna ma: «Mortua ma angka na djinou tu pesta hasam-
puran ni Anak ni Birubiru i» (Pangung. 19, 9). Angkup ni ruar ma
torop angka na mamalui sarune, morpahean na bontar djala morsi-
nondang, angkup ni angka porhinaloan na ribur pangkulingna, pola mor-
saringar suaranya i ro di langit. Sude nasida ro manomunomu Si *Kris-
ten* dohot alealena i, morhasangapon godang di haroronasida sian ta-
no i, mordongan gondanggondang dohot suraksurak.

Dihaliangi nasida ma Si *Kristen* dohot donganna sian ganup
desa, adong na di djolo adong na di pudi, adong na di siamun adong
na di hambirang (naeng mangaluahon tu gindjang). Huhut do mang-
kuling angka porhinaloan, na ribur situtu, patandaphon tu Si *Kristen*
dohot tu donganna i pangalaho ni ribur ni pandjouon i, dohot sihol
ni roha, naeng manomunomu nasida. Anggo pangkilalaannasida, hira
na di surgo do, atik pe so sahat dope nasida, ala ni sinondang ni surusu-
ruan na mangkaliangi i, dohot umbege suara ni gondang na ribur si-
tutu, hira na sude do disi angka giringgiring mangkuling, manomuno-
mu nasida di rohanasida; alai ganda muse do las ni rohanasida molo
diingot ingananna dohot huria na morluhut ro di salelenglelengna. Eil
morhitehite dila dia, manang morhitehite pen dia surathononku hari-
buron dohot hamuliaon dohot las ni rohanasida! Songon i ma hasa-
sahatnasida tu pintu i.

Asa dung sahat nasida tu pintu i, adong do surat di pintu i
morletter mas, mandok songon on: Mortua do halak na mangulahon
na nidok ni patikna, asa adong huasonasida di hau hangoluan dohot
laho bongot tu harbangan ni huta i (Pangung. 22, 14).

Huida ma di bagasan nippingku, didokkon halak porsinondang i
ma nasida mandonohi pintu i, alai adong ma di atas ni pintu i mame-
reng, i ma Si *Henok*, Si *Musa* dohot Si *Elias*. Djadi didok halak por-

sinondang i ma: «On do angka halak pordalan, na ro sian huta hama-
goan, djala na ro ala holong ni rohana di *Radja* nampuna inganan
on!» Djadi dilehon Si *Kristen* dohot donganna i ma surat portanda i,
na djinalona di mulana mordalan, djadi diboan nasida ma surat i tu
Radja i, djala dung didjaha, ninna *Radja* i ma: «Didia do angka halak
i?» alusnasida: «Djongdjong di pintu harbangan do nasida,» djadi di-
didokkon *Radja* i ma untkapon pintu i, asa tarbahen bangso na tigor
i bongot (Jes. 26, 2).

Dungi huida muse di bagasan nippingku: bongot ma sidua
halak i tu pintu i. Djala tutu dung bongot nasida, mamintor muba
ma bohinasida, djala disalinhon halak ma tu nasida abit na morsinon-
dang songon mas. Andorang untkap pintu i laho bongot nasida, hui-
da ma morsinondang huta i songon sinondang ni mata ni ari, djala
angka alamanna sude sian mas. Mordalandan do disi angka na mor-
tumpal di uluna huhut maniop maremare dohot maniop hasapi mas sa-
da, djala tongtong do mamudjimudji Debata. Djala lan do halak ang-
ka na morhabong huhut masidjouan ndang morpansadian mandok:
Badia, Badia, Badia do Tuhanta i!

Andorang manotnoti angka i ahu, humusor muse ma ahu tu pu-
di, djadi pintor huida muse ma Si *Bodo i*, sahat tu ipar ni aek i, djala
hatop do ibana manaripari, ndang pola satonga susa, songon hinilala
ni sidua halak i, ai nunga adong disi sada porparau, na morgoar Si
Pangkirimon na so hasea; morhitehite parauna i dipataripar Si *Bodo*
i. Djadi sahat ma dohot ibana tu pintu i songon sidua halak nang-
kin, alai ndang adong na pasabam rohana nanggo sahalak. Asa dung
sahat ibana tu lambung pintu i, diida ma adong sada surat,
djadi dipungka ma manuktuhi pintu i, ai dirimpu rohana, mamintor
untkaponna di ibana. Alai disungkun halak na mornida sian atas
pintu i ma: «Sian dia do ho ro?» «djala aha lomo ni roham?» «Alusna:
ahu naung mangan dohot minum di djolo ni radja i, djala nunga diadja-
ri Ibana hami di angka alamannami!» Djadi dipangido halak i ma su-
rat portanda i, asa dipatuduhon tu Radja i; disigati Si *Bodo i* ma ha-
djutna, alai ndang adong dapotsa. Djadi didok halak i ma: «Nandang
adong suratmu?» Djadi ndang haalusansa nanggo sahata.

Dungi dipaboa halak i ma i tu *Radja i*, alai ndang ro Ibana man-
dapothon; disuru ma na dua halak porsinondang na mamboan Si *Kris-
ten* nangkin dohot alealena i, ninna ma: «Laho ma hamu, tangkup ha-
mu ma Si *Bodo i*, tali ma patna dohot tanganna, dungi dabu hamu
ma ibana tu na holom morimpotimpot. (Matth. 22, 13)

Djadi ditangkap ma Si *Bodo i* diboan ma tu awangawaag dom-
pak pintu i naung huida di bariba ni dolok i; tusi ma ditaruhon. Dja-
la huida ma, adong do hape sada dalan dompak na roko i sian surgo,
songon na adong huhut nang sian huta hamagoan i. Djadi dung so-
ngon i tarsunggul ma ahu, djala sudena i na mornipi do ahu disi.



Āturan.

1.	Biar ni pordalan i, hapoporosna dohot Sitududalan.	3
2.	Haliluon, solsol ni roha dohot hamumulak ni Si Kristen.	10
3.	Hasasahat ni Si Kristen tu pintu na sompit dohot hamamasukna tusi.	16
4.	Si Kristen di sikola ni Si Patoranghahomion. .	19
5.	Pangkilalaan ni Si Kristen di lambung hau na pinorsilang i.	27
6.	Angka na masa tu pordalan di lambung dolok Hasusaan.	31
7.	Angka na masa tu Si Kristen di bagas Nauli.	34
8.	Si Kristen di rura haserepon ni roha.	43
9.	Si Kristen di rura linggoman ni hamatean. .	48
10.	Si Kristen djumpangan donganna.	52
11.	Si Kristen dohot donganna, padjumpang dohot Si Lagehata.	59
12.	Si Kristen rap dohot donganna i, padjumpang dohot aleale haposan ni rohana.	68
13.	Si Kristen dohot Si Burdju sahat tu Onan na so morguna hatuiton.	70
14.	Tuan Dalansirpang dohot donganna.	77
15.	Haliluon, Hahurungon dohot haluaon ni pordalan sian bagas bolon Pandeleon.	85
16.	Sipordalan di lambung pormahan di dolok na djagar.	92
17.	Pambahenan dohot pangalaho ni Si Haporsean metmet.	95
18.	Aha do bahenonku asa dapot ahu hangoluan sa- leleng ni lelengna.	104
19.	Si Bodo dohot Si Porbalik.	111
20.	Hasasahat ni pordalan tu Jerusalem na di banua- gindjang.	120



